

Mateopa Jesocristo tahimari dsodo inajaro Mateo

Mateopa Jesocca dodosse. Ajijaro namidsa Jeso madidsapa Mateopa Jesodsa ccaccaridsa najari.

Tahide Jeso pocca dodosse tojahijine pohuadsa huahua najaraccadsapa Romanodenicca taminecca dodosse tojapojari. Madijadenicca dsiniro mota tamedsa da quinanjine nanacade tojajari. Mateopa Isaraeri potemahi jodio madija. Imehi onipa Arapeo. Mateo pohua oni ohuahapa Rebi.

Jodiodenipa pohuadeni Idinide Cristo-Mesia tohui madimanajonajari. Jesopa Cristo-Mesia bacco najonajari tahimari jodiodeni nahatoqqiri nahijine Mateo dsodo inajaro.

Jeso biridideni onideni

Roca 3.23-38

¹ Jehe, ajijaro imapi Jesocristo tahimari. Jeso biridi ojariapa Isaraeri potemahi jodiodeni quiquinanajaridenicca tamine Dabi. Biridi ohuaha naco Isaraeri potemahi jodiodeni huapimacca idi Abarahao. Nadsapa Abarahao potemahi onideni hua inadsa Jeso imenicca maqqui oni bacco inanijine.

² Tahidepa Abarahao. Abarahaopa Isahacacca abi.

Isahacapa Jacobocca abi. (Jacobó oni ohuahapa Isaraeri.)

Jacobo bedideni ojaria onipa Joda. Pohua, pohua imecotedenidsa: —Isaraeri potemahi jodiodeni —quiquinanajari.

³ Joda bedipa papamade: Pare, Dsara quina-jari. Imenideni oninipi Tamara.

Parepa Eserocca abi.

Eseropa Araocca abi.

⁴ Araopa Aminadabecca abi.

Aminadabepa Nahasaocca abi.

Nahasaopa Saomocca abi.

⁵ Saomopa Bohodsicca abi. Bohodsi imeni oninipi Rahaba.

Bohodsipa Obedecca abi. Obede imeni oninipi Roto.

Obedepa Dsesse-Isahicca abi.

⁶ Dsesse-Isahipa Dabicca abi. Najari Dabipa jodiodenicca tamine tojjari.

Pohuapa Saromocca abi. Saromo imenipi Oria bedimeni bote.

⁷ Saromopa Robohuacca abi.

Robohuapa Abiaccia abi.

Abiapa Asacca abi.

⁸ Asapa Josapatecca abi.

Josapatepa Joraocca abi.

Joraopa Osiacca abi.

⁹ Osiapa Joataocca abi.

Joataopa Acasecca abi.

Acasepa Esequiacca abi.

¹⁰ Esequiapa Manasecca abi.

Manasepa Amaocca abi.

Amaopa Josiaccia abi.

¹¹ Josiapa Jeconiadenicca abi.

Jeconia, pohua imecotedeni madimanadsapa dsama onihicca madija jadsire eccajona-manajaro. Najaridenina deni toquejenadsapa Isaraeri potemahideni todsepe toquejenajari. Poccadeni dsama Babironi-ahuaaji iaccanibaqqi-manadsapa tarabaid-sajine medse toquejenajari.

¹² Nadsa nahi dsama onihihuaaji madimanadsa Jeconia bedi tossonajari. Pohua onipa Saratieo.

Saratieopa Sorobabeocca abi.

¹³ Sorobabeopa Abiodicca abi.

Abiodipa Eriaquiocca abi.

Eriaquiopa Adsoriacca abi.

¹⁴ Adsoriapa Sadocacca abi.

Sadocapa Aquiocca abi.

Aquiopa Eriodecca abi.

¹⁵ Eriodepa Eriasacca abi.

Eriasapa Mataocca abi.

Mataopa Jacobocca abi.

¹⁶ Jacobopa Dsodsecca abi. Najari Dsodsena Mariacca maqqi tojaripaja.

Jehe, Dsodsecca amoneje Mariadsana Jeso tossonajari. Najari Jesona —Ia Idinide Cristo-Mesia —ihinanajaro.

¹⁷ Jehe, najaro imapi Jeso biridideni huapi taraha onideni eti ajima-jerajaro. Abarahao onidsama hua idsanapodsapi ajicca tamine Dabi oni bacco inadsapi biridideni 14 quinajari.

Nadsapi Dabi onidsama hua inapomadsapi Jeconia oni bacco inadsapi denima biridideni 14 quinajari. Aja Jeconia madidsapa

Isaraeri potemahideni todsepe toquejenadsa dsama Babironiahuaji iaccanibaqqui-manajari.

Dsotode Jeconia Babironiadsa madidsa pohua onidsama hua inapomadsapi ia Idinide Cristo-Mesia tossonahi bacco inadsapi denima 14 quinajari.

Jeso tossonahicca ima

Roca 2.1-7

¹⁸ Jesocristo tossonahijinecca imapi ajima napojaro: Jeso imeni Mariapi Dsodse icajihijine tahide imehidenipa jehe canirepojari. Mariapi maqquideje ssamo taccani. Dsodsepa pocca odsahuaji Maria iaccani-jeraccadsapi ponidsa huada-jaraccahi. Naraha ponipi jiajaro. Dio Corime huati tadsapa poni idsonidsa ejedeni nahatodsa huittidsajari. ¹⁹ Ponicca maqqui tojahijine Dsodsepa imari bica taja najari. Poni jiani qqui taraha ponidsa ima inassonarini-jine jipera tajari. Nadsapa pohua bodi: — Cacomehedsa onebona –najari. ²⁰ Pohua bodi nama naraha pocca huadadsa Diocca dodosse Pohua Atti ccaccaronade ahuatodsa huati tajari: —Dsodse, tiapi tamine Dabi potemahi tijani. Ticappina-jeraji. Maria jiaporaha ticajinijine oppinera tani. Aja, Maria poni idsonidsa ejedeni huittidsajaripa madijajine jarahi. Dio Corime huati tadsa ejedeni cajijaro –najari. ²¹ —Nidsa poni bedi tossonadsapa onipa “Jeso” tana. (Et-tidsapi: Ia Medsede madija Tonassajade, inajaro.) Najaripa pocca madija inassiajabaqquihitohui, poccadeni imasiri manaconi najidsohue

pohuadenidsa inassonari-jeranitohui –najari Dio Atti ccaccaronade atti.

²² Najaro ima huapima ima tojaponijinepi maittaccadsama Diopa Pohua Atti cacomerabote Isahiadsa huati tadsa Isahiana huati iqquimajaro. ²³ Pohua attipa:

—Ticattomama canaji. Dsohuato maqquideje ssamo taraha jiadsapi ejedeni cajinitohui. Poni bedidsapa: Emanohueo, quiquinanahitohui –napohui nade Isahia. (Emanohueo ettidsapi: Dio iadsa madihi, inajaro.)

²⁴ Nadsapa Dsodsedsa huati huati taha jicadsapa Dsodse nocco tojajari. Dio Atti ccaccaronade attidsa ibora tadsapa Maria icajijaro.

²⁵ Nadsapi pocca amoneje tojaraha poni idsonicca ejedeni tossona-jaraccadsapa ponidsa huada-jarajari. Poni bedi tossonadsapa Dsodse ejedeni oni hua inajari: —Jeso –najari.

2

Abadsico bedi tahimari nahatoqquiri napojarideni Jeso qquide jahijonajari

¹ Jesopa odsa panani onini Berenedsa tossonajari. Najaro odsapi Jodeahuaajicca dsamacca. Jeso tossonahicca huajanodsapa tamine Herode dsama Jodeacca madija cacahuade tojajari. Pohuapa odsa panani Jerosaredsa madijari. Nadsapa tamine Herode nahidsa madihi paja naccadsa dsama huaji tanicca madija maji ccajonahihuaji jahijonadsa Jerosaredsa bacco najonamanajari. Pohuadenipa abadsico bedi tahimari nahatoqquiri napojarideni. ² Jerosaredsa bacco

najonamanadsa attidenipa: —¿Nija? ¿Nejecohuaji Isaraeri potemahi aja jodiodenicca tamine tossonajaritta? —najonamanajari. —Iapi maji ccajonahihuaji imadidsa abadsico bedi dsati qqui icanade. Najaro imapi tamine deni tojjari tossonahitohui quinapojaricca ima tojjaro. Najari qquide jaijonajaro. Ipitodsa jassi inadsa pohuadsa: “Icca tamine” inanijine —quinajari.

³ Nadsapa tamine Herode najaro ima mittadsapa bodi tocasserajari. Pocca madija nahi Jerosaredsa madimanajarideni ima mittamanadsa naco bodideni cappinamanajari.

⁴ Nadsapa tamine Herodepa dada toqqumade tamedeni, jodiodenicca marinaja maridedeni naco inequeriqquihijine huahua inabaqquijari. Queriqquimanadsapa pohuadenidsa huati tajari: —Aji Dio Atti dsodo nanidsa ia Idinide Cristo-Mesia tossonahicca imapi ¿nejecoma napojarotte? ¿Nejecohuajina Cristo-Mesia tossonahitohui napojarotte? —nahi nade Herode.

⁵ Tamine Herodedsa ima ecomeramanajaro: —Jodeahuajicca odsa panani Berenedsana tossonahitohui. Najaro imapi Dio Atti cacomerabote Miqueo dsodo inapojararo. ⁶ Pohua atti ajama napojari:

“Berenecca ima huati onana. Jodeacca dsamahuaji odsa panani huapi taraha Berenepi ajimani toja-jerani.

Ima bicani deni tojanicca cajinitohui. Nahidsa tamine deni tojahicca tossonahitohui. Pohuapa occa madija Isaraeri potemahideni ecahuabaqquihitohui”

napohui nade Dio Atti cacomerabote –quinahi nade jodiodenicca marinaja maridedeni.

⁷ Herode najaro ima mittadsapa aja abadsico bedi tahimari nahatoqquiri napojaridenitohui cacomehedsa huahua inabaqquijari, poccadeni ima mittahijine. Jahijonadsapa pohuadenidsa huati tajari: —Aja abadsico bedi dsati qqui ticanamanajaripa ¿nejecoma nadsa cahatojaritta? –nahi nade. Nadsapa pohuadsa abadsico bedi tahimari ecomeramanadsa mit-tajari. ⁸ Nadsapa Herode Berenehuaji dosse iqquimabaqquijari: —Berenehuaji jai tijana. Nanihuaji ejedenitohui qqui taridsamanana. Bacco tiquinadsapa ohuadsa huati tanimanana. Ohua naqui pohua qquide occadsa opitodsa ohuittadsa pohuadsa: “Occa tamine” onanijine, onajaro –naraha maidsajari. Tamine ohuahadsa jipera tajari.

⁹⁻¹⁰ Herode atti mittamanadsapa jai tojajari. Jai toja, jai toja nanaja abadsico bedi aja qqui icanamanapojari pohuadeni tedsejema cahatopomajari. Cahatopomadsa abadsico bedi tahimari nahatoqquiri napojarideni huatidsemaneri najari. Pohuadeni tedsejema tohuaccadsa ejedeni tossonahicca odsadsa quehenacossajari.

¹¹ Nahidsa jai tojedsimadsapa ejedeni qqui, imeni Maria qqui toquinajari. Pohuadsa huatidsemanadsapa pohuadeni pitodsa jassi tadsa: —Tamine deni tojahi –quinajari. Pohuadeni dsepetaji baho bedeni bicaqquiri najaro itaboridsamanadsa poccadeni daniji ejedenidsa da inaqquimanajaro. Oro huatini ccara tanicca da quinajaro. Ahua majicone tohuessihi majo bica

tajari naco da quinajari. Ahua ohuaha oni mirra majicone majo ocassa tahicca naco da quinajari.

¹² Nadsa dsome nahidsa cahadijadsapa huada cajimanajari. Dio pohuadenidsa huati tajari: — Tamine Herodehuajipi jai tijani-jeraji. Pocca ima oppina tani –najari poccadeni huadadsa. Nama nadsapa poccadeni dsamahuaji jai tojanihijinepa Jerosarecca jahuihuaji jai tojani-jarahi. Jahui onihina jai tojanijari.

Dsama Ejitohuaji joppa icanamanajaricca ima

¹³ Nadsapa abadsico bedi tahimari nahato-qquiri napojarideni jai tojania jicahi. Dso-todepa Dsodse pocca huadadsa Diocca do-dosse Pohua Atti ccaccaronade ahuatodsa atti ajama najari: —Dsodse, nocco tijaji. Huassinaja aja ejedeni imeni tadsajani dsama Ejitohuaji tiaccabaqquijo. Tamine Herodecca dosseniji ejedenitohui qqui naridsamanabote nahi, inanadsoqqe-manahijine. Nani Ejitohuaji timadi-dsanapoccana. Nidsa tiadsa huati onapomadsana ticcanipomanijine bica tani –najari.

¹⁴ Nadsapa huassinaja nocco toquejenadsa: — Jina, jidapana dsome icadana –najari Dsodse. Nadsapa dsomeraha ejedeni imeni tadsajani Ejitocca jahui jai tojajari. ¹⁵ Ejitohuaji bacco toquinadsapa tamine Herode madicadsa nahidsa madimana-dsanapoccajari. Najaro imapi maittaccadsama Dio huati tapodsa Pohua Atti cacomerabote Osea dsodo inapojaropi ajima najaro: —Occa Ejedeni Ejitohuaji madiraha pohuatohui huahua onajaro –najari Dio Atti Oseajine dsodo nanidsa. Nadsapa tamine Herode dsoqqehi ima

mittamanadsana poccadeni dsamahuaji jahini-jari.

Herode ejedeni inajicaridsahijine dosse inabaqquiridsajari

¹⁶ Herode dsoqque-jaraccadsa ima ajima inanajaro. Aja abadsico bedi tahimari nahatoqquri napojaridenitohui madiraha pohuahuaaji jahini-jaradsapa bodi huatomajari: —Ohua icamaidsamanajaro -najari. Nadsapa paja huadirijari. Huadidsapa tamine dsati tossonajari dsori tajarahijine pocca madija dosse inabaqquijari: —Jari, Berenedsa madimanajarideni, Berene huajira tanidsa madiridsamanajarideni naco bedideni maqquideje bedi huajanorideni 2 najari, huajanorideni ajamanicca naco, najarideni huapima tinajicaridsamanahissa tajo -nahi nade Herode. Aja abadsico bedi dsati qqui icanamanapojaricca huajanodsa toctojaridsajarideni huapima jicaridsahijine.

¹⁷ Nama quinadsapa Isaraeri potemahidenicca ejedeni badsiraqquri najari inajicamanajarijine imehideni, imenideni oji oji quinajari. Najaro imapi pina maittaccadsama Dio Atti cacomerabote Jeremia dsodo inapojarossa najaro tojajaro. Isaraeri potemahidenicca ini maittaccadsama madipojaro onini Raqueo tahimarinidsa dsodo nanipi ajima najaro:

¹⁸ —Odsa panani Ramahuajicca dsamadsa oji imeni tojajaro. Raqueo potemanidenipi bedidenitohui oji oji quinajaro. Ponidenicca ojie naqui huatinideni ssonanijine jiperaqquri

najaro, bedidene jicaridsadsa -napohui nade Dio Atti Jeremiajine dsodo nanidsa.

¹⁹ Nadsapa dsotode tamine Herode dsoqquehi nattipa dsama Ejitohuaji Dio Atti ccacaronade Dsodse pocca huadadsa ahuatopomadsa huati tajari: ²⁰ —Dsodse, nocco tijaji. Aja ejedeni imeni tadsajani Isaraeri potemahidenicca dsamahuaji tiaccanibaqquijo. Ejedeni inanadsogque-manahijine tohui quinajaridenipa jicahi -nahi nade.

²¹ Nadsapa Dsodse nocco tojadsapa najoradsa Isaraeridenicca dsamahuaji ejedeni imeni tadsajani iaccanibaqquijari. ²² Nanihuaji bacco tanimanadsapa Dsodse ima mittajari: —Herode dsoqquedsapa pohua bedi onipa Aquelao najarina dsama Jodeacca tamine tojajari -quinajari. Najaricca ima naqui tabaccora tajaro, pina imehicca imassa nadsapi Dsodse nahihuaji madihijine cappinajari. Naraha pocca huadadsa Dio pohuadsa huati tajari: —Aji Jodeadsapi timadimana-jeraji -nahi nade. Nadsapa dsama arobeni Carireahuajina tojoppemanajari. ²³ Jai tojadsapa Carireahuaji bacco toquinajari. Nadsapa odsa panani Nasaretidsa madimanajari. Najaro imapi pina Dio Atti comeraqquri najaridene madija Idinide Cristo-Mesia tahimari huati toquinapojarissa najaro: —Pohuadsa: “Nasaretihujicca” quiquinanahitohui -quinapohui nade Dio Atti dsodo nanidsa.

3

Huano Baotistapa dsama huamonihuaji

*madija mari icanabaquijari**Maraco 1.1-8; Roca 3.1-9, 15-17; Huano 1.19-28*

¹ Huajano toccahi huapi tadsa madija oni Huanopa dsama arobeni onini Jodeacca huamoni ssono caji, siba caji tanihuaji madija maride tojajari. Pohnadsa: Baotista, quiquinana-jari. (Ettidsapi: Totopade, inajaro.) ² Mari mari ihicanabaquirdsa nadsapa ajama nanaridsa najari: —¡Ticcadeni imasiri tineboridsamanaji! ¡Diotohuira tidsanapomanaji! Diocca cacahue-hepi iadsa bacco najonabote nani –nanaja najari Huano.

³ Aji Huanocca imapi maittaccadsama Dio Atti cacomerabote Isahia dsodo inapojaro. Pohna atti ajama napojari:

—Nidsa dsama huamoni ssono caji, siba caji tanihuaji madijaripa
atti mohui tadsa madija huahua huahua ihinajonabaqqi nahitohui.

Pohna attipa: “¡Ia Medsede ccajonabote nahi!
¡Tinajoramanaji!

¡Pohna tedsejema jahui tijinedeni tobicapoji!
Najaroa aji tibodideni pohnatohui tinajoramanaji”

nanaja nahitohui dsama huamonihuaji madijaripa

–napohui nade Dio Atti Isahiajine dsodo nanidsa.

⁴ Nadsama Huanopa dsama huamonihuaji madsapa pocca eteropi camello cone ba nani ssequi nadsa huedsajari. Pocca ssoquepi bani etero. Pohna taparipa sese, dsamacca jidsi oquine najari.

⁵ Madija huapima Huano atti mitta-manahijine jahijonana canajaridenipa odsa panani Jerosarecca, Jodeacca dsamadsa madiridsamanajarideni, hueni Jordaohuaji madiridsamanajarideni naco bacco bacco quinajari. ⁶ Poccadeni imasiri Diodsa ecomeramanadsapi Huanopa hueni Jordaodsa topa topa ihidsanabaqqui najari.

⁷ Naraha dsotode madija huapi taha jahijonahi Huano qqui tajari. Pohnuadenipa Isaraeri potemahi jodiodeni mota marinaja onini pariseodsa jehe quinajarideni, mota marinaja onini sadoseodsa jehe quinajarideni totopa tohui quinadsa Huanohuaji jahijonajari. Naraha Huanopa pohnuadenidsa huati tajari: —iTiadenipi pina maccassa tiquinani. Ticcadeni imapi tabaccora tajaro! Tiadenipi tibodideni cacajiqquimera-jeraraha: “Huano ia topa todsanabaqquidsapa Diocca najidsohuedsa dsori icanirenitohui” ¿tiquinajaroqui? Naraha tibodideni cacajiqquimera-jeradsapi dsori ticanire-jeranitohui. ⁸ Naraha tettideni ajima tiquinadsana bica tani: “Imasiri onebona. Diotohuira obodi huahuatoma nanijine” tiquinadsapi tibodideni cacajiqquimeranicca ima ahuatō tanijine ima bicanira tinanamanaji, onajaro -najari Huano. ⁹ —Naraha tibodidenidsa ajima tiquinanitide: “Icca idipa Abarahaoja najari, Diopa ia tohuattajobaqquijarahitohui” titiquina naraha tiadeni ticamaidsanimanajaro. Diopa madijassa najarahi. Pohua jipa tadsapa aji siba huihwitteri naridsajarodsa naco Diopa Abarahao

potemahissa naha inahatoridsahijine pajirajari. Paji tiadenipi: “Abarahao potemahi iquejenani” tiquinaraha Diodsa iboraquuri tiquinejeradsapi tiadeni tohuattajo-bagquihitohui. ¹⁰ Nadsapi Diodsa iboraquuri tiquinejeradsa, ima bicani tinanamana-jeradsa naqui ticcadeni ima pina ahua tabaccora tajaricca imassa najaro. Paji, najari ahua ca cajine dsamipa najorahi. Ahua bono bica tajaradsapa ca tacaridsa tahi. Ca tacaridsadsapa bobottahuaji hua hua totodsima najari, diji tahijine –nahi nade Huano.

¹¹ —Ohuapi passodsa tiadeni topa odsan-abaquujaro, imasiri tinebomanadsa Diotohuira tiquinanica ima ahuato tanijine. Naraha madija dacorajari ccajonabote nahi. Ohuapi tahide mari mari onaporaha aja dsotodecca maride ccajonajarina deni tojajari. Najarina Dio Corime tibodidenidsa madihijine tiadenidsa inaridsahitohui. Puhuapa pahuadsa toquejenajarajaridenipa jororoni jiquejeranihuaji hua idsimabaquihijine pajirajari. Ohuapi ajimani ojani. Pina pocca medsessa onanijinepi opajirajerani. Puhua amoricca sadaria dsojode naqui opajira-jerani –nahi nade Huano.

¹² —Jehe, ccajonabote najaripa madija icattejidsa-bagquihijine. Pina madija aroso jidsadsa trigo huire tahijine qquero quissa, qquero quissa, qquero quissa inamacossajari. Nahi trigo etero, eppe, ede najaripa jojodedsa toccahijine. Nadsapa noccona ecahuajari pocca odsahuaji. Naraha trigo etero, eppe, ede najaripa diji tahijine bobottahuaji hua idsimahitohui. Najaria aja Diodsa iboraquuri

najarajaridenipa jororoni jiquejeranihuaji hua idsimabaqquihitohui. Najaro jororonipi ohuihuira tani -nahi nade Huano.

*Jeso totopa cajjaricca ima
Maraco 1.9-11; Roca 3.21-22*

¹³ Nadsapa Jeso dsama arobeni onini Carireadsa madiraha hueni Jordaohuaji qqquedsippajari. Huano madihihuaji bacco dsippadsapa Huanodsa: —Ohua topa tidsanaji -najari Jeso. ¹⁴ Naraha Huano attipa: —Ohuapi ajimani ojani. Tiana ohua topa tidsanani bica tani -najari.

¹⁵ Naraha Jesopa: —Epeje, nema nehe ohua topa tidsanaji. Ajijaropi Dio pocca dosseniji nema inanijine -najari Jeso. Nadsapa Huano jehe najari. ¹⁶ Nadsapa Jeso topa idsanajari. Jeso passodsa totehemadsa tocattamacossa nanaja meme tohuaba najaro. Dio Corime ahuato taha pina midsorissa naha ccaronajari. Ccaronadsa Jesodsa be tajari. ¹⁷ Nadsapa memehuaji atti mit-taronajari: —Ajaripa occa Ejedeni. Pohnadsa ohuati huana tajaro. Pocca ima bica tajarojine ohuatidsejaro -najari Dio.

4

*Jeso imasiri inananiijine Satana nattome
inaraha jehe najarajari*

Maraco 1.12-13; Roca 4.1-13

¹ Huano Jeso topa idsanaha jicadsapa Dio Corime Jeso iaqquemorajari, dsama huamoni

ssono caji, siba caji tanihuaji iaccajari. Nahihuaji pohua iaccajaripa imasiri totonanade Satanapa Jeso nattome inahijine. Satanapa Jeso imasiri inananiijine dissera tajari. ² Nadsama Jesopa huamonihuaji madidsapa jiperahi huada 40 naha madidsanapojari. Pohua jipa-jarahicca ssiaja 40, dsome 40 nadsapa pemihissa tajari. ³ Nadsapa Satana Jeso icamaidsahijine pohuadsa bacco tajari. Satana attipa: —Dio Bedi tijadsapi, jari, tijipaniijine ajijaro siba pan tojahijine huati tinaji –najari. ⁴ Naraha manaco Jeso Satanadsa huati tajari: —Dio Atti dsodo nanidsapi ajima najaro: “Damatapadsara imadini ojari-jerani. Abi Dio huati tahi imittajarocca ibodidsa tojadsapi pina ijipajarossa najaro. Najarojinena idacorani nadsapi imadijaro” nani Dio Atti dsodo nanipi –najari Jeso.

⁵ Nahi dsotode imasiri totonanade Satanapa Jeso odsa panani bicabote Jerosarehuaji iaccajari. Nanicca Diodsa dada toqquima tetepihuaji inanajari. ⁶ Nahidsa Satana Jesodsa huati tapomajari: —Jari, Dio Bedi tijadsapi joppa tinaronaneje, namihuaji tissona-jeranitohui –najari. —Aji Dio Atti dsodo nanidsapi ajima najaro:

“Diopa pocca dodosse tabaqqui memehuajicadsa huati tahitohui, tia ecahuamananiijine. Pohuadeni bijidsa tia dama ijidsamanadsapi temori naqui sibadsa cabiquera-jeranitohui” nani Dio Atti dsodo nanipi

–najari Satana Jesodsa. ⁷ Naraha manaco Jeso huati tapomajari: —Jehe, Dio Atti dsodo nani nema naraha Pohua Atti dsodo nani onhipi ajima najaro: “Tia Medsede Dio nattome ta-

jarajo. Tettidsa: ‘Dio ohuacatamana’ tejeraji” nani Dio Attipi –najari Jeso.

⁸ Nahi dsotode Satanapa ssono imeni huaji tanihuaji Jeso iaqquemorajari. Nahihuaji bacco toquinadsa Satanajine dsama huapima Jesodsa ahuato inanaridsajaro. Dsama huapima bica tanicca, odsa panani huapima bica tanicca Jeso dsopi icanaridsajari Satanapa. ⁹ Nadsapa Satana Jesodsa huati tapomajari: —¡Qqui taneje! Ajijaro dsama huapimapi tiadsa da onanijine. Jehe, obacchohuaji tipitodsa tittadsa ohuadsa tetidsedsa: “Occa tamine” taji. Ohuadsa nema tadsapi ajijaro huapimapi ticca tojanijine, onajaro –najari Satana atti. ¹⁰ Naraha manaco Jeso Satanadsa huati tajari: —¡Satana, ajicca ticcaniji! Epejena. Ohuapi tiadsa ohuatidsena onejerani. Dio Atti dsodo nanidsapi ajima najaro: “Ia Medsede Dio Pohuadsara tetidsemanani ojari dsanapoji. Pohua Attidsara iboraqquri tiquinaji” nani Dio Attipi –najari Jeso.

¹¹ Nadsapa Satana toccanijari. Nanaja Diocca dodosse tabaqqupa najoramanapoja nadsa Jeso acco icamamanahijine jahironajari.

Jesopa Carireahuaji maride idimapojari

Maraco 1.14-15; Roca 4.14-15

¹² Dsotode Jesopa —Huano Baotista toponi cocorodsa coro idsimamanahi –quinahi ima mittadsapa dsama arobeni onini Carireahuaji toccanijari. ¹³ Naraha Jesopa odsa panani Nasaretidsa tomadinipoma-jarajari. Odsa panani Capernaohujina madihijine toccajari, nahi Carireacca coridsa inidihuaji. Jesopa

nahihuaji madihijine toccadsapa Isaraeri bedi Dsaborona potemahidenicca dsamabotedsa ccaridsa, Isaraeri bedi Netari potemahidenicca dsamabotedsa naco ccaridsa najari. ¹⁴ Jeso nahihuaji madihijinecca imapi maittaccadsama Dio Atti cacomerabote Isahia dsodo inapojaro. Pohua attipa:

¹⁵ —Dsaborona potemahidenicca dsamabotehuaji, Netari potemahidenicca dsamabotehuaji naqui ima bicani cajini.

Ia Idinide nahihuaji madimanajaridenidsa bacco tajari, pina ssiajanissa najari.

Nahihuajipa jodio quejena-jarajarideni caji tahi. Coridsa huapicca dsama, hueni Jordao maji toccahihuajicca dsama onini Carireadsapa Diodsa ssamoqquiri naha madimanajari.

¹⁶ Dsidsinidsa madimanadsapa dsoqqehe nop-pineni cappinamanaraha ssiajani dsati pohuadenidsa tossiajaridsadsapi

Diojine madija tocassiejerahijine tahimarini ahuato inananitohui

—napohui nade Dio Atti Isahiajine dsodo nanidsa.

¹⁷ Nahihuaji Jeso bacco tadsana Dio Atti maride tahide idimapojari. Madija mari mari ihicanabaqqui nadsa pohua attipa: —Ticcadeni ima Diodsa tecomeramanadsa ticcadeni imasiri tinebomanaji. Diotohuira tidsanapomanaji. Diocca cacahuehepi iadsa bacco najonabote nani —nanaridsa najari Jeso.

Jesopa aba cocorodedeni 4 quinaha huahua inabaqquijari

Maraco 1.16-20; Roca 5.1-11

18 Jeso Carireacca coridsa inidi toccabacos-sadsa madija pamaha qqui inabaqquijari: Ssino pohua oni ohuaha Pedro, pohua ohuaha Adiri tedseje. Pihuadenipa aba cocorodedeni. Aba corode toquejenaraha Jeso bacco najonajari. 19 Pihuadenidsa huati tajari: —Jina, ohuadsa ticadaridsaji, ohuatimade tiquejenadsapi tiadeni onahattabaqquinijine. Tahidepi abadsa tidsepedeni ijimanaporaha jidapapi madija ohuadsa toquejenahijinena tidsepedeni ijimananitohui, onajaro -nahi nade Jeso. 20 Najaro ima mit-tamananaja poccadeni tajapa icanebomanadsa Jesodsa tohuedajari.

21 Nadsapa denima jai tojabacossanaja Jesopa madija ohuaha pohua imecote tedseje qqui inabaqquijari. Najaridenipa Sebedeo bedideni Satiaco, Huano quinajari. Poccadeni abi quinadsa canoadsa jassi dsajari. Tajapa ssequinimade toquejenaraha Satiaco, Huano tedseje Jeso huahua inabaqquijari. 22 Najarideni naco amadsati poccadeni canoa icanebomana, poccadeni abi inebomana nadsa Jesodsa tohuedajari.

Jesopa madija huapi taha mari icanabaqquijari

23 Jesopa Carireahuaji ccaridsa ccaridsa naridsajari. Nani Isaraeri potemahi jodiodenicca Dio Atti mamari onihi onihi naridsanihuaji mari mari nanaridsa najari. Pihuapa Diocca cacahuehecca ima bicani ehecomeraridsa najaro. Comaqquri najarideni naco comani onihi, onihi cajiridsamanaraha huapima ihinanomi-ridsabaqqui najari. 24 Pocca imapi

dsama Siria nemanehehuaji madiridsamana-
jarideni naco mittaridsamanadsapa poccadeni
dsama huaji taraha comaqquiri najarideni
eheccajona-baqquimana najari. Dsamacoma
cajimanajarideni, isso sirideni, biji sirideni,
comani onihi onihi cajimanajarideni eheccajona-
baqquimana nadsa huapima Jeso ihinanomi-
ridsabaqqui najari. Madija bodidenidsa
Satanacca dodosse tabaqqui tocorimedeni
madidsamanajarideni, aja huatiajojo comani
cajimanajarideni, aja madija idedeni tone
biqueradsa issodeni ssomi toquejenajarideni
naco eheccajona-baqquimana nadsa Jeso
ihinanomibaqqui najari. ²⁵ Nani Carireahuajicca
madiridsamanajarideni mota, dsama arobeni
onini Decaporihuajicca madiridsamanajarideni
mota, odsa panani Jerosarecca madimanajari-
deni mota, dsama arobeni onini Jodeahuajicca
madiridsamanajarideni mota, hueni Jordao maji
ccajonahihuaji madiridsamanajarideni mota
naco huapima Jesotohui disseraqquri nadsa
jahijonana canajari.

5

Ssonohuaji Jeso mari icanabaqquijaricca ima

¹ Jesopa madija huapima pohuadsa
queriqquihi qqui tadsapa ssonohuaji
toqqemorajari. Nahidsana maride huittarijari.
Jesocca mamari tabaqquipa pohuahuaji huajijira
canajari. ² Nadsapa mari icanabaqquijari.

Diopa madijadsa ima bicani inanajarrocca ima
Roca 6.20-23

3 —Tiadeni motta tibodideni tobicanijine tipajiramana-jerani nahatoqquiri tiquinadsapi Diopa tiadenidsa ima bicani inanajaro. Diocca cacahuehe tiadenidsa tojanitohui.

4 —Tibodideni huanacossadsa oji tiquinaraha Diopa tiadenidsa ima bicani inanajaro. Dio tibodideni acco camahitohui.

5 —Tiadenidsa ima tabaccora tanicca bacco taraha tedimana-jeradsa tibodideni: “Nidsa Dio ohua acco camahitohui” tiquinadsapi Diopa tiadenidsa ima bicani inanajaro. Nidsa Diójine dsama dsati tojadsa najaropi ticcadeni cacahuehe tojanitohui.

6 —Tibodidenipi pina: “Occa ima Diodsa pajiranissa taccaraho, Pohua Attissa onananijine disera onana” tiquinadsapi Diopa tiadenidsa ima bicani inanajaro. Tibodidenidsa jipa tinajarocca Dio tiadenidsa inanaitohui.

7 —Tiadenipi madijadsa tetideni huanacquiri nadsa pohuadenidsa ima tojadsapi pohuadeni acco ticamabaquimanadsapa Diopa tiadenidsa ima bicani inanajaro. Diopa tiadenidsa naco huati huana tahitohui, tiadeni acco tocamabaquihitohui.

8 —Tibodidenidsa Diotohura tiquinadsapi ticcadeni ima quejema-jeradsapi Diopa tiadenidsa ima bicani inanajaro. Jidapapa Dio tiadenidsa tojidserajari. Nidsa memehujapa Dio Pohua qqui tiquinahitohui.

9 —Madija ohuaha tijinedeni cajoneradsapa Diopa tiadenidsa ima bicani inanajaro. Diopa tiadenidsa: “Occa ejedenideni” najari.

10 —Diodsa disseraqquri tiquinadsa Pohua Attissa tinanamanadsapi jehe quina-jarajarideni tiadeni tonajidso-baqquimanaraha Diopa tiadenidsa ima bicani inanajaro. Diocca cacahuehe tiadenidsa tojanitohui.

11 —Occa madija tiquejenajarojinepi madija tiadeni totamasso-baqquimanadsa, tiadeni tonajidso-baqquimanadsa, ticcadeni ima totabaccoranijine maidsa maidsa quinadsa naco Diopa tiadenidsa ima bicani inanajaro.

12 Tetidsemanaji. “Epejeni bica tani” tiquinaji. Memehuaiji bacco tiquinadsapi Diocca daniji bicabote ticajimananitohui. Maittaccadsama naco Diodsa jiperaqquri najaridenipa aja Dio Atti cacomeraqquri najarideni inajidso-baqquimanaja najonapohui najari -nahi nade Jeso.

Saho tahimarini, jojororo tahimari

Maraco 9.50; Roca 14.34-35

13 —Tiadeni aji ohuadsa jehe tiquinajaropi pina sahocca imassa tiquinajaro. Sahopi bani bica tahijine. Aji tiadenipi pina sahossa tiquinajaro, ajijaro dsamacca madija tinanabicabaqquimanahijine. Saho ajiboni amossi nadsapi ajiboni cajipomanijine ssamo tani. Nadsapi tiadeni naqui ajijaro dsamacca madijadsa ima bicani tinanamanaridsanijine nebomana tiquinejeraji Ticcadeni jeheniji ponima toja-jerana. Saho ponima tojadsapi madija coro quinadsa madijajine ttai ttai toja tani.

14 —Tiadeni aji ohuadsa jehe tiquinajaropi pina ajijaro dsamacca ssiajanissa tiquinajaro.

Ossiejene ticajimanadsapi dsama huapimacca madijadsa otahimari tijinedeni ahuatoridsajaro. Tissiejenedeni ahuato tadsapi pina odsapanani ssono tetepihuaji ahuato tajarossanajaro. Ssonocca odsapananipi najimanijine ssamo tani. ¹⁵ Jojororo naco toquehessidsapa icanajimahijine jarahi. Sspotodsa bococanahijine jarahi. Nadsa jojororo toquehessidsapa aja pohua cacahittari nahidsana cacahittari najari, nahi madija odsa bodihuaji madimanajarideni huapima ssiajani cajimanahijine. ¹⁶ Tissiejenedenipi pina najaro ssiajanissa tiquinajaro, madija huapimadsa tossiajabacquinjine. Ima bicani titinamana najaro, madija huapima qqui toquinahijine. Nema tinamanadsapi Abi Dio memehuaji madijaridsa pohuadsa huatidsemanadsa: “Diopa bica tahi” quinahijine –nahi nade Jeso.

Jesocca marinajapi: —Dio Atti dsodo nanicca marinaja huapima onapajiranissa tanitohui –najari

¹⁷ Jesopa denima mari icanabaqquidsapa pohua atti ajama najari: —Tiadenipi: “Jesopa Moisesicca marinaja jicanijine ccajonajari” tiquinejeraji. Tettideni onihi naqui: “Jesopa maittaccadsama Dio Atti cacomeraqquri najaridenijine dsodo nani naqui inajicanijine” tiquinejeraji. Ohuapi najaro marinaja huapima pajiranissa tanijine occajonajaro. ¹⁸ Ohuapi pajisara tiadenidsa huati onajaro. Aji meme, nami jiquejeraccadsa Moisesicca marinajapi nebojeranitohui. Meme, nami jicadsapi Dio Atti dsodo

nanicca marinaja huapima pajiranissa tanitohui. Tohuatti ojarie dsori teje cama-jeranitohui. ¹⁹ Nadsama madijadenipa Dio Atti ojariedsa iboqquiri nadsapa imasiri cajimanajari. Madija ibo tajari pohua tesse tohuibohuijine mari icanajari attipa: “Diocca dosseniji motapi najo tani, tineboji” nanaja nadsapa najaripa Diocca cacahuehedsa ajamani tojahitohui. Naraha madija ohuaha Diocca dosseniji huapimadsa ibora tajaripa pohua tessedsa: “Diocca dosseniji huapimadsa ibora tinaji” nanaja nadsapa najarina Diocca cacahuehedsa deni tojahitohui. ²⁰ Tiadenidsa huati onajaro: Diocca cacahuehedsa tiquejenanijinepi Dio Pohua jipa tajaricca tinanamanadsana pocca cacahuehedsa tiquejenanijine tipajiramanani. Aja jodiodenicca marinaja maridedeni, marinaja onini pariseodsa jehe quinajarideni tedsejepa Diocca dosseniji cacahuade disseraqqquiri najari. Tiadeni naqui pina najarideni disseraqqquiri najarissa tiquinana. Naraha tiadenipi denima tinapajiramananissa tana. Nema tiquinadsapi Diocca cacahuehedsa tiquejenanitohui, onajaro -nahi nade Jeso.

Jesocca marinajapi: —Huadiepi pina ijinedeni ahuamanahicca imassa najaro -najari

Roca 12.57-59

²¹ —Ticcadeni ididenicca marinaja timittamanajonajaropi ajima najaro: “Madijapa tinanadsoqqque-jarajo. Madija tinanadsoqqquedsapa ima cacattemade atti tiadsa: ‘Manaco tidsoqqqueji’ nahitohui” quiquinanade. ²² Naraha tiadenidsa huati

onana: Timecotedsa titessedsa naqui tedidsapi ima ticajinitohui. Ima cacatemahuaji: “Ticca imapi tabaccora tani” quinahitohui. Ticca huadie tinebo-jeradsa timecotedsa denima tatamasso tadsapi ima cacatemadedeni deni toquejenajaridenipa tiadsa ima inassonarimananitohui. Ticca huadie deni tojadsapi timecotedsa tabaccorehema tatamasso taraha ticca imana denima tabaccora tajaro. Nidsa ticca imapi Dio mittahitohui. Ticca ima nema nadsapi jororoni jiquejeranihuaji tijanitohui.

²³ —Nadsama ticca daniji: “Diodsa da onana” tiquinadsa naqui Diodsa da tahijinecca huahuanarihuaji ticca daniji tiaccaraha aji timecotedsa ima tinanapojaro tibodi huato-dsanapoccani. ²⁴ Nadsapi ticca daniji dsojo tidsimaraha Diodsa da tahijinecca huahuanaridsa hua tari-jaraccadsama nahidsa tinebocajo. Nadsapi timecotedsa ticcaji, ticca ima ticatemamananijine. Ticca ima ticatemamanadsa ticajonerapomadsana Diodsa da tahijinecca huahuanarihuaji ticcanipomaji. Nadsana ticca daniji Diodsa da tinahijine hua tarihi bica tahi.

²⁵ —Nadsama madija ohuahadsa ima tinanadsa naqui pohua attipa: “Tia ohuaccana ima cacatemahuaji” nadsa naco tahide tia tohuacca-jaraccadsama pohua tedseje ticcadeni ima ticatemamanapoji. Pohua huati tinassonapojo, nahi taminehuaji tia tohuacca-jarahijine. Ticcadeni ima ticatemamanapojeradsapi ima cacatemahuaji bacco tinadsapi

ima tinanajaro manaconi todsepe tijanitohui. Toponi cocorohuaji tia coro idsimamananitohui. ²⁶ Pajissara tiadsa huati onajaro. Nani toponi cocorohuaji timadidsapi amadsati tiqquena-geranitohui. Ima tinanajaro manaconi nemaneha tinajicanissa tadsana tiqquenanitohui –nahi nade Jeso.

Jesocca marinajapi: —Tibodidenidsa huananehe tohui tiqqinejeraji –najari

²⁷ —Ticcadeni ididenicca marinaja timittamanajonajaropi ajima najaro: “Amoneje ticajidsapi amoneje onhipi tija-geraji. Maqquideje ticajidsapi maqquideje ohuaha tinaja tajarajo” quiquinanade. ²⁸ Naraha tiadenidsa huati onana: Madijapa amoneje onihi qqui tadsa tohuini inacomadsapi pohua bodidsa imasiri inanajaro. Pina amoneje ijajarossa najaro –nahi nade Jeso.

²⁹ —Nadsama imasiri tinana-geranijinepi tibodidsa daco tijiradsa poni taji. Poni tejeradsapi ima oppina tani tiadsa ssonarinitohui. Nadsama pina tinocco nahatoniccadsa tohuini tanicca qqui tinadsapi najarodsa imasiri tinananijine tohuini taraha daco tijiradsa poni taji, imasiri tinana-geranijine. Nema tadsapi pina tinocco nahatonicca huari, joca, jeo, coro tinajarossa najaro, imasiri tinana-geranijine. Tinocco ojarie amossi naraha jepeje! tessirema tissijanitohui. Jororoni jiquegeranihuaji tija-geranitohui. ³⁰ Nadsama pina tidsepe nahatoniccadsa imasiri tinanabote naraha daco tijiradsa poni taji, imasiri tinana-geranijine. Nema tadsapi pina

tidsepe nahatonicca ca ticajidsajarossa najaro. Tidsepe cajarie amossi canaraha jepeje! tes-sirema tissiajanitohui. Jororoni jiquejeranihuaji tija-jezanitohui –nahi nade Jeso.

Jesocca marinajapi: —Ticca amoneje nebo-mana tejeraji –najari

Mateo 19.9; Maraco 10.11-12; Roca 16.18

³¹ —Ticcadeni ididenicca marinaja timittamanajonajaropi ajima najaro: “Maqquideje: Occa amoneje onebona nadsapa tahide nebohuecca papeo dsodo inadsa ponidsa da inadsa inebodsapi pohuadsa ima nohuerani” quiquinanade. ³² Naraha ohuattipi ajima onajaro: Ticca amoneje tinebodsapi imasiri tinanajaro. Ticca amoneje tinebodsapa maqquideje ohuaha icajidsapa tijine poni naqui imasiri inanajaro. Ponicca maqqi icajidsati naco imasiri inanajaro. Diocca dosseniji naqui ecahuamana-jejerajaro. Nadsama ohuattipi: ¡Paji! Ticcadeni amoneje nebomana tejeraji, onajaro. Naraha ticca amoneje maqquideje ohuaha inajadsana “Onebona” tadsa tinebodsapi tiadsa ima nohuerani. Ticca amoneje maqquideje ohuaha inajadsapa poni ponijine imasiri inanajaro. Nadsana tineboni oppinera tani –nahi nade Jeso.

Jesocca marinajapi: —Pajissa tiquinadsapi pajissehera pajissa tiquinaji –najari

³³ —Ticcadeni ididenicca marinaja timittamanajonajaropi ajima najaro: “Diodsa: ‘Pajissa ajima onanana’ tadsapi timaidsa-jejeradsa aji huati tinajarossa tinanaji” quiquinanade.

³⁴ Naraha ohuattipi ajima onajaro: “Pajissa

ajima onanana” tadsapi ticca pajissehepi tohuatti onihi tadsajani huati tina tejeraji. Madijapa maidsamanadsa: “Pajissa huati onajaro” quinadsapa tohuatti onihi tadsajani inatasaqquidsa pina pajissehessa najaro huati toquinaraha maidsamanajari. Pohuadeni attissa inanamana-jeradsa: “Oppinera tani, Dio onidsa huati onapo-jerade” quinaraha Diopa attideni mittajari. Ajana madija attidenipa: “Occa imapi pajissa, memehuaajicca nahato tahi” quinahipa bica tejerani. Memehuaajipi Diocca huihuittari. Diopa mittahi. ³⁵ Madija ohuaha attidenipa: “Occa imapi pajissa, ajijaro namipi nahato tani” quinadsa naco bica tejerani. Namipi Dio amori cabarihijinecca huihuittari bedenissa najaro. Diopa mittahi. Madija ohuaha attideni onihi naqui: “Occa imapi pajissa, Jerosarepi nahato tani” quinadsa naco bica tejerani. Jerosarepi Diocca Cattaniji, tamine deni tojahicca odsa panani. ³⁶ Madija ohuaha attideni naco: “Occa imapi pajissa, occa nahatohuema huati onajaro” quinaraha pohuadeni attidsa tatideni amadsati tosohuehue nanijinepi ssamo tani. Pohuadeni tatideni amadsati tonopo-po nanijine naqui ssamo tani. ³⁷ Nadsama tiadenipi pajissa tiquinadsa pajissara: “Jehe, pajissa” tiquinaji. Naraha poni tiquinadsa naqui “Jehe, poni” tiquinaji. ¡Epeje! Nema najarora huati tiquinanijine bica tani. Naraha tettidenipi tohuatti onihi tadsajani tinatasaqquimanadsapi bica tejerani. Najaropi pina mamaiadsadeni attidenissa najaro –nahi nade Jeso.

*Jesocca marinajapi: —“Manaco, manaco”
tiquinejerana –najari*

Roca 6.29-30

³⁸ —Ticcadeni ididenicca marinaja timittamanajonajaropi ajima najaro: “Madija ohuahajine tinocco sia tadsapi manaco pohua nocco sia tinanadsapa bica tani. Tino naqui. Madija ohuahajine tino jai tocanadsapi manaco pohua ino jai ticananadsa bica tani” quiquinanade. Manaco manacopi nama najonamanajari. ³⁹ Naraha ohuattipi tiadenidsa ajima onajaro: madijapa tiadenidsa tabaccorehe inanadsapi “Manaco” tiquinejeraji. Madija tipano idanidsa naco “Ohuaccone manaco odana” tiquinejerana, onajaro. ⁴⁰ Madija attipa: “Ohuadsa ima tinanani” nadsa ima cattedehuaji tia tohuaccadsa tamine attipa: “Ima tinanajaro manaconi pohuadsa titetepicca da tinaji” nadsapa pohuadsa da tinaji. Titetepicca onihi ssirinijine huatini ccara taraha najaro naqui nema nehe pohuadsa da tinaji, onajaro. ⁴¹ Nadsama madija naco benehi huaji tani toccahijine tiadsa huati tadsapa: “Jari, ohua acco ticamaji. Ajicca odsa onihidsa ohua tineboji” nadsapa pohua attissa tinanaji. Pohua tinebohuihuaji tineboraha denima pohua accode ticcanijine bica tani, onajaro. ⁴² Nadsama madija tiadsa: “Jari, ohuadsa manaconi jirehe da taji” nadsapa pohuadsa da tinaji. Madija ohuaha atti naco: “Pohuama ohuadsa da taccajo. Nidsa tiadsa da onanihijine” nadsapi teccocco-jarajo. Pohuadsa da tinaccajo, onajaro –nahi nade Jeso.

Jesocca marinajapi: —Tiadeni huadidedeni-raha pohuadenidsa tetideni huanacquiri nana-najari

Roca 6.27-28, 32-36

⁴³ —Moisesicca marinaja timittamanajonajaropi ajima najaro: “Titessedenidsa tetideni huanacquiri nana” quiquinanade. Ticcadeni ididenicca marinaja timittamanajonajaro naqui: “Tiadeni huadidedenipa manaco tica hadibaqquijo” quiquinanajari. ⁴⁴ Naraha ohuattipi ajima onajaro: Tiadeni huadidedenidsa naqui pina tetideni huanacquiri naji. Tiadeni najidsodedenipa Dio pohuadeni bodi acco icamabaqquihijine Diodsa huati huati tiquinana, onajaro. ⁴⁵ Nadsana tiadenipi Abi Diocca ejedeni tiquejenani ahuato taniijine. Dio memehuaji madijaripa bica tajari. Madija huapimadsa huati huana tajari. Bicaqquri najaridenidsa huati huana tajari, tabaccoraqquri najaridenidsa naco huati huana tajari. Dio pocca nahatohue majipa Pohuadsa jehe quinajarideni, Pohua Attidsa iboqquri najarideni huapimadsa tossiajabaqquijari. Pocca nahatohue passo naqui Dio Pohujine huapimadsa caji taridsajaro. ⁴⁶ Tiadenidsa ohuatti ajima najaro: Madija tiadenidsa huatideni huanacquiri najaridenidsara tetideni huanacquiri nani ojari nadsapi pina madija huapimacca imassa tinanamanajaro. Najarossa tinanamanadsapi nidsa memehuaji Dio tiadenidsa: “Jehe bicaqquri tiquinani” najarahitohui. Ajana, imasiri cajimanajarideni pina romanodenicca

taminecca dosseniji dsiniro nanaccadedenipa aja pohuadenidsa huatideni huanacquiri najaridenidsara huatideni huanacquiri nahi ojari najari. Paji, pohuadenissa tiquinejerana. Tiadenipi tohuati huanehe denima bica tanicca ticajimanadsana bica tani. ⁴⁷ Nadsama tiadenipi ticcadeni madijadsa tetidsemanadsa: “¿Nija, bica tinaqui?” tiquinaraha madija ohuahadsa: “¿Nija, bica tinaqui?” tiquinejeradsa pina madija ohuahadenicca madiessa tiquinajaro. Ajana, Diodsa jehe quina-jarajarideni poccadeni madijadsa: “¿Nija, bica tinaqui?” nanaridsamana naraha noccodeni jidsa tajaridsapa: “¿Nija, bica tinaqui?” quina-jarahi. Paji, tiadenipi pohuadenissa tiquinejerana. ⁴⁸ Ticcadeni Abi Dio memehuaji madijaripa pocca tohuati huanehe pajiranissa tajaro. Tiadeni naqui tinapajiramananissa taji, pina ticcadeni Abi Diocca tohuati huanehessa tinanamanana, onajaro -nahi nade Jeso.

6

Jesocca marinajapi: —Dio Pohuadsa ima bicani tinanamananijinepi ajima tiquinani bica tani -najari

¹ —Pajissara Dio Pohuadsa tidsepedeni iji-manadsa ima bicani tinanamanadsapi madija qqui toquinahijinera tidsepedeni ijimana tejeraji. Madija tiadeni qqui toquinadsa attidenipa: “A, tijinedeni bica tani. Bicaacquiri tiquinani” quinahitohuira timadimana tejeraji. Paji, attideni nama quinahitohuira timadimanadsapi Abi Dio memehuaji madijaripa najaro ima nahato

tapoja najari. Nidsa dsotode pohua baccohuaji tidomodeni huadsapi: “Tijinedeni bica tani. Bicaqquiri tiquinani” najarahitohui. Pocca daniji bicabote naqui tiadenidsa da inejeranitohui, onajaro –nahi nade Jeso.

² —Nadsama cappiramanajaridenidsa manaconi jirehe da tinabaqquini jinepi pohuadenidsa teti huana tadsa manaconi jirehe da tinabaqquini bica tani. Naraha madija tijine bica tani qqui toquinadsa: “A, bica tahi. Pohuapa cappiramanajaridenidsa manaconi jirehe da da najari” quinahijine tohuini tadsapi bica tejerani, onajaro. Attideni nama quinahi tohuini tadsapi pina maidsajidede rabotedenissa tajaro. Puhuadeni naco cappiramanajaridenidsa da da quinaraha huatideni huanaqquiri najarajari. Puhuadenipa madija mittamanahijine jodiodenicca Dio Atti mamarihuaji huati huati toquinajari, amossinihuaji naco huati huati toquinajari. Puhuadeni poccadeni imaraha: “Ijine bica tani, bicaqquiri inani” quiquinanajari. Madija ohuahadeni attidenipa: “¡Pajissa! Bicaqquiri tiquinani” quinahitohuira madimanajari. Naraha ohuapi pajissara tiadenidsa huati onajaro: Najaridenipa tahide tohuini quinahicca cajimanapodsapa nidsa dsotode Dio Pohua baccohuaji domo huadsa najaridenidsa Diopa: “Jehe, epejeni. Bicaqquiri tiquinani” najarahitohui. Pocca daniji bicabote naqui da inejeranitohui, onajaro. ³ Naraha tiapi cappiramanajaridenidsa da tinanijinepi ticca ima tecomeraridsa tejeraji. Titesse bica tajaridsa naco ticca ima huati tina-jeraji, onajaro. ⁴ Ajina,

cappiramanajaridenidsa da tinanijinepi madija ohuahadeni qqui toquina-jaradsana da tinani bica tani, onajaro. Nema tadsapi madija ohuahadeni ticca daniji nahatoqquiri najararaha Abi Diona nahato tahi. Nidsa dsotode Dio Pohua baccohuaji tedsa tia catidsedsapa: “Jehe, epejeni. Bica tinani” nahitohui. Pocca daniji bicabote naqui tiadsa da inanitohui, onajaro -nahi nade Jeso.

Jesocca marinajapi: —Diodsa huati tiquinani-jinepi ajima tiquinani bica tani -najari

Roca 11.2-4

⁵ —Abi Diodsa huati tiquinanjine naqui pina maidsajidede rabotedenissa tiquinejeraji, onajaro. Najaridenipa Diodsa huatide toquejenadsapa pina madija Diodsa disseraqqquiri najarissa quinaraha maidsamanajari. Nadsa najarideni nama quiquinanajaridenipa jodiodenicca Dio Atti mamarihuaji domo huedsadsa, amossinihuaji domo huadsa naco madija ohuahadeni mittamanahijine Diodsa huatide totoquejena najari. Madija ohuahadeni attidenipa: “A, Diodsa huatide disseraqqquiri nahi” quinahitohuira mamadimana najari. Noccodeni jo najonahi quinahitohuira madimanajari. Nadsama ohuapi pajissara tiadenidsa huati onajaro: Najaridenipa tahide tohuini quinahicca cajimanapodsapa nidsa dsotode Dio Pohua baccohuaji domo huadsa najaridenidsa Diopa: “Jehe, epejeni. Bicaqqquiri tiquinani” najarahitohui. Pocca daniji bicabote naqui da inejeranitohui, onajaro. ⁶ Naraha tiapi Abi Diodsa huati tinanijinepi “Ohua icattaqqquimana-jerana” tadsa ticca

odsa bodihuaji tiqquedsima, noccobiji ticahacossa nadsa tia motta Diodsa huati tinaji. Nema tadsapi madija ohuahadeni ticca huatinaja mittamana-jararaha Abi Diona mittahi. Nidsa dsotode Dio Pohua baccohuaji tedsa tia catidsed-sapa: “Jehe, epejeni. Bica tinani” nahitohui. Pocca daniji bicabote naqui tiadsa da inanitohui, onajaro –nahi nade Jeso.

⁷ —Diodsa huatide tijadsa naqui ticca huatinaja huati tinadsapi huati tinajaro, huati timanipomajaro, huati timanipomajaro tejeraji, onajaro. Ajana, Diodsa toquejena-jarajaridenipa nama nama quiquinanjari. Tohuini quinahicca tohui pohuadeni cacahuade huatide toquejenadsapa huati toquinajari, huati nimanimana-pomajari, huati nimanimana-pomajari quiquinanjari. “Nema inadsa etti mittahijine” quiquinanaraha pohuama huati huati toquinajari. ⁸ Naraha tiadenipi pina pohuadenissa tiquinejerana. Diodsa ponima huati huati tiquinejerana, onajaro. Ajina, ticappiramananicca huapima Dio Pohuadsa huati tiquinejeraccadsama Pohua bodipa nahato tapohui, onajaro –nahi nade Jeso.

Diodsa huati huati inanijinecca ima

Maraco 11.25-26; Roca 11.1-4

⁹ —Nadsama Diodsa huatide tiquejenanijinepi tettidenipi ajima tiquinaji:

“Jehe Abi Dio, memehuaji timadijaro, Tiadsa iquejenajaropi ticca madija iquejenajaro. Tiapi nahatojide tijirani ojari tani. ¡Bica

tinani! Madija huapima: ‘¡Dio, Tiapi deni tijani!’ quinana, inajaro.

10 Ticca cacahuehe huapimadsa tinanaridsana, inajaro. Pina memehuaji Tiadsa madimanajarideni huapima Tettidsa iboraqquiri dsadsanapomana najarissa quinahijine aji namihuaji imadijaro ia huapima naqui Tettidsa iboraqquiri inana, inajaro.

11 Itapari naco huada huajijiradsa iadsa da da tajo.

12 Madija iadsa tabaccorehe inanamanadsa poccadeni tabaccoreheda: ‘Epejena, huadi onejerani’ inadsapi manaco icca tabaccorehe epeje tinanaji, Abi Dio. Icca tabaccorehe manaconi najidsohue iadsa tinanajeraji, inajaro.

13 Imasiritohui ibodi huatodsa naqui najaro tohuini inejeranijine ia acco ticamabaqquiji, imasiri inana-jeranijine, inajaro. Tabaccorehe jinede Satana pohuahuaaji ia joca todsimanibaqquijarahijine ia tecahuabaqquinissa taji, inajaro.

[Tiana ia huapima tecahuabaqqui-dsanapojaro. ¡Daco tijirani! ¡Bica tinani! ihidsanapo najaro.] Epejeni.”

14 Nadsama Jesopa pohuadenidsa denima huati tajari: —Jehe, ajina madija tiadsa ima inatabaccoradsa naqui tiapi: “Najaro imadsa ohuati ajimana. Pohuadsa ohuadi-jerana” taji. Nema tadsana ticca Abi memehuaji madijari ticca imasiridsa huati ajamahitohui. 15 Naraha

madija ohuahacca imadsa epeje tejeradsapi ticca Abi Dio naco ticca imasiri epeje inana-jeranitohui, onajaro –nahi nade Jeso.

Jesocca marinajapi: —Jipehe tinebocos-samananijinepi ajima tiquinani bica tani –najari

¹⁶ —Diodsa huatide tiquejenanijine jipehe tinebocossamanadsapi tipanodeni odsaqquri nejerana, pina tipanodeni bica tadsa timadimanana, onajaro. Naraha tipanodeni odsaqquri nadsapi pina maidsajidede rabotedenissa tiquinarana. Najaridenipa madija ohuahadeni qqui toquinadsa: “A, jipehe nebocossamanahi, Diodsa disseraqquri nahi” quinahijine tohuira quinadsapa pohuadenijine pohuadeni cacahuamanahissa tajaradsapa ocasseraqquri nanaja najari. Nadsama pajissara tiadenidsa huati onajaro: Najaridenipa madija attideni tohuira quinadsapa pohuadeni tohuini quinahicca tahide cajimanapojari. Nadsapa dsotode Dio Pohua baccohuaji domo huadsa Diopa pohuadenidsa: “Jehe, epejeni. Bicaqquri tiquinani” najarahitohui. Pocca daniji bicabote pohuadenidsa da inejeranitohui, onajaro.

¹⁷ Naraha jipehe tinebocossanijinepi tahide tipano ssahua, titati ssiri tadsana jipehe tinebocossani bica tani. ¹⁸ Nadsama jipehe tinebocossani madija ohuahadeni ssamoqquri naraha Abi Diodsapi ahuato tani. Pohuana nahato tajari. Nidsa dsotode Pohua baccohuaji tedsa Diopa tiadsa: “Epejena, ticca ima bica tani” nahitohui. Pocca daniji bicabote naqui tiadsa da inanitohui, onajaro –nahi nade Jeso.

—*Memehuaji Dio madihidsa ima bicanira tinahapimanana -najari Jeso*

Roca 12.33-34

¹⁹ —Jehe, aji namidsa timadimanaccadsapi tidsepedenitaji tinahapimananijine tohuinira timadimana tejeraji. Ajina, todsepetaji tinahapimanadsapi poni maccanijine ssari nani caji tani. Motapi ponira majatoni caji tani. Motapi ponira botedsa jadsi tani. Motapi botie toja tani. Nema nadsapi tidsepedenitajipi jica-ca-ca... nemaneha amossi nani caji tani, onajaro. ²⁰ Nadsama aji namidsa timadimanani paji naccadsama Dio Pohua tohuini nahicca tohuira timadimanaji, onajaro. Memehuaji aja Dio madihidsana ima bicani tiadenidsa tohuapiponijinepi ajijaro namidsa tidsepedeni ihijimana naji. Nema tiquinadsapi Diocca daniji bicabote tiadenidsa da inanitohui. Najaro Diocca danijipi poni maccanijine ssari nanijine nohuerani. Majatonijine nohuerani. Bobotide botihijine nohuerahi. Paji jicarinijine naqui nohueranitohui, onajaro. ²¹ Ajina, tiadenipi ajijaro namicca todsepetaji tohui, dsiniro tohuira timadimaneje nadsapi najarodsara tetidseridsamanajaro. Naraha Dio Pohua tohuini nahicca tohuira timadimanadsapi Diocca danijidsana tetidsemananitohui, onajaro -nahi nade Jeso.

Dio ssiejene ibodidsa qquedsimahijine bica tani

Roca 11.34-36

²² —Inoccopi essiredsana pina jojororossa najaro. Inocco bica tadsapi essire ssiajani

ijini. Idsepedsa naqui damade nahato inajaro. Emoridsa naqui ccaridsade nahato inajaro. Icca tarabaisa naqui ipajirajaro. Ibodi huatode naqui nahato inajaro. ²³ Naraha inocco bica tejeradsapi pina inocco dsidsi tarossa najaro, essire nemaneha issamo tani. Dama inanijine naqui ssamo tani, iccaridsanijine naqui ssamo tani, icca tarabaisa naqui ssamo tani. Imapi najarossa najaro tibodidenidsa Dio ssiejene toqquedsimadsapi tibodideni ssijani cajini. Naraha Dio ssiejene toqquedsimajeradsapi tibodidenidsa pina dsidsini ijiridsarossa najaro. Aji tiadenipi: “Nahatoqquri inani. Ibodi ssiaja tani” tiquinaraha najaro ssiajanipi occa imassa nejeradsapi ssijani ticajimana-jerajaro. Dsidsini oppina tanicadsa timadimanajaropaji, onajaro –nahi nade Jeso.

Diotohui, dsinirotohui imadinijine ssamo tani
Roca 16.13

²⁴ —Jehe, madija pohua dossede pamahadsa dsepe ijihijinepa pajira-jarahi. Dossede pamaha cajidsapa ojariadsana huati huana tajari. Pohua attidsana ibora tahitohui. Ohuahadsa ajimani huati huana tadsapa pina pohuadsa jipera tarissa nahitohui. Pohua attidsa ibo tahitohui.

—Madija Diodsa dsepe ijidsapa dsinirotohuira dsepe ijihijine ssamo tahi. Dsinirotohuira huatidsedsapa Diodsa huatidsehijine ssamo tahi. Ima pamehepi Diotohui, dsinirotohui najaripa madihijine ssamo tahi, onajaro –nahi nade Jeso.

Dio pocca ejedeni ecahuabaquijari
Roca 12.22-31

25 —Nadsama tiadenidsa ohuattipi: Timadi-mananijinecca ticappiramanani noppineni ticappinamana tejeraji, onajaro. Pina ¿nejecora ojipapadseje? ¿Nejeco dsamatapa ppejenera dse onapadsaja? ¿Nejecora ohuedsapadseje? tiquinejeraji. Najarotohuipi tibodideni huahuatomacca nejerana, onajaro. Icca madiepi dsamatapaha ojari-jarahi. Icca madiena denima bica tajaro. Essire naqui etero edsanijinea ojari-jerani. Essirecca imana denima bica tajaro -nahi nade Jeso. ²⁶ —Ajana, meme abarideni memedsa jahiridsajaripa qqui qqui tiquinani. Najaridenicca imadsa tibodideni huatoma-manaji. Pohnadenipa huidsajacca ppa nahi pperaqquiri, huidsajacca ppa nahi bono poreraqquiri nadsapa nidsa dsotode jipamanahijine ppa nahi bono naco odsadsa ecahuamanajarajari. Naraha ticcadeni Abi Dio memehuaji madijaripa pohnadenidsa jipamanahijine da da ihinanajari. Diopa meme abaridenidsa huati huana taraha tiadenidsana denima huati huana tajari. Tiadenidsa naco tijipamananijinecca da da ihinanahitohui. ²⁷ Naraha tiadenipi ¿nejecotohui tibodideni: ¿Denima omadi-dsanapopadseje? tiquinajaro? Najarotohui tibodideni huahuatomacca nadsapi ¿ticcadeni madie denima tinanamananijine nahatoqquiri tiquinaqui? ¡Nahatoqquiri tiquinejerani! Ponima tibodideni huahuatomacca nejerana, onajaro -nahi nade Jeso.

28 —Nadsama ima onihi naqui: ¿Nejecotohui etero ticajicamanani noppineni ticappinamanajaro? Najarotohui tibodideni huahuatomacca

nejeraji. Jari, qqui tiquinanaja mohue ppata taridsajari. Mohuepa tarabaidsera, huepe picocora, etero ssequiquira taraha ppata taridsadsapa pina etero bicani huedsamanajarissa najari. ²⁹ Ajana, maittaccadsama naco Isaraeri potemahidenicca tamine Saromopa dsepe ssejide radsapa etero bicani huatini ccara tanna huedsadsapa bica tataja naraha mohuena denima bicaqquri najari, onajaro. ³⁰ ¡Jaho, ticcadeni jehenijipi badsira tani! ¿Nejecotohui tiadenipi “Dio ia tohuacahua-baqquihi” tiquinejerani? Ajina, dseropi etero huedsanijine cappiraraha Diojine poni mohueni cajidsapi pina etero bicani huedsajarossa nani. Dseropi mohueni cajini bica taraha huada huada nadsa dseqqueri nadsapi botta ina tani. Naraha dseropi ajimanicca. Tiadenipi pina aji dserossa tiquinejerani. Diocca cacatidse tabaqqui tiquejenajaro. Nadsama Diopa tedsamananijinecca etero naqui denima tiadenidsa da inanitohui, onajaro –nahi nade Jeso.

³¹ —Naraha tiadenipi timadimananijinecca ticappiramanani noppineni ticappinamana tejeraji. Pina ¿nejecora ojipapadseje? ¿Nejecodsamatapa ppejenera dse onapadsaja? ¿Nejecora ohuedsapadseje? tiquinejerana, onajaro. ³² Diodsa toquejena-jarajaridenipa nama nama nanaridsamana najari. Poccadeni jijipa tohuira, pahuadeni dsepetaji tohuira bodideni huahuatoma-mana najari. Naraha ticcadeni Abi Dio memehuaji madijari ticajimanani. Pahuapa ticappiramananicca huapima nanahato najari.

³³ Diocca cacahuehecca imadsa tibodideni hu-

atomaridsanijine Diotohuira tataridsamana naji. Dio Pohua jipa tahiccadsara tetetidsemana naji, onajaro. Nema tiquinadsana Diojine ticappi-ramananicca tiadenidsa inanaridsanitohui, onajaro -nahi nade Jeso.

³⁴ —Jehe, titedsejemadenicca huada tahimarini tohui tibodideni huahuatoma-mana nejerana. Pina: “¿Dsemassa nejeco imara tojapadseje?” titiquina nejerana, onajaro. Jidapanacca ssiaja tahimarinira tibodideni huahuatoma-mana nana, onajaro -nahi nade Jeso.

7

Madija ohuahacca ima nattome tiquinejeraji Roca 6.37-38, 41-42

¹ —Nadsama tiadenidsa ohuattipi: Madija ticattejidsamana tajarajo. Pina madija ohuahacca ima tiadenidsa bica tejeradsapi: “A, namajide rahi, pocca ima bica tejerani” tiquinejeraji, onajaro. Madijadenidsa tettideni nema tiquinejeradsapi manaco Diopa tiadenidsa: “Ticcadeni ima naqui bica tejerani” najarahitohui. ² Madija ohuahacca ima tibodidenidsa huatoma-manajaropi pina pocca ima nattome tiquinajarossa najaro. Naraha madija ohuahacca ima nattome tiquinadsapi manaco ticcadeni ima naqui nattome quinanitohui. Madija ohuahadsa tinanamanajarocca imapi manaco tiadenidsa najarossa inanamananitohui, onajaro. ³ Naraha tiadenipi timecotecca madie pina Diocca dossenijissa nejerani qqui tiquinadsa tettidenipi: “A, tijine bica tejerani” titiquina naraha tiadeni

naqui imasiri ticajimanani. Nadsama najaro ticcadeni imapi pina timecote noccodsa ahua majiconi huedsani qqui tinajarocca imassa najaro. Timecotedsa: “A, tinoccodsa ahua majiconi huedsaha, tire oninena” taraha tinoccodsa naqui ahua majiconi imeni huedsani. Qqui tinanissa tejerani, tinocco ahuatora tani. ⁴ Nadsama tiadenipi imasiri ticajimanadsapi ¿nejecotohui timecotedsara: “A, tijine bica tejerani. Tia acco ocamana, ticca ima tobicanijine” titiquina naraha tiadenipi tahide ticcadeni imaha tijinedeni tobicapo-jerajaro? ⁵ ¡Jaho, nema tiquinadsapi pina mamaiadsadenissa tiquinajaro! Ticcadeni ima bica tejeradsapi tahide ticcadeni imaha tinabicamanapoji. Nadsana timecote acco ticamamanahijine tipajiramananitohui, onajaro –nahi nade Jeso.

⁶ —Tiadenidsa ohuatti onihi naqui: Madija Dio Atti mittade jiperaqquri najaridenipa pina ettessa, pina porocossa quinajari. Ettedsa bica tanicca da tiquinaraha tiadeni cca naja camahitohui. Poroco naco pohnadsa perla bica tanicca da tiquinaraha ssamo tadsa ttai ttai inananitohui –nahi nade Jeso.

*Diodsa huatide dissera inanijinecca ima
Roca 11.9-13; 6.31*

⁷ —Jehe, Abi Diodsa huati huati titiquina naji, onajaro. Dio Pohnadsa huati tiquinadsapi tiadenidsa ticcadeni huatinajassa nehe da inanitohui. Pina tohuini tanicca qquide dissera tinadsapi bacco tinanitohui. Najarossa najaroa Diodsa huatide dissera tinadsapi Pohnapa ticca

huatinaja tiadsa inapajiranissa tanitohui. Pina madijacca odsadsa tiqquedsimanijine tohuini tadsa odsa jinededsa huahua tadsapi tiadsa noccobiji icatabojidsanitohui. Najarossa najaroa Diodsa huati huati tiquinadsapi ticcadeni huatinaja mittahi. ⁸ ¡Pajissa! Madija Diodsa huati tadsapa Diopa pohuadsa pocca huatinaja da inanitohui. Madija naco Diodsa huatide dissera tadsapa Dio Pohuajine pocca huatinaja inapajiranissa tanitohui. Madijapa pina Diocca noccobijidsa huahua najarissa nadsa Diopa pohuadsa noccobiji icatabojidsanitohui, onajaro.

⁹ —Ajana, madijapa pocca ejedeni pan tohui huati tadsapa ¿pohua bedidsa siba da ina taqui? Nohuerani. Tiadenidsapa madija nama najari nohuerahi. ¹⁰ Madija ohuaha naco pocca ejedeni aba tohui huati tadsapa ¿pohua bedidsa macca da ina taco? Nohuerahi. ¹¹ Tiadenipi tabacorehe ticajimanageraha ticcadeni ejedenidsa bica tahicca dade nahatoqqiri tiquinani. Nadsapa ticcadeni Abi Dio memehuaji madijari Pohuadsa huati tiquinadsapi tiadenidsa bica tahicca dade denima jipa tahi, onajaro –nahi nade Jeso.

¹² —Jehe, nadsama tiadenidsa madija huapima ima bicanira inanamananijine tohuini tiquinadsapi madija huapimadsa naqui ima bicanira titinanamana naji, onajaro. Nema tiquinadsana Dio Atti tecahuamananissa tajaro. Aji Moisesicca marinajassa tinanamanajaro, Dio Atti cacomeracquiri najaridenicca dsodoniji naqui najarossa tinanamanajaro, onajaro –nahi nade Jeso.

*Jahui pamanicca ima**Roca 13.24*

¹³ —Diocca cacahuehedsa tiquejenanijinepi ohuadsa jehe tiquinanissa taji. Pina noccobiji tojera tanihuaji jai tijedsimajarossa tiquinaji. Madijapa ohuadsa jehe quina-jarajaridenipa pina noccobiji toja tanihuaji jai tojedsimajarissa quinajari. Pina jahui imeni toccade najora tanihuaji jai tojajarissa quinajari. Naraha najaro jahuipi najidsohue jiquejeranihuaji toccajaro. Nahihuajina madija huemaha toquejenajari. ¹⁴ Naraha madija ohuadsa jehe quinahissa tarjaridenipa noccobiji tojera tanihuaji jai tojedsimajari. Pina jahui bedenihuaji jai tojarissa quinajari. Najaro jahuihuaji jai tojadsa Diocca cacahuehedsa bacco toquinadsapa camittehe jiquejeranicca cajimanahitohui. Nahihuajipa madija pamadema dsanapojari -nahi nade Jeso.

*Ahua bono tahimari**Roca 6.43-44*

¹⁵ —Jehe, tiadenidsa ohuattipi: Paji, madija mamaidsadedeni tiadeni tocamaid-sabaqquihijine bacco toquinahitohui. “Dio tahimari ecomeraridsajaro” quinaraha maidsamanajari. Pohuadenipa pina edede joneqquiri najarissa quinaraha bodidenipa pina dsomaji oppin-abotessa quinajari. ¹⁶ Poccadeni madie tinocodenidsa qqui tiquinadsa ima bicani inanamanajeradsapi nahatoqquiri tiquinanijine: mamaidsadedeni quejenajari. Ajina ¿cotihidsa uva bono pore pore quinaco? Nohuerahi. ¿Jessi ininedsa naco iquiera bono pore pore quinaco?

Nohuerahi. ¹⁷ Ahua ede bica tadsapa bono naco bica taha cahua tahi. Naraha ahua ede bica tajaradsapa bono naco tabaccora taha cahua tahi. ¹⁸ Ahua ede bicahidsapa bono tabaccora taha cahua-jarajari. Ahua ede tabaccora tadsapa bono bica taha cahua-jarajari. ¹⁹ Ahua huapimapa bono bicahi cappiraridsamanadsapa ca ippiridsamanadsa botta quinajari. ²⁰ Aji madijacca ima naqui pina ahua bonocca imassa najaro. Madijapa: “Dio tahimari ecomeraridsajaro” quinaraha ima bicani inanamanajeradsapi mamaisadedeni quejenajari nahatoqqiri tiquinani –nahi nade Jeso.

Madija motapa Diocca cacahuehehuaji jai tojamacossa-jarahitohui

Roca 13.25-27

²¹ —Madijapa ohuadsa attideni: “Ohua Medsede” quiquinanahi huapi taraha motapa Diocca cacahuehehuaji jai tojedsima-jarahitohui. Occa Abi Dio memehuaaji madijari Pohua tohuini nahiccara inanamanajarodenina Diocca cacahuehehuaji jai tojedsimahitohui, onajaro. ²² Nadsapa nidsa madija huapimacca ima Dio icattemanijinecca huada bacco tadsapi ohuattidsa iboqqiri najarideni ohuadsa ajama quinahitohui: “Ohua Medsede, ticca ima huapimapi ohohuacomeraridsa nadija. Tia oni hua onadsa naqui madija bodidenicca tocorimedeni dosse dosse ohoninebaqqi nadija. Tia oni hua onadsa naqui qqui toquinapojarajaricca ocanahatori canani huapi tadija” quinahitohui. Naraha najaridenipa Diocca cacahuehehuaji jai tojedsima-jarahitohui,

onajaro. ²³ Jehe, nidsa dsotode najarideni motadsa ohuattipi: Tiadenidsa onocco jidsa tani. Occa madija tiquejena-jerani. Dio Attidsa iboqquiri tiquinadsapi Pohua tohuini nahicca tinanamana-jerajaro. ¡Aji ohuadsapi huajiji tinaji! onanitohui -nahi nade Jeso.

Odsa capamajarocca ima

Maraco 1.22; Roca 6.47-49

²⁴ —Madija ohuatti mittamanadsa ohuattissa inanamanajaropi pina aja madija pocca odsa nahatode nahato tajarissa quinajari. Madijapa pocca odsa icanahatodsapi nami ccara tanihuaji bacco tadsana huehuema ppa idsajaro. Nadsapi odsa daco cajirajaro. ²⁵ Nadsapi passo cca, hueni cappanima, passo toqquemoja, jode jadsirema jo jo nadsapi odsadsa ssonari ssonari naraha toquehedima-jerajaro. Odsa toquehedima-jerajaropi huehuema nami ccara tanihuaji bacco teje najaro. ²⁶ Naraha madija ohuatti mittamanaraha ohuattissa inanamana-jerajaropi pina aja madija pocca odsa nahatode ssamo tajarissa quinajari. Najari madijapa pocca odsa icanahatodsapi nami ccara tanihuaji bacco tejeradsapi huehuema ssiqui daco nanidsara ppa idsajaro. ²⁷ Nadsapi passo cca, hueni cappanima, passo toqquemoja, jode jadsirema jo jo neje nadsapi odsa toquehedimajaro. Odsa toquehedimadsapi catirorijarossa najaro -nahi nade Jeso.

²⁸ Nadsama Jeso iadsa huati huati taha jicadsapa nahidsa madija huapima taharibobo canajari bodidenipa: —A, pocca marinaja bica taha -quinade. ²⁹ Jeso pocca marinaja mari

icanabaqquidsapa pohuana nahatojide rajari, atti caji tajaria. Aja jodiodenicca marinaja maridedeni attissa najarajari.

8

Huapi jadsimarohi Jeso inanomijari

Maraco 1.40-45; Roca 5.12-16

¹ Jeso ssonohuaji madija mari icanabaqquia jicadsa qquedsippanidsapa madija huapi taha Jeso natti jahidsippanijari. ² Huapima jahidsippaninaja madija dsamacoma onini leprajine huapi jadsimarohi Jesohuaji bacco najonajari. Pohua bodipa: —Jesopa deni tojahi, ohuapi ajimani ojani —nadsa Jeso baccohuaji pohua pitodsa huitta nadsa huati tajari: —Ohua Medsede, ohuapi bica onejeraraha tia jipa tinadsapi ohua tinanabicanijine nahato tinani —nahi nade Jesodsa.

³ Nadsapa Jeso pohua dsepedsa bara inadsa: —Jehe, jipa onani. Tibicaji, onajaro —nahi nade Jeso. Nanaja amadsati pohua huapicca to-mossissi nadsapa tobicajari. ⁴ Nadsapa pohuadsa Jeso attipa: —Aji tibicanicca ima madijadenidsa huati taridsa tejerana —najari. —Naraha Diodsa dada toqquimahujina ticcaji, onajaro. Nanidsa tiqquedsimadsapi dada toqquimade ojariadsara tepi tobicani tia nohue tinaji. Nadsapi ticca dsamacoma Diodsa oppina tanicca tomossidsapi ticca daniji Diodsa tojanijine ohuaha ohuaha naha pina edede, ppiriri, oqui najari da da tidsimana. Pina Moisesicca marinajadsa ibo-raqquiri inajarossa tinanaji, onajaro. Nadsapi

huapimadsa ticca ima toppinerani ahuato tad-sapi: “Pajissa tibicajaro” quinahijine, onajaro –nahi nade Jeso.

Romanodenicca soldado dossedecca medse Jeso inanomijari

Roca 7.1-10

⁵ Nahi dsotode Jesopa odsa panani Capernaohuaji bacco tanidsapa romanodenicca soldado dossede Jesodsa ccajonajari. Aja ccajonajaripa pocca dodosse tabaqqui 100 quinajari. Pohua bodipa: —Jeso ohua acco camahijine –nadsa Jesodsa huati tajari. ⁶ —Ohua Medsede, occa medsepa occa odsahuaji coma taha porijari. Comene dacoradsa ssomi tojamarodsa poripaja –najari.

⁷ Nadsapa Jeso: —Jehe, onanomihijine nani occana –najari. ⁸ Naraha soldado dossede attipa: —Jehe ohua Medsede, tiapi nahatojide tijirani naraha ohuapi ajimani, ssamo onani. Occa odsahuaji ticcanijine jipera tinanitide, onajaro. Naraha ajidsa huati tinadsapi nani occa odsahuajiccaraha, occa medse tettidsa tinanomihijine tipajirani nahato onani –najari nade. ⁹ —Aji ohua naquì occa taminecca dossenijidsa omadijaro. Manaco soldadodenipa occa dossenijidsa madimanajari. Pohuadenitohui huahua onadsapi jahijona tahi. Dosse dosse onadsa naco ohuattidsa jai toja tahi. Occa medsedsa naquì: “Tidsepe ijiji” onadsa naquì pina aji odossejarossa inana tani. Nema nadsapi ajidsa huati tinadsa occa medse tonomihijine tipajirani, onajaro –nahi nade soldadodeni dossede atti.

¹⁰ Najaro ima Jeso mittadsapa huatidsedsa pohua bodi: —A, pohuapa nahato taha —najari. Nadsapa pohua nattihuaji jahimissajaridenidsa huati tajari: —Ohuapi pajissara tiadenidsa huati onana: ¡Ajajari bodi namanahapa pajissa nahissa tajari! Tiadeni Isaraeri potemahideni huapimapi tettideni ohomitta naraha ajararissa najari tiadenidsapa nohuerahi. Pajissa tiquinanissa tani ohomitta nejerani —nahi nade Jeso. ¹¹ —Naraha ohuattipi tiadenidsa: Jehe, dsama nemanehedsa madiridsamanajarideni motapa Isaraerideni quejena-jararaha ohuadsa pajissa quinajaridenipa nidsa Diocca ejete jipacquie imeni tojadsapi nahidsapa huapima jipacquimanahijine jahijonahitohui. Ticcadeni idideni Abarahao, Isahaca, Jacobo najarideni tedseje pohuadeni naco nani memehuaji Dio pocca cacahuehehuaji pohuadeni naco jipacquimanahitohui, onajaro. ¹² Diopa pocca cacahuehe memehuajicca Abarahao potemahi Isaraeridenidsa tojanijine inanjoraporaha ohuadsa pajissa quina-jaradsapa Dio amossinihuaji hua ininebaqquihitohui. Dsidsinidsa toquejenadsa ocasserani ahuamana-dsanapodsapa panodeni todsahi nadsa oji oji quinahitohui, onajaro —nahi nade Jeso.

¹³ Nadsama romanodenicca soldado dossedsa Jesopa: —¡Jehe, epejena! Tiapi tibodi pajissa tanissa tadsapi ticca odsahuaji ticcanina. Nani bacco tinanidsapi tibodi tohuini tanicca tiadsa onanani qqui tinanitohui —nahi nade Jeso. Nanaja huati huati toquinaraha soldado dossede pocca odsahuaji pocca medse

amadsati tonomijari quinade.

Jesopa Pedro massodini inanomijaro

Maraco 1.29-31; Roca 4.38-39

¹⁴ Jeso Pedrocca odsahuaji toqquedsimadsapa Pedro massodini pori canani Jeso qqui tajari. Coma tajaro, huapini ppocorajaro. ¹⁵ Nadsapa Jeso poni dsapanidsa bara nadsapa huapini tonahuihui najaro. Nadsapi toتهمadsa Jeso pocca mamari tabaqquma inajipabaqqujari.

Jesopa comaqquiri najarideni inanomiridsa-baqqujari

Maraco 1.32-34; Roca 4.40-41

¹⁶ Jehe, dsomeme nadsapi madija bodidenidsa Satanacca dodosse tocorime cajimanajarideni Jesohuaji eccajonabaqqujari. Najaridenipa huapi taraha Jeso pohua attidsara tocorime dosse ininebaqquidsapa jahininejari nade. Comaqquiri najarideni naco huapima inanomiridsajari nade. ¹⁷ Aji Jesojine nema najaropi pina tahide Dio Atti cacomerabote Isahia it-edsejemacca ima ecomerapojarossa inanajaro. Najaroa aji: —Pohuana icca comani onihi onihi naridsajaro idiridsajaro. Icca dsamacoma naqui idiridsadsa pohuadsa tojadsapi inajicanitohui —napohui nade Isahia.

Madija Jeso huatimade toquejenahijineraha

Roca 9.57-62

¹⁸ Nadsapa Jeso madija pohuadsa queriqquijonahi tohuapihi nahi qqui tadsapa pohua huatimadenidsa: —Jina, coridsa jippehuaji jaijana —nahi nade.

¹⁹ Nadsapa jai tojabote naraha jodiopenicca marinaja maride Jesohuaji ccajonadsapa: — Nija ohua Maride -najari. —Aji ticcaridsadsama ohua naqui tiadsa occana, onajaro -nahi nade. ²⁰ Naraha Jesopa pohnadsa huati tajari: —Ohuadsa ticcaridsanijine tipajirajeranitide. Ajana dsohuadsahuapa odinedeni cajiridsamanahi. Ppiriri naco tadsarideni cajiridsamanahi. Aji ohua Madija Bedipi odsa ocappirani. Ohuadanijinecca huahuada ocappirani -nade.

²¹ Nadsapa Jesocca mamari ojariapa Jesodsa huati tajari: —Ohua Medsede, occa abi huatiahi ppa odsahijine tahide occa odsahuaji occanipocana. Nidsa dsotodena tiadsa occuridsanijine ¿jehe taqui? -nahi nade. ²² Naraha Jeso pohnadsa huati tajari: —¡Poni! Jidapana ohuadsa ticcaji -najari. —Aja madijapa Diocca camittehe cappiramanajarideni caji tahi. Pohnadenina madija dsoqquedsa ppa idsamanahijine pajiramanahi -nahi nade Jeso pocca mamaridsa.

Jesopa jojode inatappa ssodadani inatappa nanicca ima

Maraco 4.35-41; Roca 8.22-25

²³ Nadsapa Jeso canoadsa toqquedsadsa pocca mamari tabaqqui naco pohnadsa jai tojedsadsa pohnadsa jai tojajari. ²⁴ Nadsapa ori toquinaraha amadsati jojode dacorehema ccajona, passo dacorehema ccajona nadsapi coridsa ssoda ssoda najarojine canoadsa passo ssonidsa ssonidsa najaro. Naraha Jesopa huadaja dsanapojari. ²⁵ Nadsapa Jeso huadahihuaji jai tojeppidsa Jeso cobo cobo quinadsa: —¡Ia Medsede, nocco tijaji!

¡Ia acco ticamabaqquiji! ¡Je icanabote nani! –quinahi nade.

²⁶ Nadsapa Jeso pohuadenidsa huati tajari: — ¿Nejecotohui ticappinamanajaro? Tiadenipi ohuadsa: “Jehe, Jesopa ia tohuacahua-baqquihijine pajirahi” ¿tiquinejerajarorane? –nahi nade. Nadsapa totehemadsa jojodedsa, passodsas huati tajari: —¡Epeje taji! –nahi nade. Nadsapi jojode, passo ssoda ssoda najaro naqui joma najaro. Joma nadsapi passo podsippanissa tajaro. ²⁷ Nadsapa pocca mamari tabaqqui huapima: —A ¿nejeco madija? Ajina, jojode passo ssodadani tadsajani pohua attidsa ibora taha –quinahi nade.

Cadarahuajicca madija bodidenidsa Satanacca dodosse tabaqqui tocorimedeni madidsamanajari Maraco 5.1-20; Roca 8.26-39

²⁸ Nadsapa coridsa jippehuaji bacco tajari Jeso. Najaro dsama arobeni oninipi Cadara. Nahihuaji madija pamahapa tonoccobirihuaji mamadimana najari. Najarideni madija bodidenidsapa Satanacca dodosse tabaqqui tocorimedeni madidsamanajarijine huadidi tajari. Nadsapa nahi Cadarahuajicca madija huapimapa tocorime cajimanajarideni noppine cacappinamana nadsa tonoccobirihuajicca jahui jajahi toja najarajari. Naraha Jeso toqquemoradsapa pohuadeni pamaha tonoccobirihuaji huedajonajari, Jesodsas bacco quinajari. ²⁹ Nadsapa Jeso qqui toquinadsapa jadsirema huati huati toquinajari: —Dio Bedi ¿nejecotohuira ticcajonajaro? ¿Ia najidsode ticcajonajaroqui? Dio ia

tonajidso-baqquihijinecca huada bacco tejerac-
caraha –quinahi nade.

³⁰ Naraha nahi huajira tanidsa poroco
huapi taha jiparidsamanajari. ³¹ Nadsapa
Jesodsa tocorime attidenia: —¡Jaho! Ia dosse
tininebaqquidsapi poroco bodidenidsara ia
dosse tidsimabaqquiji –quinahi nade Jesodsa.

³² Nadsapa Jeso: —¡Jehe, porocodsa tiqueje-
nana! –nahi nade. Nadsapa madija bodidenicca
tocorime jahininedsapa porocodsana jai tojeds-
maridsajari. Nanaja poroco huapimapa coridsa
inidi sseberanihuaji domo toqquedsippadsa diri-
ri-ri todsippadsapa cojo-jo-jo quinajari. Tocato-
jedsippajari. Je tocaniredsapa coridsadsa cacot-
edsanajari.

³³ Nadsapa poroco cacahuadedeni qqqui
toquinadsa odsa pananihuaji domo toccanijari.
Bacco tanimanadsapa ima huapima huati
naridsamanajari: —¡Tonoccobirihuaji
madimanajarideni bodidenicca tocorimedeni
Jesojine jahininepaja! –naridsamanahi nade.

³⁴ Nadsapa nani odsa pananicca madija
huapima Jeso qqquide jahijonajari. Bacco
najonamanadsapa poccadeni dsamadsa Jeso
toccanihijine dossede dissassera tajari: —
¡Ticcaniji, aji icca dsamadsapi timadi tejeraji!
–quinahi nade.

9

*Jesopa madija ssomi tojahi inabiquemanijari
Maraco 2.1-12; Roca 5.17-26*

¹ Nadsapa canoadsa jai tojedsanidsapa coridsa jippehuaji pohuadeni ori najonamanapohuihuaji ori tanimanadsa huana tocananimana-pomajari. Jeso pohua mamadi nahi Capernaohuaji bacco tanimanajari nade. ² Naraha nahihuajipa madija ide tone biqueradsa isso ssomi tojahi pohua taborodsa poridsa Jesodsa eccajonamanajari. Jeso pohuatohui disseraqquri nahi qqui tadsapa pohua bodidsa nahato tajari: —Pajissa, Jesopa madija inanomihijine nahato tahi –quinahi Jeso pohuadsa ahuaato tadsapi coma tajaridsa huati tajari: —Otesse, ¡ticappina-jeraji! Aji imasiri tinanajaro huapimapi onanamossini. Jidapapi ticca ima Diodsa tobicani –najari nade.

³ Jeso atti nama nadsapa jodiodenicca mari-naja maridedeni mota mittamanadsapa pohuadenira ssejeje cosseri najari: —Apaja, Jesopa: “Imasiri onanamossina” naha. Pohua attipa: “Ohuapi pina Dio ojani” nanaja najarissa naha. ¡Jesocca imapi bica tejerani, pina Dio itamassojarissa nahi! –quinahi nade. ⁴ Naraha Jesopa pohuadeni bodidenicca ima nahato tadsapa pohuadenidsa huati tajari: —¿Nejecotohui ohuadsa ima tabaccora taniccara tibodideni huatomanajaro? –nahi nade. ⁵ —Naraha ¿nejecoma najaro imana tiadenidsa denima najora tani? Aja madija coma tajaricca imasiri onanamossini ¿najora taqui? Coma tajari onanabichina ¿denima najora tajarorane? ⁶ Naraha ohua Madija Bedi ojaropi madijacca imasiri onanamossinijine Diocca dacorehe ocajini nahatoqquri tiquinanijinepi, aji namidsa naqui ohuatti ocajini nahatoqquri tiquinanijine coma

tajaridsa huati onana –najari. Nadsapa madija ssomi tojahidsa pohua attipa: —¡Titehemaji! ¡Titaboro tididsa ticca odsahuaji ticcaniji! –nahi nade Jeso.

⁷ Nadsapa totehemadsa pocca odsahuaji toc-canijari nade. ⁸ Nadsama madija ssomi tojahi tonomihi madija huapima qqui toquinadsapa cappinamanaraha huatidsemanadsa: —A ¡Diopa bica tahi, bica tahi! –quinajari. —Dio pocca dacorehe madija namihuaji madijaridsa inanani qqui inani –quinahi nade.

*Ohua onipi Mateo. Otohui Jeso huahua najari
Maraco 2.13-17; Roca 5.27-32*

⁹ Nadsama Jeso jahui ccajonadsa ohua qqui tajari. Ohuapi Mateo. Ohuapi romanodenicca taminecca dosseniji dsiniro nanaccade ojarode. Nahi romanodenidsa dsiniro da tanijine ihinaccamana nanihuajicca odsa bedeni bodidsa ohuittidsaraha Jeso ohuadsa huati tajari: —Jina, ohuadsa ticcaji –nade. Nadsapi otehemadsa pohuadsa occajarode.

¹⁰ Nahi dsotode occa odsahuaji ijipanijine huahuanaridsa jassi inahuajanidsapi nahidsa Jeso qquide jahidsimajari. Otessedeni romanodenicca taminecca dosseniji dsiniro nanaccadeni huapima naco jahidsimajari. Jodiodenicca marinaja ecahuamana-jerajarodeni naco iad-sama jassi nahuajanijari. Jeso pohua huati-madedeni ia naqui pohuadeni tedseje jipade iquejenajaro. ¹¹ Naraha jodiodeni mota marinaja pariseodsa jehe quinajaridenipa madija bicaqquri najarajarideni tedseje ijipani qqui

toquinajari. Najaro imadsa jiperaqquri nad-sapa iadsa huati toquinajaride: —A ¿nejecotohui tiadeni maridepa romanodenicca taminecca dosseniji dsiniro nanaccadedeni tedseje, imasiri cajimanajarideni tedseje jipajari? —quinade. (Aja madija nama najarideni tedsejepa jipade oppina tani quiquinanajari, pariseodeni, jodio-denicca marinaja maridedeni tedseje.)

¹² Naraha pohuadeni attideni mittadsa manaco Jeso huati tajari: —Nomiqquri najaridenipa toponi totonanomide tohuini quina-jararaha comaqquiri najaridenina toponi totonanomide tohuini quiquinanajari —nade. —Ohuapi pina toponi totonanomidessa onajaro. Madijadenicca ima Diodsa tobicanijine pohuadeni accode occajonajarode. ¹³ Naraha madijapa: “Iapi bicaqquri inani” quiquinanajaridenicca ima onanabicani-jine occajona-jerajaro. Imasiri totonanadenicca ima onanabicanijinena occajonajaro. Jari, ajijaro ima ticahatteraji. Maittaccadsama Dio Atti cacomerabote Osea dsodo inajaro:

“Tohuati huanehe, acco camehe tohuini onani. Moisesicca marinajassa tinanamanadsapi ohuadsa ticcadeni bani bedi ono tojahijine da da titiquina naraha madija ohuahadsa tetideni huaneraqquri nadsapi ticcadeni daniji jipera onani.

Madija huapimadsa tetideni huanacqquri nani-jinena jipa onani. Pohuadeni acco ticam-abaqquimanadsa naco jipa onani” napohui nade Dio —nade Jeso.

Jesodsa jipehe nebocossanicca ima huati toquinajari

Maraco 2.18-22; Roca 5.33-39

¹⁴ Nadsapa Huano Baotistacca mamari tabaqqui Jesohuaji bacco najonamanadsapa pohuadsa huati toquinajari: —Nija. Iapi Diodsara huati huati idsanaponijine jipehe ihinebocossa nani. Jodiodeni marinaja pariseodsa jehe quinajarideni naco jipehe nenebocossamana naraha ¿nejecotohui ticca mamari tabaqqui tedsejedeni jipehe titinebocossamana nejerajaro? –quinade.

¹⁵ Nadsapa Jeso pohuadenidsa huati tajari: —Dsabissopa amoneje cajibote najari pocca ejete tojadsapi ¿pohuadsa queriqquimanajarideni huatidsemanera taco? Huatidsemana tahi. Dsabisso cajibote najari tedseje huatidsemanadsapa jipehe nebocossamana-jarajari. Naraha nidsa huada onihiccadsa madija ohuahadeni dsabisso cajibote najari inanadsoqqe-manahijine pohua iaccamanadsapa pohua tessedenipa jipehe nebocossamanahitohui –nade Jeso. (Aja pohua atti nama najaripa pohuapa pina dsabisso cajibote najari. Jeso pohuadenidsa madiccadsapa pohua huatimadedeni jipehe nenebocossamana najaraccajari, najari.)

¹⁶ —Ima onihi naqui ajima najaro: Etero ssessequidenipi etero jadanidsapi etero dsati ihibedsacossamana nejerajaro. Etero dsatipi etero jadanidsa podsacossadsa dsotode ssabo nadsapi joca naqqui tani. Nadsa etero jadani sseo tapomadsapi denima totabaccora tani

–nade Jeso. (Aja pohua atti nama najaripa pocca marinaja pina jodiodenicca marinajassa nejerani. Jeso pocca marinajapi dsati.)

¹⁷ —Ima onihi naqui ajima najaro: Uva ppejene nahatodsatipa bani etero ssequi nahi jadahidsa sso sso ihidsamana najarajari. Uva ppejene nahatodsatipa bani etero jadahidsa sso todsadsa ssicatadsapa jocaquera tajarijine sseo tahi caji tahi. Sseo tadsapa uva ppejene sso taha jica tahi, dsamine naco totabaccoradsapa coro quina tahi. Naraha uva ppejene dsatipa bani etero ssequi nahi dsatidsara sso sso totodsa nadsana uva ppejenepa ecahuahissa tajari. Aja dsamine naco totabaccora-jarajari –nade Jeso. (Aja pohua atti nama najaripa madija bodi dsati tojadsana Jesocca marinaja dsati ecahuanijine pajirahi, najari.)

Jairo bedeni tonominicca ima, Amoneje amais-soranaja coma taraha tonominicca ima

Maraco 5.21-43; Roca 8.40-56

¹⁸ Jesopa pohuadeni atti ecomera-dsanapodsapi jodiodenicca Dio Atti mamarihuajicca tamine Jesodsa huati tahijine ccajonajari. Jesohuaji bacco najonadsapa pohua bodi: —Jesopa deni tojahi, ohuapi ajimani ojani –nadsa Jeso baccohuaji pohua pitodsa huitta tocattedsa najari. Nadsapa Jesodsa huati tajari: —Occa ejedeni huatiapaja. Occa odsahuaji ticcadsa tidsepedsa poni bara tadsa tijine camittemanidsa madipomanijine –najari.

¹⁹ Nadsapa Jeso pocca mamari tabaqqui tedseje pohua natti jai tojamissajari.

20-21 Naraha jahuidsa amoneje coma tajaro Jeso toccahi qqui tajaro. Ponipi dsamacoma onini amaissoranaja cajijaro. Poni coma tanicca huajanopa 12 naraha ama jicaquera tanicca tonahanajonajaro. Nadsapi Jeso qqui tadsa poni bodinipi: —Jehe, pocca eterora bara onadsapi onominitohui –najaro. Nadsama Jeso nattihuaji toccamissadsa tohuajiressissi nadsa pocca etero iponi bara injaro. ²² Nadsapa Jeso piti nahuanidsa qqui taneje amoneje coma tajaro qqui tajari. Qqui tadsapa: —Asi, ticappina tejeraji. Tibodipi ohuadsa: “Jehe, Jeso ohua tonanomi-hijine pajirahi” tadsapi najarojine jidapapi ticca dsamacoma toccapa –najari Jeso. Nadsapi amadsati amani totappadsapi tonomijaro.

²³ Nadsapa denima tossoiqquimamana dsanapodsapa jodiodenicca Dio Atti mamarihuajicca tamine tadsarihuaji Jeso bacco tajari. Bacco tadsapa madija toqueriqquihi qqui tajari. Ejedeni ppa todsanijine najoramanadsa totorededeni tore tore quinajari, madija motapa jadsirema oji oji camajari, motapa johua johua camajari. ²⁴ Naraha Jeso attipa: —¡Jari, huapima ajijaro odsacca jai tijenaji! Ejedenipi dsoqquejerani. Huadajaro –najari. Naraha pohnadenipa Jeso atti jaja icanamanajari.

²⁵ Naraha pohnapa madija dosse ininebaqquidsa Jeso toqquedsimajari. Toqquedsimadsa ejedeni poni dsapani equidi nadsa totehemajaro. ²⁶ Nadsapa najaro dsama arobenihuaji madimanajarideni huapima mittaridsamanajari. Ejedeni camittemaninicca ima tojaribaqquiridsajarode.

*Nocco siri pamaha noccodeni ssire tocanirejar-
icca ima*

²⁷ Jesopa ejedenicca odsadsa qquenadsapa toccanijari. Toccani toccani nanaja nocco siri pamaha Jeso natti tohuedamissajari. Tohuedamissadsa huahua tamissamanajari: — ¡Dabi Potemahi! ¡ladsa teti huana taji inaha! —tamissamanajari.

²⁸ Nadsapa Jeso odsa bacco tadsapa toqquedsimajari. Naraha nocco siri pamaha huedajonajaripa Jesodsa tohuajiressimanadsa Jeso pohuadenidsa huati tajari: —Jari, ohuadsa tibodidenipi ¿nejecoma tiquinani? “Ia tonanomibaqquihijine pajirajari” ¿tiquinajaroqui? —nade. Nadsapa: —Jehe ia Medsede, ia tinanomibaqquinijine nahato tinani, inajaro —quinade.

²⁹ Nadsapa nocco siri pamaha nocco bara inabaqquidsa Jesopa: —Jehe, ohuadsa pajissa tiquinadsapi tinoccodeni ssire tanitohui —nade. ³⁰ Jeso atti nama nadsapa nocco siri pamaha noccodeni ssire tocanirejari. Nadsapa Jeso pohuadenidsa huati tajari: —¡Paji, ajijaro imapi madijadenidsa tecomamanaji! —nade. ³¹ Naraha tohuedanidsapa pohuadeni cacomamana-jarajari. Poccodeni ima ecomeraridsa-manajaro. Najaro dsama arobenihuaji madimanajarideni huapima — Jeso nocco siri pamaha inanomibaqquijari —ima mittaridsamanajari nade.

Ebeno siri ebeno tobicahicca ima
Mateo 12.22-24; Roca 11.14-15

³² Nocco siri pamaha tocanomiredsa tohuedaniraha manaco ebena siri eccajona-manajari. Pohua bodidsapa Satanacca dodosse tocorime madidsajarijine atti cappirajari. ³³ Naraha Jeso pohua bodicca dosse ininedsapa ebena biquemanidsapa atti cajipomajari. Nadsapa madija huapima qqui toquinadsapa: —A, bica tahi. ¡Jesopa nahato tahi! —quinajari. Attideni naco: —Aji ia Isaraeri potemahi icca dsamadsa nama nahi qqui qqui inapojaraccade —quinade. ³⁴ Naraha jodiideni mota marinaja pariseodsa jehe quinajarideni attidenia: —Ajana, Jesopa tocorimedenicca tamine Satanacca dacorehe cajijarijinea pocca dodosse tabaqqui dosse ininebaqquijaripaja —quinaraha maidsamanajaride.

Jesopa dsama huapimacca madijadsa huati cahanari canajari

³⁵ Nadsama Jesopa odsa panani onihi, onihi naridsajarodsa, odsa capamema najaro onihi, onihi naridsajarodsa bacco bacco nanaridsa nadsapa poccadeni Dio Atti mamarihuaji mari mari nanaridsa najari. Jesopa Diocca cacahuehecca ima bicani mari mari nanaridsa najari. Comani onihi, onihi cajiridsamanajarideni naco ihinanomi-baqquiridsa najari. ³⁶ Jeso madija pohuatohui jahijonana canahi qqui inabaqquid-sapa pohuadenipa pina edede pohuadeni cacahuade jiraha pohuama mamadiri naridsamanajarissa quinajari. Nama quinadsapa Jeso pohua bodidsa: —A, tohuati nahanaqquri nahi —nadsa pohuadenitohui huati cahanariri canaridsajari.

Madija huapimapa pohuadeni acco camade, pohuadeni maride cappiramanadsapa pina edede pohuadeni cacahuade nohueradsa nanajidso toquejenajarissa quina tahi. ³⁷ Nadsapa Jeso pocca mamari tabaqquidsa huati tajari: —Madija Dio jiraha madimanahi huapi taraha pohuadeni maridea huapi tajarahi. Pina huidsajacca ppa nahi bono jica-jarajarissa quinaraha poredea madija pama quinajari. ³⁸ Nadsapi huidsaja jinede Diodsa huati tiquinaji, Pohua Atti maride dosse inabaqquidsa bono porede tohuapihijine —nade Jeso.

10

Jesocca dodosse tabaqqui inajarodsa pocca nahatohue inanaridsajaro

Maraco 3.13-19; Roca 6.12-16

¹ Nadsapa Jeso itohui pocca dodosse tabaqqui 12 inajaro, itohui huahua nadsapa iadsa pocca nahatohue inanaridsajarode. Nadsapi ia naqui madija bodidenicca tocorime dosse inineridsabaqquihijine ia tonapajira-baqquihissa tajari. Nadsapa iadsa pocca nahatohue inanaridsadsa naqui comaqquiri najarideni naco comani onihi, onihi cajiridsamanaraha ihinanomi-ridsabaqqui nahijine ia tonapajira-baqquijaride.

² Nadsama ia pocca dodosse tabaqqui iquejenajaropi ia oni huapimapi ajima inajaro: Tahidepa Ssino, oni ohuaha naqui Pedro. Pedro pohua ohuaha onipa Adiri. Madija ohuaha

onipa Satiaco. Pohua ohuahapa Huano. Pohuadeni pamahapa Sebedeo bedi. ³ Madija ohuahadeni naco Feripe, Batorome, Tomas, quinjari. Ohuapi Mateo romanodenicca taminecca dosseniji dsiniro nanaccade oजारode. Madija ohuahapa Satiaco. Satiacopa Arapeo bedi. Ohuaha naco Tadeo (pohua oni ohuahapa Joda). ⁴ Madija ohuaha naco Ssino, pohuadsa romanodeni momohuade quiquinanajari. Madija ohuahapa Joda Iscariote. Najaripa Jeso ccaccorade. Nadsapi 12 inajaro Jesodsa iquejenajarode.

Jesopa pocca dodosse tabaqqui 12 inajaro madija maride ia dosse taridsabaqqujari

Maraco 6.7-13; Roca 9.1-6

⁵ Jesopa pocca dodosse tabaqqui 12 inajaropi pohua tahimari mari icanaridsabaqquihijine ia dosse tabaqqujari. Ia dosse tabaqquijaraccadsama ia mari tocanabaqquijaride. Pohua attipa: —Jehe, tiadenipi otahimari madija mari ticanabaqquiridsahijine jai tijadsapi jodio quejena-jarajaridenidsapi jai tija-jeraji. Dsama Samariacca odsa pananihuaji naqui jai tijedsima tejeraji. ⁶ Naraha Isaraeri potemahi jodiidenihuajina jai tijani bica tani. Najaridenipa pina edede jano toquejenajarissa quinjari. Jehe, najaridenidsana jajahi tijaridsa naji, onajaro. ⁷ Najaridenidsara jai tijaridsadsa otahimari tecomeraridsamananissa taji. “Diocca cacahuehepi iadsa bacco najonabote nani” taridsamanana, onajaro. ⁸ Comaqquri najarideni Diocca dacorehema titinanomi-baqquimana nana. Madija

dsosquemanajarideni naco Diocca dacorehema pohuadeni titinahatonimana nana. Madija dsamacoma onini leprajine jadsimanajarideni naco Diocca dacorehema huapidenicca titinanomi-baqqumana nana. Madija bodidenidsa Satanacca dodosse tabaqqi tocorime madidsamanajarideni naco bodidenicca dosse dosse titininebaqqumana najo, onajaro. Jehe, tiadenidsapi manaconi jirehe Dio pocca dacorehe tiadenidsa inanajaro. Tiadeni naqui najarideni tobiquemani-manadsapa manaconitohui huati tiquinejeraji, onajaro -nade Jeso.

⁹ —Ticcadeni benehidsa naqui dsiniro tiaccamana tejeraji. Oro poni, plata poni, ccarara onihi naqui poni. ¹⁰ Benehicca saco naqui tiaccamana tejeraji, poni. Ticcadeni etero onihi tedsamananijinecca naqui poni. Temoridenicca ohuahapa tiaccamana tajarajo. Aja tedsamanajarira tiaccamanahi ojari najo. Tiadeni to-tocahuejidsa ahua naqui tiaccamana tejeraji, poni. Nadsama otahimari maridera tidsepedeni ihijiridsamana nadsapi ticcadeni mamari tabaqquina ticcadeni madiejine tiadenidsa da da nanaridsamana nahi bica tahi -nade Jeso.

¹¹ —Nadsama odsa panani onihihuaji, odsa capamema najaro onihihuaji naqui bacco tiquinadsapi nahicca madija bica tajari, tiadenidsa jipa tajari tohuira qqui taridsamanana. Madija bica tajari bacco tiquinadsapa najaricca odsadsara timadimanani bica tani. Odsa panani onihihuaji jai tija-jeraccadsama aji bacco tiquinapojarocca odsadsara timadimanana, onajaro. ¹² Jehe, nad-

sama najaro odsadsa madimanajaridenidsa jai tijedsimadsapi pohuadenidsa: “¿Nija, bicaqquiri tiquinaqui? Diocca jonehe tiadenidsa tojana” tiquinana. ¹³ Nadsama ticcadeni marinaja mitta-manadsa, tiadenidsa bicaqquiri nadsapa Diocca jonehe pohuadenidsa tojanitohui. Naraha tiadenidsa, ticcadeni marinajadsa naco jiper-aqquiri nadsapa Diocca jonehe pohuadenidsa toja-jeranitohui. ¹⁴ Nadsapa tiadenidsa jiper-aqquiri nadsa: “Ajidsa timadimanaji” quina-jaradsapa, aja ticcadeni marinaja mittade jiper-aqquiri nadsa naco najaro odsadsa jai tije-qquimani bica tani. Madija nama quinahicca odsa tinebomanadsapi temoridenicca sadaridsa ssiqui ma tajaro catojanijine pporo pporo tiquinana. Nahi poccadeni ibohue bodideni huatoma-manahijine –nade Jeso. ¹⁵ —Jehe, pajissara tiadenidsa huati onana: Nidsaranibote madija huapimacca ima Dio icattemanijinecca huada bacco tadsa Dio pocca najidsohue tojadsapi najaridenidsapa denima oppina tanitohui. Ajina maittaccadsama odsa panani Sodomacca madija, odsa panani onihi Comoracca madija, nahihuaji madija madiridsamanajarideni naco tabaccoraqquiri nadsapa Djotine jicaridsapojari-paja. Naraha pohuadenipa nidsa dsama jicadsapi poccadeni imasiri manaconipa najidsohue oppina tajaro pohuadenidsa ssonarinitohui. Naraha ohuattidsa jiperaqquiri najaridenidsana najidsohue denima oppina tanicca ssonarinitohui –nade Jeso.

Najidsohue tojanitohui

16 —Jehe ;tibodideni huatoma-manaji! Ohua tiadeni dosse onabaqquijaropi pina edede dsomaji panahihuaaji tiadeni dosse onabaqquijarossa najaro. Jai tijaridsanihuajipi madija tiadenidsa huadiqquiri nahi caji tahi. Nema nadsapi tinoccodeni panaji. Pina macca nocco panajarissa tiquinaji. Naraha tiadenipi tedimana tejerana, pina midsori jone tajarossa tiquinaji, onajaro. 17 ;Paji, tinoccodeni panaji! Madija huadiqquiri najari aniridsahi. Najaridenipa tiadeni tadama-manadsapa jodiodenicca taminedenihuaji tiadeni tohuaqquedsimabaqqui-manahitohui. Jodiodenicca Dio Atti mamarihuaji naqui tiadeni tacossimanahitohui. 18 Otahimari tiadenidsa tojajaro acconi huadimanadsa dsama cacahuad-edenihuaji tiadeni tohuaqquedsimabaqqui-manahitohui. Dsama onihicca dsama onihicca madija tamine deni toquejenajarihuaji naco tiadeni tohuaqquedsimabaqqui-manahitohui. Naraha nema nehe ticcadeni ima tecomeramanadsapi taminedeni, jodio quejenajarajardeni naco otahimari mittamanahijine. 19 Nadsama taminedenidsa tiadeni tohuaqquedsimabaqquimanadsapa pohuadenidsa ticcadeni ima tecomeramananijine ;nejecoma onapadseje? tiquinejerana. Ticappinamana tejerana, onajaro. Nahidsa taminedenidsa tecomeramananijine Dio Pohua Corimena tettideni acco tocamabaqquihitohui. 20 Huati tiquinadsapi tettideniraha ticcadeni Abi Dio Pohua Corimejinena huati tiquinajaro, onajaro —nade Jeso.

21 —Naraha najidsohuepi tiadenidsaha ssonarini ojari nejeranitohui. Aja ohuadsa jehe quinajaridenipa otahimaridsa toquejenajarijine pohua ohuahadeniraha pohuadenidsa huadiqquiri nadsapa eheccora-baqquimana nahitohui, inajicabaqquimanahijine. Imehideni naco pohua bedideni otahimaridsa toquejenajarijine bedidenidsa huadiqquiri nadsapa pohuadeni bedideni eheccora-baqquimana nahitohui, inajicabaqquimanahijine. Bedideni naco imehideni otahimaridsa toquejenajarijine pohuadeni imehidenidsa huadiqquiri nadsapa imehideni ihinajica-baqquimana nahitohui. ²² Occa madija tiquejenadsapi madija huapima tiadenidsa jiperaqquiri nahitohui. ¡Naraha tiadenipi dacoco tijiraji! Najaro huadie tinahanamandasanapodsapi dsama jicani bacco tiquinadsa tiadenina ticassiejeranitohui. ²³ Naraha tiadenidsa jiperaqquiri najarideni tiadeni tonajidso-baqquimanadsapa ¡huassinaja odsa panani onihihuaji tidomodeni toccana! Tiadeni tonajidso-baqquimanapomadsa naco ¡odsa onihihuaji tidomodeni toccapomana! onajaro. Pajissara tiadenidsa huati onajaropi: Nidsa Isaraeri potemahidenicca odsa panani huapimadsa maride jai tijaridsani jiquejeraraha Madija Bedi ohua ohuatomani-pomanitohui, onajaro -nade Jeso.

24 —Tetideni ajimamana tejerana: Madija pocca mamari tabaqquipa pohuadeni maridedsa deni toquejena-jarahi. Pohuadeni mari-dena denima nahato tajari. Madijacca do-

dosse tabaqqui naco pohuadeni dossededsa deni toquejena-jarahi. Naraha pohuadeni dossedena denima nahato tajari. ²⁵ Najarossa najaroa aji madija pohua maridedsa ima ssonaridsapi pohuadsa naqui ima ssonari tani. Nadsapa pohua atti: “Epeje, ohua maridedsa nama quinadsapa ohuadsa naqui nama quinana” nahi bica tani. Madija pohua dossededsa ima ssonaridsapi pohuadsa naqui ima ssonari tani. Aji ohuapi ticcadeni tamine ojani ohua itamassomanadsa pina: “Tiapi tocorimedenicca tamine Beheosebo” quinadsapa tiadeni occa madija tiquejenajarodenidsa naco denima tatamasso quinahitohui –nade Jeso.

—*¿Nejecojaridsara ticappinamananijine?*
 –*najari Jeso*

Roca 12.2-7

²⁶ —Nadsama tiadenidsa jiperaqquri najarideni noppinedenipi ticappinamana tejerana, onajaro. Ajina, jidapana poccadeni tabaccorehe inajimamanaraha nidsa dsotodena ahuato tanitohui. Ima bicani ahuatora tanidsa inanamana, ima bica tejeranicca naqui ahuatora tanidsa inanamana naraha nidsa dsotodena najaro ima huapima ahuato tanitohui. ²⁷ Aji ohuattipi dsome tiadenidsa huati huati onajaropi nidsa ssi-ajanidsa tecomeramanaji. Teribodenidsa ojidsa huati huati onajaro naqui nidsa amossinihuajina jadsirema tecomeramanaji, onajaro –nade Jeso.

²⁸ —Nadsama otahimaridsa tiquejenajarojinepi madija tiadeni tonajicabaqquihijine tohuini quinaraha najarideni noppinedenipi

ticappinamana tejeraji. Najaridenipa timedeni jicanijine pajiramanaraha nidsa tijicani nattinipi aji jororoni jiquejeranihuaaji ticorimedeni hua todsimabaqquihijine ssamoqquri nahitohui. Diona tiadeni tonajicabaqquihijine pajirahi. Aji jororoni jiquejeranihuaaji ticorimedeni hua todsimabaqquihijine naco pajirahi. Nadsama Dio noppinena ticappinamanaji, onajaro -nade Jeso.

29-30 —Diopa madija huapimacca ima nahato tajari. Aji, titatideni conani huapima onini huade naco nahato tajari. Diopa tiadeni tohuacahua-baqquihitohui. Puhuapa dsama huapimacca cacahuade naco nahato tajari. Ppiriri naco Dio: “Jehe huatia-jarana” nadsapa huatiera tahi. Naraha Dio: “Jehe huatiana” nadsana huatia tahi. Nadsama ppiriri manaconepa ¿huati ccarataco? Huati ccarera tahi. Ppiriri pamaha manaconepa ccarara cajarie da da ihicanamana najaro. ³¹ Nema nadsapi jticappinamana tejeraji! onajaro. Ppiriripa ajamani toquejenaraha huapima Dio ecahuabaqquijari. Naraha Diopa tiadenidsana denima huati huana tajari. Tiadeni tohuacahua-baqquihissa tahitohui, onajaro -nade Jeso.

Madija ohuaha mittamanahijine: —Ohuapi Jesocca ojani -quinajarideni tahimarideni Roca 12.8-9

³² —Madija ojariapa madija ohuaha mittamanahijine pohua cacomeradsa: “Ohuapi Jesocca madija ojani” nadsapa manaco ohuapi

occa Abi Dio memehuaaji madijaridsa ohuacom-
 eranitohui: “Ajajari madijapa occa tojahi” onani-
 tohui. ³³ Naraha madijapa madija ohuaha mit-
 tamanahijine pohua cacomeradsa: “Ohuapi Je-
 socca madija ojajerani” nadsapa manaco ohuapi
 occa Abi Dio memehuaaji madijaridsa ohuacom-
 eranitohui: “Najaripa occa madija jarahi” onani-
 tohui –nade Jeso.

*Jesojinepa madija pohuadenira pohuadenira
 naridsamanajari*

Roca 12.51-53; 14.26-27

³⁴ —Tiadenipi tibodidenidsa: “Jehe, Jesopa aji-
 jaro namidsa jonehe tojaridsanijine ccajonajari”
 tiquinanitide. Naraha ohuapi madija cajonerara
 canahijine occajona-jerani. Madija cahadirere
 canahijinera occajonajaro –nade Jeso. ³⁵⁻³⁶ —
 Nadsama aji occajonajaropi madija pohuadenira
 pohuadenira naridsamanahijine. Madija motapa
 ohuadsa jehe quinaajari. Madija motapa ohuadsa
 jehe quina-jarajari. Nadsama madija ohuadsa
 jehe najaripa pocca odsadsa madija madimana-
 jarideni ohuadsa jehe quina-jaradsapa pocca
 huadi toquejenajari. Jehe, occajonajaropi ajima
 nanitohui: Dsabissopa imehi tedseje cacahadire
 nahitohui. Bedenipi imeni tadsajani cacahadire
 nanitohui. Jinomadinipi massodini tadsajani
 cacahadire nanitohui –nade Jeso.

³⁷ —Madijapa pocca madijadsa denima huati
 huana tadsa ohuadsapa ajamani huati huana
 tadsapa najari madijapa occa toja-jarahitohui.
 Aja madija pohua imehidsa, pohua imenidsa
 huati huana taraha ohuadsapa ajamani huati

huana tadsapa occa madija toja-jarahitohui. Pohua bedidsa, pohua bedenidsa huati huana taraha ohuadsapa ajamani huati huana tadsapa occa madija toja-jarahi. ³⁸ Madija ohuadsa dissera tajaradsapa occa madija tojahijine pajirajarahi. Occa madija tojahijinepa otahimarijine ocasserani inahanaraha nema nehe otahimarid-sara dissera tajari. Pohuadsa: “Ahua porimacossanidsa tia inanadsoqquena” quinadsa naco pohua attipa: “Epejena odsoqquena. Jeso onebojarahi” nadsapa najarina occa madija tojajari. ³⁹ Madijapa pocca madie ohuadsa eccoradsapi pohua inanadsoqqe-manaraha camittehe jiquejeraniccapi cajidsanapohuitohui. Naraha madija ohuaha pocca madie ohuadsa acco tadsa ajijaro namidsa madi-dsanapohuijine tohuinira nadsapa dsoqquehitohui. Dsoqquedsapa camittehe jiquejeranica caji-jarahitohui –nade Jeso.

Madijapa tiadenidsa bicaqqiri nadsapa Diodsa naco bicaqqiri nahi

Maraco 9.41

⁴⁰ Jesopa pocca dodosse tabaqquidsa denima huati tajari: —Madijapa pocca odsahuaji jai tijedsimanijine tiadenidsa pohua attipa: “Jehe, Jeso tahimari teccajonamanajaro bica tani. ¡Jai tijedsimaji!” nadsa najari madijapa tiadenidsa bica tadsapa ohuadsa naco bica tajari. Ohuadsa bica tadsapa ohua Cadossede Abi Diodsa naco bica tajari –nade Jeso. ⁴¹ —Nadsama madijapa Dio Atti cacomerabotedsa pohua attipa: “Pajissa, Diocca dodosse tijani. Dio Atti tecomeradsapi mittade jipa onani” nadsa najari madijadsapa Dio pocca biquehe inananitohui. Pina Dio

pocca biquehe Pohua Atti cacomeraqquri najaridenidsa inanaridsajarossa najaro pohuadsa naqui inananitohui. Nadsama madijapa Djojine madihissa dsanapojaridsa pohua attipa: “Jehe, Diodsa timadinissa dsanapodsapi ohuadsa bica tinani. ¡Occa odsahuaji tiqquedsimaji!” nadsa najari madijadsapa Dio pocca biquehe inananitohui. Pina Dio pocca biquehe madija madimanahissa tajaridenidsa inanaridsajarossa najaro pohuadsa naqui inananitohui –nade Jeso.⁴² —Nadsama madijapa occa mamari ojaria ajamani tojajari tohuati nahana tajaridsa pohua bodipa: “Jehe, ajararipa Jesocca madija, pohuadsa accora onana” nadsa pohuadsa da inadsa bica tani. Passo nahuini dse nahijine da icanadsa naco manaco nidsaranibote Diopa pocca biquehe najari madijadsa inananitohui. ¡Pajissara huati onajaro! –nade Jeso, pocca dodosse tabaqqui jai tojaridsahijine dosse inabaqquidsa.

11

Huano Baotista pocca dodosse tabaqqui tahimarideni

Roca 7.18-35

¹ Jeso pocca dodosse tabaqqui 12 inajaro pohua tahimari maride iquejenaridsanijine ia mari tocanabaqquia jicadsapa madija huapima mari icanabaqqui-ridsahijine ia huapima jajajarode. Jeso naco iadsama toccajaride. Najaro dsama arobeni onini Carireahuajicca odsa panani onihi, onihihuaji, odsa capamema najaro onihi, onihi nanihuaji Dio Atti ehecomeraridsa najarode.

² Nadsama Huano Baotistapa toponi cocoro todsimadsa huedsaraha madija attideni: — Cristo-Mesiapa canahatori canahi -quinahi ima mittajari. Mittadsapa pocca dodosse tabaqqui Jesodsa huati toquinahijine dosse inabaqquijari. ³ Nadsapa iahuaji jahijonadsa bacco najonamanadsapa Jesodsa huati toquinajaride: — Ia maride Huanopa tiadsa huatide ia dosse najonabaqquijari. Pohua attipa: “¿Tiapi aja tohui imadijaro Cristo-Mesia tijaqui? ¿Ohuahatohui imadiccanijinerane?” nade Huano atti -quinade.

⁴ Nadsapa Huano dosse inajonabaqquijaridenidsa Jeso pohua cacomerajari: —Jehe, ticadanidsa Huanodsa huati tinanimanaji. Aji qqui tiquinajaro, aji timittamanajaro pohuadsa huati tinanimanana -nade Jeso. ⁵ —Ajima tiquinana: “Madija nocco sirideni nocco ssire tocanirehi. Madija isso sirideni naco tocanomiredsa jahiridsahi. Madija dsamacoma onini leprajine huapideni jadsimarojarideni naco imedeni tobicaridsahi. Madija huaribodeni didiqquri najarideni naco huaribodeni ssire tocanireridsahi. Madija huatiarideni naco camitemani-ridsamanahi, madija tohuati nahanaqquiri najarideni naco icasiejeranijinecca ima mari icanabaqquimanadsa mittaridsamanahi” tinanimanana tiadeni maridedsa -nade Jeso. ⁶ —Aja madija mota attidenipa: “Jesopa Cristo-Mesia jarahi, pocca imapi onihi, Cristo-Mesiacca imassa nejerani” quinaraha madija mota nama quina-jarajari attidenipa: “Pajissa Jesopa icca Mesia” quinadsa

pohuadenidsana Dio pocca biquehe inananito-hui. Ajijaro ima huapima Huanodsa huati tinanimanana –nade Jeso.

⁷ Nadsapa Huano dosse inajonabaqquijarideni tohuedanihi natti Jesopa pohuadsa queriqquimanajaridenidsa Huano tahimari huati tajari: —Nadsama dsama huamoni ssono caji, siba caji tanihuajipi ¿nejeco qquidera jajahi tija najarotte? Aja madija pocca ima japari tajaro pina boba jojodejine jene jene tocanajarissa najari ¿nama najari qquide jajahi tija najarottarane? Naraha Huano Baotistapa pocca ima japari tejerade. ⁸ Huamonihuaji jajahi tija nadsapi ¿nejeco qquidera jajahi tija najarotte? Aja madija etero huatini ccara tanicca huedsajari qquide ¿jajahi tija najarottarane? Naraha tiadenipi nahatoqquri tiquinani: Madija etero huatini ccara tanicca huedsamanajaridenipa taminedenicca odsadsana mamadimana najari.

⁹ Nadsapa ¿nejecotohuira nanihuaji jajahi tija najarotte? ¿Dio Atti cacomerabottecca marinaja mittade jajahi tija najarottaqui? Jehe ¡pajissa! Pocca marinajatohui jajahi tija najaroa. Huanopa pina Dio Atti cacomeraqquri najaridenissa naraha pohuapa deni tojajari. Pohua dsepe ijijaripa ima deni tojanicca cajijari. Najaro imapi otahimari Cristo-Mesia tiadeni Idinide ojaropaji. Najaro ima inanajoridsapoparopaji. ¹⁰ Aja, Huano Baotistapa maittaccadsama pohua tedsejemacca ima Dio Atti cacomerabote Maraquia dsodo inapojaro. Najaropi pina Diopa Cristo-Mesiadsa huati tapojarissa najaro:

“Tahide titahimari tohuaccade madija ojaria titedsejema dosse onapohuitohui. Nahi mit-tamanadsa madija bodidenipa titohui najora-manapohuijine, pina tijahine najoramanapo-jarossa inanamananitohui, onajaro”

napohui nade Dio Atti –nade Jeso atti. ¹¹ — Nadsama pajissara tiadenidsa huati onajaro: Aji namidsa madiridsamanajaridenidsa naco madija ohuaha pina Huano Baotistassa najari nohuerahi. Huano Baotista pohujinena madija bodideni otahimaritohui Diocca cacahuehecca ima dsati inanajorabaqqipojari. Najarojine Huanopa namidsa madiridsamanajarideni huapimadsa deni tojajari. Naraha nidsa dsotode madijapa Diocca cacahuehecca ima dsati tojani qqui toquinadsa najarodsapa toquejenadsapa pohuadenipa Huano Baotistadsa deni toquejenahitohui. Madija ajamani tojajari pina tohuati nahana tajari pohua naco Diocca cacahuehedsa tojadsapa pohua naco Huano Baotistadsa deni tojahitohui –nade Jeso.

¹² —Jehe, Diocca cacahuehecca ima dsati madijadsa tojanijine Huano Baotistapa tahide mari mari najonapojari. Jidapana ohua naqui maride nema onajonajaroa ajijaropaji. Naraha madijapa Diocca cacahuehecca imadsa jiperaqquri nadsa pohuadenijine najidsohue ssonari ssonari najonajaropaji. Jicanijine disseraqquri naraha pajiramana-jarahi. ¹³ Maittaccadsama Dio Atti cacomeraqquri najarideni Moisesicca marinajadsa naco Dio Atti ecomeramaneje najonaponi najaroa aja Huanopaja. Huapima Diocca cacahuehecca ima naqui mari mari nanajona-

mana najari -nade Jeso. ¹⁴ —Nadsama aji-jaro ima timittamananijine tipajiramanadsapi: “Jehe, pajissa” tiquinaji. Najaro imapi Huanopa pina Dio Atti cacomerabote nidsa ccajonahitohui quiquinanajaripa Eriassa najari. (Aji Dio Atti dsodo nanidsapi: “Nidsa Ohuatti cacomerabote onipa Eria tiadenidsa dosse onahitohui” napohui nade Dio.) ¹⁵ Nadsama teribodeni ticajimanadsapi ohuatti timittamananissa taji, onajaro -nade Jeso.

¹⁶ —Naraha jidapanana aja madija madiridsamanajaridenipa ¿pina nejecojaridenissa quinajari? -nade. Nadsapa pocca marinaja mittamanahissa tahijine ajiaro namidsa imadinicca imadsa mari icanabaquijari. Pohua attipa: —Jehe, madija jidapana madiridsamanajaridenipa pina ejedenideni boronidsa jassi tadsa poccadeni ittome tossamodsa ahuaji johua, ahuaji johua quinajarissa najari, onajaro. ¹⁷ Pohuadenipa pohuadeni tessedenidsa: “Jaho, dsobi tiquinanijine totoredsa tore tore inaraha tetidsemana-jerani, dsobi dsobi tiquinejerani” quinajari. “Ittomedsa naqui tiadeni oji inanabaquuinijine ajie tohuati nahana taniccadsa jiri jiri inaraha tiadenipi oji tiquinehe nejerani” quinajari. ¹⁸ Jehe, aja madija jidapana madimanajaridenipa pina ejedeni jamimanajarissa quinahi onajaropi Huano Baotista madidsa Dio Atti cacomerade tojadsapa ejetecca jipacquiecca jijipa jipa-jarahi. Ejetecca dsedse dse najarahi. Nadsa johua johua quinadsa attidenipa: “Huano Baotistacca madie

jidsa tani. ¡Pohua bodidsa Satanacca dodosse tocorime madidsajari itidija!” quiquinanajari. ¹⁹ Nani dsotode ohua Madija Bedi ojajaroa ejetecca jipagquiecca jijipa ojipa, dsedse dse onadsapa ohuadsa johua johua quinajari attidenipa: “Jaho, madijadsa jipa naridsajide rahi, dsedsejide rahi. Romanodenicca taminecca dosseniji dsiniro nanaccadedenidsa ccaridsajari. Madija imasiri cajimanajari tedseje naco ccaridsajide rahi” quiquinanajari ohuadsa. Attidenipa Huanodsa, ohuadsa nama quinaraha nidsa imasiri cajimanajaridenipa ettidsa iboraqquiri nadsa bodideni cacajiqquimera, imarideni cacajiqquimera nadsapa Diocca nahatohue, pocca pajissehe ahuato tanitohui -nade Jeso.

*Iboqquiri najaridenicca ima
Roca 10.13-15*

²⁰ Jesopa odsa panani onihi onihi naridsa-jarocca madija poccadeni ibohue tahimarini huati tajari. Poccadeni odsa pananihuaji Jeso pohua canahatori canahicca denima inahatorid-saraha bodideni cacajiqquimera-manaha naradsapa poccadeni imasiridsa apaja quinarajari. ²¹ Pohua attipa: —Jaho, odsa panani Corasinahuaji timadimanajarodenipi najidsohue oppina tanicca tiadenidsa ssonarinitohui. Jaho, odsa panani Besaidahuaji timadimanajarodeni naqui najidsohue oppina tanicca tiadenidsa ssonarinitohui. Ajina, ticcadeni odsa pananihuaji ocanahatori canani qqui qqui

tiquinaraha tibodideni cacajiqquimerehe nejerade. Naraha maittaccadsama odsa panani Tirohuaji madimanapojaridenipa tabaccoraqquiri najari, aji odsa panani Sidohuaji madimanapojarideni naco tabaccoraqquiri najari pohuadeni huapimapa ocanahatori canani qqui toquinapojarajari. Nassa qqui toquinadsapa Diodsa toquejenahijine najomana-jarahitohuiraha. Poccadeni imasirijine bodideni ocassera tadsapa etero jidsa tanicca huedsamanadsa dsippo oconi pohuadeni tatidsa huira huira quinadsa oji oji quinahitohuiraha -nade Jeso. ²² —Naraha aji Corasinahuaji timadimanajaro tiadenidsa, Besaidahuaji timadimanajaro tiadenidsa naqui ohuattipi: Nidsa madija huapimacca ima cattemanijinecca huada bacco tadsa Dio Pohua baccohuaji tidomodeni huadsapi Tirohuaji madimanajaridenidsa Dio pocca najidsohue ajimani tojanitohui. Sidohuaji madimanajaridenidsa naco ajimani tojanitohui. Naraha tiadenidsana Dio pocca najidsohue denima oppina tanitohui -nade Jeso.

²³ —Jaho, odsa panani Capernaohuaji timadimanajarodeni naqui najidsohue oppina tanicca tiadenidsa ssonarinitohui. Dio memehuaji madijaridsa bacco tiquinadsa tiadenidsa Pohua Attipa: “Jehe, tiadenipi bicaqquiri tiquinani” ¿napadsaja? ¡Nama najarahitohui! Ticcadeni ibohuejinepi nami odini huaji tani jicaqquini nohueranihuaji tiadeni hua todsimahitohui. Ajina, ticcadeni odsa pananihuaji ocanahatori canani qqui qqui tiquinaraha tibodideni cacajiqquimerehe

nejerade. Naraha maittaccadsama odsa panani Sodomahuaji madimanapojaridenipa imasiri sseqquiri nadsa Djojine memehuaicca dsippo siba quejemani ppocorajarodsa odsa, madija huapima jicajari. Naraha pohuadenipa ocanahatori canani qqui toquinapo-jarajari. Nassa qqui toquinadsapa pohuadeni bodideni cacajiqquimera-manadsa Dio pohuadeni inajica-jarahitohuiraha. Jidapana Sodomadsapi madija madimanahi paja naccahitohuiraha -nade Jeso.
²⁴ —Naraha aji Capernaohuaji timadimanajaro tiadenidsa ohuattipi: Nidsa dsama jicadsa huapima imarideni icattermaridsanijine Dio Pohua baccohuaji domo huadsapa Sodomahuaji madimanajaridenidsa Dio pocca najidsohue ajimani tojanitohui. Naraha tiadenidsana Dio pocca najidsohue denima oppina tanitohui -nade Jeso.

Jesopa Imehidsa huati tajari

Roca 10.21-22

²⁵ Nahi dsotode Jesopa Imehidsa huati tajari: —Jehe Abi, Tiadsa ohuatidsejaro. Tiapi memehuaaji madimanajarideni Cacahuade tija, namihuaji madimanajarideni Cacahuade tija najaro. Jehe, madija nahatoqquiri najaridenipa aji jaro dsamacca ima tocahatteraraha Tiadsapa jiperaqquiri najari. Nadsama tijinepi ticca pajis-sehecca ima mittamana-jarahijine pohuadenidsa ahuatora tinanajaro. Naraha madija motadenipa: “Iapi ssamomo inajaro, pina ejedeni bedissa inajaro” quiquinanajaridenidsana ticca ima pajissacca ahuato tinanajaro. ²⁶ Jehe, Abi

ipajissa! Tia jipa tinadsapi tijine nema tinanajarode –nade Jeso.

²⁷ Nadsapa Jeso iadsa huati tapomajari: —Occa Abipa ohuadsa pocca nahatohue huapima inaridsajaro. Occa Abina pohua motta ohuadsa nahato tahi ojari najari. Occa Abipa nadsama Pohua ojari naha ohuadsa nahato taha nama najonajari. Ohuapi Abi Diocca Ejedeni ojani. Ohua naqui nadsama. Ohua ojari onehe Pohuadsa nahato onajonajaro. Nadsama ohua Dio Bedi ojadspapi madijadeni ohuadsa toquejenajaripa pohuadenidsa jipa onadsapi ojine pohuadenipa Dio Pohuadsa noccodeni tojidserahitohui –nade Jeso.

Ticcadeni imajine ja tiquejenadsapi Jesodsara tiquejenaji

²⁸ —Nadsama ima ccanajani temanadsapi pina ccanajabote jore tiquinadsa ja tiquejenajarossa nadsapi ohuahuaajira jai tijajonaji. Otahimaridsa pajissa tiquinadsapi tibodideni jassi onanabaqqunitohui. ²⁹ Occa marinaja tiadenidsa tojanijinepi ohuadsa tiadeni teccoramanaji, ohuadsa iboraqquri tiquinanijine, onajaro. Ohuadsa ticahatteraji. Tiadeni Maride ohuapi jone onani, bica onani. Tibodideni onabicabaqqunitohui. ³⁰ Occa marinaja tiadenidsa tojanijinepi ojine pajiranissa tani. Ohuadsa pajissa tiquinadsapi pina ppahua tanicassa nani –nade Jeso.

12

Jassinajacca huadadsa Jeso pocca dodosse

tabaqqui iapi aroso jidsadsa trigo bono pore idsanapojari

Maraco 2.23-28; Roca 6.1-5

¹ Nadsapi dsotode naqui jassinajacca huada bacco tadsa Jeso, pocca dodosse tabaqqui tedseje huidsaja nocconi jaijeqqumadsa ipemidsapi aroso jidsadsa trigo bono qqui inajari. Dside ippiridsadsa dsojo dsojo icajidseri nadsa pore siqui apa, pore siqui apa inade. ² Naraha jodideni mota marinaja pariseodsa jehe quinaridenipa ia qqui toquinadsa Jesodsa attidenipa: —¡Ajana! Jassinajacca huadadsapi idsepe ijini-jine oppina taraha ticca dodosse tabaqquipa trigo bono dside ippiridsamanadsapa pina jassinajacca huada jerajarodsa dsepedeni ijimanagerissa quinaha –quinade.

³ Nadsapa Jeso pahuadenidsa huati tajari: —¿Naraha tiadenipi aji Dio Atti maittaccadsama dsodo naniccadsa Dabicca ima hua hua titiquina naraha tetideni ajimamanajarorane? Najaro imapi Dabipa pohua tessedeni tedseje pemi-manadsapa pan Diodsa da tahicca oppina taraha jipamanajari. ⁴ Diodsa dada toqqumahuaji toqquedsimadsa cacahuadedsa pan tohui huati tajari. Pan ohuaha nohueradsa Diodsa da tahicaraha Dabi jipajari, pohua tessedenidsa naco da inabaqquidsa jipamanajari. Najari pan Diodsa da tahipa dada toqquima cacahuadedenira jijipamana najariraha Dabideni pemimanadsa jipamanajari oppinera tahi –najari Jeso. ⁵ — Nadsama Moisesicca marinajadsa naqui ¿dada toqquima cacahuade tahimarideni hua hua titiquina naraha tetideni ajimamanajarorane? Aji,

maittaccadsama Moisesicca marinajapi: Jassinajacca huadadsa dada toqquima cacahuadenipa dsepedeni ijimanaraha pohnadenidsa najaro huadapi oppinera tani, napohui nade Moisesi. ⁶ Naraha tiadenidsa ohuattipi: Aji Diodsa dada toqquimacca odsapi deni tojanicca tojaccade. Naraha jidapana aja, tiadenidsa madijaripa Abi Djojine pohnana deni tojajari. Jidapanana Diodsa dada toqquimacca odsapi pohnadsa ajimani tojajaro. Najari deni tojajari onajaropi ohuapaji –nade Jeso. ⁷ —Maittaccadsama Dio Atti cacomerabote Osea dsodo inapojaropi:

“Tohuati huanehe, acco camehe tohuini onani. Ohuadsa ticcadeni bani bedi ono tojahijine da da titiquina naraha madija ohuahadsa tetideni huaneraqquri nadsapi ticcadeni daniji jipera onani.

Madija huapimadsa tetideni huaneraqquri nani-jinena jipa onani. Pohnadeni acco acco titicamabaqqumana dsadsanapo nadsa naqui jipa onani” napohui nade Dio.

Naraha najaro dsodonijipi timittamana-jerajaro. Nassa timittamanadsapi ima cappiramanajarideni johua ticanabaqqumana-jarahitohuiraha. ⁸ Aji Madija Bedi ojajaroa jassinajacca huadapi ohuana jinede oani. Jassinajacca ima cacahuadepi ohuana paji –nade Jeso.

Madija dsepe siricca ima

Maraco 3.1-6; Roca 6.6-11

⁹ Nahidsa Jeso toccadsapa Dio Atti mamarihuaji toqquedsimajaride. ¹⁰ Nadsapa nahihuajicca madija dsepe siri naco nahidsa huit-

tarijari. Nadsa pariseodenipa Jesodsa huati toquinajari: —Nija, Moisesicca marinajadsa, icca madijacca marinajadsa naqui jassinajacca huadadsa madija coma tajari inanomihijine ¿oppinera taqui? Najaropi pina jassinajacca huada jerajarodsa idsepe ijijarossa naraha -quinajari. Pohuadeni bodipa: —Jidapana jassinajacca huadadsa ajajari dsepe siri inanomidsapa Jesodsa ima inahananijine -quinajari.

¹¹ Naraha Jesopa: —¡Jari! Manaco ohuatti tecomeramanaji. Ajina, pina ticcadeni edede itide. Jassinajacca huadadsaraha ticcadeni edede odidsa tossonidsimadsapa ¿tidinimana-jaraco? ¡Tidinimanahitohui! onajaro. ¹² Naraha ticcadeni ededepa ¿tiadenidsa bica tajaraco? Ededepa bica tahi. Naraha ia madijapi denima bicacquiri inajaro. Nadsapi jassinajacca huadadsa edededsa bica inanani oppinera tadsapi madijadsa naqui bica inanabaqquihijine oppinera tani, onajaro -nade Jeso.

¹³ Nadsapa madija dsepe siridsa Jeso attipa: —Jari, tidsepe ohuahuaaji da ticanajonaji -nade. Nanaja pohua dsepe pohuahuaaji da icanadsapi dsepe tocanomijaro. Pina pohua dsepe onihissa camanijaro. ¹⁴ Naraha pariseodenipa dsotode nahidsapa jai tojeninedsapa imahaha canajari: —¿Nejecoma inanadsa Jeso inanadsoqquehijine? -quinajari. Nadsapa najaro ima huati toquinahijine queriqquimanajari quinade.

Maittaccadsama Dio Atti cacomerabotepa Jeso tahimari dsodo inapojaro

¹⁵ Jesopa pohua inanadsoqqque-manahijine tohuini quinahi nahato tadsapa Dio Atti mamarihuaji nebodsas toccajari. Ia pocca dosse tabaqqui ia naqui huaji tanihuaji jaijajaro. Nadsapa pahuadsa madija huapi taha jahijonadsapa comaqquri najarideni huapima inanomibaqquijari. ¹⁶ Naraha inanomibaqquid-sapa pahuadenidsa huati tajari: —Tiadeni onanomibaqquijaro tecomamanana. Aja madija huapimadsa otahimari huati taridsamana tejeraji, onajaro —nade Jeso. ¹⁷ Nadsama Jesocca imapi pina maittaccadsama Djojine Pohua Atti cacomerabote Isahia dsodo inapojarossa najaro:

¹⁸ —¡Ticattomama canaji! Ajararipa tiadeni Idinide tojahijine occa Ejedeni Ohuattidsa ibora tahijine ocattapojari. Puhuatohui ohuati huana tajaro. Puhuapa Ohua catid-sehissa tajari.

Ocorime pahuadsa onanadsapi Ohuatti inapajiranissa tanitohui. Puhuapa aja madija tabaccorehe inebomanadsa occa biquehedsa toquejenahijine tahimarini dsama huapimacca madijadsa huati huati narid-sahitohui.

¹⁹ Puhuapa pahuadsa jiperaqquri najarideni tedseje ahuaji huati ahuaji huati quinarahitohui. Johuahuera tahitohui. Amossinidsa pohua atti mohui tadsa atti atti najarahitohui.

²⁰ Puhuapa boba ede jai tahi paja jai inanarjarahitohui. Naparina jororone cahuidsa jami-mi nadsa naco puhuapa paja icanahui-jarahitohui.

(Najaro imapi pina aja madija pohuadsa jehe nahissa tajarajari ettajo-jarahitohui. Madija pocca jeheniji tomijiraraha pohuapa najari acco icamahitohui.)

Nama dsanapodsapa nidsa dsotode pohuajine occa biquehe deni tojadsapi tabaccorehe inajicanitohui.

²¹ Nadsama dsama huapimacca madija pohua-tohui quinadsa pohua canajoranihitohui madimanajari, najari Dio -napohui nade Isahia.

Jesocca dacorehe ahuato tajaroraha pohuadsa ima inanamanajaro

Mateo 9.32-34; Maraco 3.20-30; 9.40; Roca 11.14-23; 12.10

²² Nadsapa madija pohua bodidsa Satanacca dodosse tocorime madidsajari. Najarijine nocco siri, ebena siri nadsapa qqui tajarajari, atti naco cappiraha madijari. Pohua tessedenipa Jesohuaji eccajonamanajari. Nadsama Jesopa pohua bodicca dosse ininedsapa tonomijari. Qqui tapomajari, atti naco cajipomajari. ²³ Nadsapa nahihua-jicca madija huapima najaro qqui toquinadsapa: —A, bica tahi. ¡Jesopa nahato tahi! —quinajari. Attideni naco: —¿Ajajari Jesopa, tamine Dabi Potemahico? Aja ia Idinide, pohuatohui imadijaro ¿ccaronajarico? —quinajari.

²⁴ Naraha pariseodeni najaro ima mitta-manadsa maidsamanadsa attidenia: —Ajana, Jesopa tocorimedenicca tamine Beheosebocca dacorehe cajijarijinea pocca dodosse tabaqqi dosse ininebaqquijaripaja —quinajari.

²⁵ Naraha Jesopa pohuadeni bodi nahato tajari. Bodideni huatomanahijine pohuadenidsa ajiaro ima huati huati tajari: —Dsama huapi-macca taminepa madija ecahuabaqquiraha dsotode pocca madija cahadiremanadsa ahuaji atti ahuaji atti quinadsapa pocca cacahuehe inas-samomanajaro. Nadsapa pocca madija domo tocca tahi. Najarossa najaro odsa pananica madija cahadiredsapa tojaribaqqui tahi. Ima onihina naqui najarossa najaro madija ojarina pocca odsacca madija cahadiredsapa poccadeni ima tossamonitohui. ²⁶ Ima najarossa najaroa Satanapa pocca dodosse tabaqqui madija bodidsa madidsamanajaridene dosse ininebaqquidsapa pina pohua pocca madija tedseje cahadirejarissa najari. Nama nadsapa pocca dossehe inas-samodsapi sara tabaqquihitohuiraha. ¿Nadsapa pocca dodosse madija bodicca dosse ininehijine jipa taco? Jipera tahi. Aji ohuadsa tetti-denipi: “Satanacca dacorehedsa pocca dodosse dosse tininejari” tiquinaraha najaropi pajissa jerani. Nassa najaro pajissa tojadsapi Satana pohua pocca dodosse tabaqqui inajaribaqquiridsahitohuiraha. ²⁷ Ajina, ohuadsa: “Beheosebocca dacorehe ticajini” tiquinaraha ticcadene mamari tabaqqui naco Satanacca dodosse tabaqqui dosse dosse ihinebaqquimana najari. Naraha pohuadenipa ¿nejecojaricca dacorehedsa nama quinajari? Aja ticcadene mamari tabaqqui dacorehe cajimanadsapa Satanacca dodosse tabaqqui dosse ininebaqquimanaraha pohuadenidsa: “Beheosebocca dacorehe ticajimanani” ¿tiquinattaqui? Nema

tiquinejerani, onajaro. Nadsama ¿nejecotohúi ohuadsa nema tiquinajaro? Tibodidenipi quejemama canajaro -nade Jeso. ²⁸ —Naraha ohuapi Dio Corimecca dacorehe ocajije najaro Satanacca dodosse tabaqqui dosse dosse ohoninebaqquiridsa najari. Nema onanadsapi tiadenidsa ahuato onanajaro: jidapana Diocca cacahuehe tiadenidsa bacco najonajaropaji, onajaro -nade Jeso.

²⁹ —Nadsama Satanapa dacorehe cajiraha ohuapi deni ojajaro. Puhuapa ajamani pina ajijaro ima tiadenidsa huati onabote najarossa najaro. Nadsama bobotidepa: “Odsacca todsepetaji obotina” najariraha odsa jinede dacorabote odsadsa madidsadsapa botihijine pajira-jarahi. Naraha bobotide denima dacoradsapa odsa jinede dama inadsa jore inaqquidsapa pohua dsepetaji botihijine pajirahi. Ima najarossa najaroa aji ohua pina bobotide denima dacorajarissa onajaro. Occa dacorehe deni tojadsapi pina Satana jore onaqquijarissa nadsa pocca dodosse tabaqqui dosse dosse ohoninebaqqui najaripaja -nade Jeso.

³⁰ Nadsapa Jeso denima huati huati tajari: —Nadsama madija ohuadsa toja-jaradsapa occa huadi tojajari. Pohua naco madija ohuadsa toquejenahijine pohuadeni acco icamabaqquijaradsa pohuajine ohuadsa tohuajimanajari, onajaro -nade Jeso. ³¹ —Nama nadsapa tiadenidsa ohuattipi: Madija imasiri inanama-naraha nidsa dsotode: “Icca ima inebona” quinadsapa poccadeni imasiri, poccadeni tamassohue Diodsa ecomeramanadsa Diopa poccadeni

imasiri huapima epeje inananitohui. Naraha Dio Corime itamassomanadsa, pohuajine tojajarodsa maidsehe huahua quinadsa naco Diopa pohuadeni atti huati ajama-jarahitohui. Poccadeni imasiri epeje inana-jeranitohui -nade Jeso. ³² —Aji ohua Madija Bedi ojajarodsa madija atti atti quinadsa ohua itamassomanaraha nidsa dsotode: “Icca ima inebona” quinadsapa poccadeni imasiri, poccadeni tamassohue Diodsa ecomeramanadsa Diopa poccadeni imasiri epeje inananitohui. Naraha Dio Corime itamassomanadsa pohuajine tojajarodsa maidsehe huahua quinadsa naco Diopa pohuadeni atti huati ajama-jarahitohui. Jidapana imadiccadsama poccadeni imasiri epeje inana-jeranitohui. Nidsa dsotode Dio pocca cacahuehe tojadsa naqui epeje inana-jeranitohui, onajaro -nade Jeso.

Ahua bono tahimari
Roca 6.43-45

³³ Nadsama Jesopa ahuacca imadsa mari icanabaqquihijine huati huati tajari: —Ahua bicahi ppa tadsa tecahuahissa tadsapa bono bica taha cahua tahi. Naraha ahua ppa tadsa tecahuajaradsapa bono tabaccora taha cahua tahi. Nadsama ahua huapima bono cajiridsadsapa bono bicahi cajihi nahato inadsapi: “Najari ahuapa bica tahi” inajaro. Bono tabaccora tahi cajihi nahato inadsapi: “Najari ahuapa tabaccora tahi” inajaro. ³⁴ Jaho, maidsaqquri tiquinani. Tebenodenipi pina macca ebenossa tiquinajaro. Tibodideni tabaccoraqquri nadsapi ima tabaccora

tajarodsara tebenodenidsa atti atti titiquina najaro. Aja madija huapimapa pohuadeni bodidsa ima caji tadsapi najaro imara huati huati totoquina najari. ³⁵ Nadsama madija bica tajaripa pohua bodidsa ima bicani ecahuadsapi ima bicanira huati huati tataja nahitohui. Naraha madija bica tajarajaripa pohua bodidsa ima tabaccora tani ecahuadsapi ima tabaccora tanticara huati huati tataja nahitohui. ³⁶ Nadsama tiadenidsa huati onajaro: Ima ponimacca huati huati tiquinadsapi nidsa madija huapimacca ima cattemanijinecca huada bacco tadsa Dio Pohua baccohujaji tidomodeni huadsapi aji ima ponimacca huati huati tiquinapojarocca huapimadsori teje cama-jeranitohui, onajaro. Diopa tiadenidsa: “Jari, ohuadsa ticcadeni ima tecomeramanaji. ¿Nejecotohui tettideni nema nema titiquina najaro?” nahitohui. ³⁷ Nadsama pina jidacca ahuacca ima huati onajarossa najaro aji tettideni huapima Dio nattome inadsapi tohuatti tabaccora tanicca ticajimanadsapi Diopa: “Tabaccora tinani. Tia onajidsona” nahitohui. Naraha tettideni bica tanicca ticajimanadsapi Diopa: “Bica tinani. Tia ocatidsena” nahitohui, onajaro –nade Jeso.

Madija tabaccoraquiri najarideni Jeso canahatori canahijine tohuini quinajari

Maraco 8.12; Roca 11.29-32

³⁸ Naraha Jeso atti mittamanadsapa jodio-denicca marinaja maridedeni mota, marinaja pariseodsa jehe quinajarideni mota naco Jesodsa huati toquinajari: —Jari Mamaride, pa-

jissa Diocca dacorehe ticajidsapi memehuaajicca nahatohue bicabote ahuato tinanaji. Qqui inana, inajaro –quinade.

³⁹ Naraha Jesopa pohuadenidsa huati tajari: —Jidapana timadimanajardeni tabaccoraqquiri tiquinehe timadimanajaro. Tahidepi tettideni: “Diocca iquejenani” tiquinaraha dsotodepi Pohua Atti tinebomanajaro. Aji ocanahatoriri cananijine tohuira huati tiquinaraha occa nahatohue onahatona onejerani. Naraha ocanahatoriri cananicca ima ojariena qqui tiquinanitohui. Najaropi Dio Atti cacomerabote Jonasocca imassa najaro. ⁴⁰ Najaroa aji Jonaso pina huatijarissa nadsa aba imehi bodidsa huada huatinimade tojari nehe madidsajarissa najaro aji ohua Madija Bedi ojararopi nidsa ohuatidsa nami bodihuaji huada huatinimade tojari nehe omadinitohui. Pina Jonasocca imassa najaro ohuadsa tojanitohui –nade Jeso. ⁴¹ —Nadsapi nidsa madija huapimacca ima cattemanijinecca huada bacco tadsapi Dio Pohua bacchuhaji tidomodeni huanitohui. Nahidsapa odsa panani Ninibehujaji madimanajaridenipa ticcadeni ima tiadenidsa inassonarimananijine huati toquinahitohui: “Tapi Jonasocca ima imittadsa ibodi cacajiqquimerade. Naraha tiadenidsapa Dio Atti cacomerabote deni tojajari madiraha pohua atti mittade iboqquiri tiquinajaro. Nema tiquinadsapi Dio tiadeni tohuattajo-baqquidsapa bica tani, inajaro” quinahitohui Ninibecca madija –nade Jeso. ⁴² —Najaro huadadsa dsama Sebahuajicca tamine amoneje madijaro naqui ticcadeni ima tiadenidsa inassonariniijine huati

tanitohui. Poni attinipi: “Ohuapi dsama huaji tanihuaji omadiraha tamine Saromocca nahatohue omittanijine occajonade. Naraha tiadenidsa madijaripa denima nahato taraha pohua atti mitade iboqquri tiquinajaro. Nema tiquinadsapi Dio tiadeni tohuattajo-baqquidsapa bica tani, onajaro” nanitohui Sebahujicca tamine amoneje attinipi -nade Jeso.

Satanacca dodosse tocorime toccaraha ccanipoma tahi

Roca 11.24-26

⁴³ Jesopa ima onihidsa mari icanabaqquijari. Pohua attipa: —Nadsama tocorime ojaría madija bodidsa madidsaraha qqenadsapa toccajari. Aji dsama huamo tanihuaji, passo nohueranihuaji pohua madihijine qquide toccadsa qqui qqui naridsaraha pohua madihijine bacco tajarajari. ⁴⁴ Nadsapa: “Jehe, occa mamadi botehuaji occanipomana” najari tocorime atti. Nadsapa ccanipomajari. Bacco nanidsa madija pohua bodi tohuirehi qqui tadsapa pina odsa johue tocanehé huisso tocanajarossa naraha tomadirajaro. ⁴⁵ Nadsapa tocorime toccapomadsa pohua tessedeni tocorime 7 quinaha jina inanibaqquijari. Najaridenipa denima tabaccoraqquri naraha pohua tedseje jai tojedsimajari, madimanahijine. Nadsama ima nema najaro madjadsa tojadsapi pocca madie tabaccora taporaha dsotodepi denima totabaccorajaro. Tiadenidsa najarossa najaro tojanitohui. Jidapana tabaccoraqquri tiquinehe timadimanajarodeni otahimaridsa pajissa tiquinejeradsapi ticcadeni madie denima totabaccoranitohui -nade Jeso.

Jeso imeni, pohua imecotedeni

Maraco 3.31-35; Roca 8.19-21

⁴⁶ Jehe, Jesopa madijadsa huatide tojaraha amossinihuajipa Jeso imeni, pohua imecotedeni tedseje: —Jesodsa huati inana —quinadsa pohuatohui domo huajari. ⁴⁷ Nadsa Jesodsa madija ojaria attipa: —Ticca ami, timecotedeni amossinidsa domo huapaja. “Tiadsa huati inana” quinajari —najari.

⁴⁸ Naraha pohuadsa huati tajaridsa Jeso attipa: —Occa amipi ¿nejecojaronna paji? Ohuemecotedeni naco ¿nejecojaridenina paja? —nade.

⁴⁹ Aji, ia pocca dodosse tabaqquideni ia dsopi tabaqquidsas Jeso attipa: —Ajararidenina pina occa amissa, pina ohuemecotedenissa quinajari, onajaro. ⁵⁰ Madijadenipa occa Abi Dio memehuaaji madijari Pohua jipa tahicca ihinanamana najarodenina pina ohuemecotedenissa quinajari. Amonejedeni naqui Dio Pohua jipa tahicca ihinanamana najarodenina pina occa amissa, pina ohuemecotedenissa quinajaro, onajaro —nade Jeso.

13

Jesocca marinaja huidsaja ppappadecca ima tadsajani mari icanabaqqijari

Maraco 4.1-9; Roca 8.4-8

¹ Dsotodepa najaro huadadsa Jeso odsadsa qquenadsapa coridsa inidicca ssiquihuaji toqquedsippadsa huittajari. ² Madija huapi taha nahi pohuahuaaji jahidsippadsa Jeso mari icanabaqquihijine canoadsa toqquedsadsapa

canoacca huihuittaridsa huittarijari. Nadsama madija huapimapa nahi coridsa inidicca ssiquidsa domo huajari. ³ Nadsapa Jeso pocca marinaja ajijaro namidsa imadinicca ima tadsajani pohuadenidsa huati huati tajari. Pocca imapi ajima najarode:

—Huidsaja ppappadepa pocca huidsaja huirade toccajari. ⁴ Nocco huira inaridsajari. Naraha motapa jahuihuaji catojaja najari. Nadsapa ppiriri jahironadsa amadsati saca quinajari. ⁵ Aja nocco huira naridsajari mota naco siba ccababa tanidsa catojajari. Nanidsapi ssiqui bicani badsira taraha nama naha huassinaja moro tajari. ⁶ Moro taraha jabo huapihuajira toccabaqquijari. Maji ccajonadsapa maji ppoconejine botejari. ⁷ Nocco mota naco namidsa cotihi caji tahihuaji catojajaria cotihi tedseje paja moro toquinarihi naraha cotihijine ssomi tojajari. ⁸ Naraha nocco mota huira naridsajaripa nami bicanidsa catojaridsadsapa mororo canaridsadsa bica taha napijari. Bono cajiridsadsapa ede ojariapa bono 100 naha cajijari. Ede ohuahaccapa bono 60 naha cajijari. Ede ohuahaccapa bono 30 naha cajijari. ⁹ Nadsama teribodeni ticajimanadsapi ohuatti timittamananissa taji, onajaro -nade Jeso.

Madija motapa Jesocca marinaja mittamana-jarajari

Maraco 4.10-12; Roca 8.9-10

¹⁰ Nadsama ia, pocca dodosse tabaqqui ique-jenajaropi Jeso pohuahujaji huajijira icanadsa

ajima inade: —¿Nejecotohui titahimari ajijaro namidsa imadinicca ima tadsajani pohuadeni mari mari titicanaridsabaqqui najaritta? —inade.

¹¹ Naraha Jeso iadsa ecomerade: —Jehe maittaccadsama Diocca cacahuehecca ima dsati najoraporaha madija inahattabaqqui-jaraccade. Naraha jidapanana Dio Pohuajine pocca cacahuehe tahimarini dsati tiadenidsana ahuato tani. Naraha madija motapa Dio Pohuajine pohuadenidsa ahuatora tadsa mittamana-jarajari —nade. ¹² —Ajina, Diocca cacahuehe tahimarini mari ocanaridsabaqquihicca madija tohuattajaripa Djohne najaripa denima tohuattahitohui. Nadsapa najarina denima nahato tahissa tahitohui. Naraha Diocca cacahuehe tahimarini mari ocanaridsabaqquihicca madija mimitta naraha tohuatta-jaradsapa occa marinaja cappirahissa tahitohui. Badsira taha tohuattadsapa najaro naqui amossi nanitohui. ¹³ Nema najarohne otahimari ajijaro namidsa imadinicca ima tadsajani madijadeni mari ocanaridsabaqquija naridsapohui najari. Pohuadenipa qqui qqui toquinaraha pina qqui toquirahi najaripaja. Diocca dosseniji mimittamana naraha pina mit-tamanerahi najari. Pohuadeni bodi naco ssamo-qquiri najari. ¹⁴ Nadsama poccadeni imapi pina maittaccadsama Dio Atti cacomerabote Isahia dsodo inapojarossa najaro inanamanajaro. Aji Isahia attipa:

“Teribodeni ticajimanaraha pina timittamanerani nanitohui.
Tinoccodeni ticajimanaraha pina qqui tiquirani nanitohui.

¹⁵ Ajajari madija bodideni tossamoridsadsapa paja tossamomanarihi nahitohui.

Huaribodeni moda nahi nadsapa pina mittamanerahi nahitohui.

Noccodeni naco modsi quinadsapa pina noccodeni cappiramanajarissa nahitohui.

Nama quinadsapa qqui toquinahijine ssamoqqui, mittamanahijine ssamoqqui, bodideni tocahatterahijine ssamoqqui nadsapa bodideni cacajiqquimera-manahijine ssamoqqui nahi.

Nassa bodideni cacajiqquimera-manadsa ohuadsa toquejenadsapa onabicabaqquihitohuiraha”
nahi nade Dio –nade Jeso.

¹⁶ —Naraha aji tiadenina ohua ocanahatoriri canajaro tinoccodenidsa qqui tiquinaridsajaropi Dio tiadenidsa ima bicani inanajaropaji. Teribodenidsa naqui occa marinaja timittamanajaropi Dio tiadenidsa ima bicani inanajaropaji.

¹⁷ Pajissara tiadenidsa huati onajaro: Maittaccadsama Dio Atti cacomeraqqui najarideni, Diodsa iboraqqui najarideni naco occa nahatohue aji jidapana tiadeni qqui tiquinajarocca qqui toquinahijine tohuini quinaporaha tahide tojicapodsapa qqui toquina-jarajari. Aji occa marinaja timittamanajarocca naqui najaro mittamanahijine tohuini quinaporaha tojicapodsapa mittamana-jarajari –nade Jeso.

—*Huidsaja ppappadecca imapi ajima najarona paji –najari Jeso*

Maraco 4.13-20; Roca 8.11-15

18 Nadsama Jesopa pocca marinaja ajijaro namidsa imadinicca ima tadsajani mari ican-abaquipomadsa naco pohua attipa: —¡Jari, titaharibomananissa taji! Huidsaja ppappadecca imapi ajima najaro: 19 Nocco huira inaridsajari mota jahuihuaji catojajaripa pina madija Diocca cacahuehe tahimarini mittamanaraha ja quina-jaradsa pina mittamanerahi nadsapa bodidenidsa Dio Atti toqquedsima-jerajarossa najaro. Aja ppiriri nocco saca inaridsajaripa pina maidsehe jinede Satana ccajonadsa bodideni inassamobaqquijarissa najaro. Nadsapa Dio Atti pohuadenidsa nohuerajaro.

20 —Madija ohuaha bodidenicca imapi pina aji siba ccababa tajarocca imassa najaro. Dio Atti mittamanadsa amadsati huatidsemanajari. 21 Pohuadenipa Diodsa jehe dsanapomanahijineraha Dio Atti pohuadeni bodidsa toja-jerajaropi pina siba ccababa tanidsa nocco moro taraha jabo huapihuajira toccabaqquijaricca imassa najaro. Nadsama aja maji ppoconejine botejaricca imapi Dio Attidsa jehe quinajarijine pohuadenidsa najidsohue ssonaridsa, ocasserani ahuamanadsapa jehe quidsati attidenia: “Epejena, Dio Attipi inebona” quinajari.

22 —Madija ohuaha bodidenicca imapi pina namidsa cotihi caji tajaricca imassa najaro. Pohuadenipa Dio Atti mittamanaraha pohuadeni dsepedeni ihijimana najarotohuira disseraqqui nadsapa Dio Atti tocahatterahissa tajarajari. Dsiniro tohuira quinadsa naco najaro imajine Dio Atti huatideni ajamamanajari. Poccadeni jeheniji pina aja nocco moro taraha cotihijine

ssomi tojadsapa bono-jarajarissa najaro. Dio Atti mittamanaraha pohuadenijine Dio Atti madija ohuahadenidsa toja-jeranitohui.

²³ —Naraha madija ohuaha bodidenicca imapi pina aji nami bica tajarocca imassa najaro. Dio Atti mittamanadsapa jehe quinahissa tajari. Poccadeni jeheniji napidsapi pina aja nocco nami bicanidsa moro tahissa tadsapa bono cajijari. Ede ojariapa bono 100 naha cajiridsajari. Ede ohuahaccapa bono 60 naha cajijari. Ede ohuahaccapa bono 30 naha cajijari. Aja Diodsa jehe quinahissa tajaripa madija mari icanabaqquidridsadsapa madija ohuaha ohuaha quinaha Diodsa inanabaqqui-manahitohui –nade Jeso.

Aroso jidsadsa trigo tedseje dsero quejeman-icca ima

²⁴ Jesopa pocca marinaja ajijaro namidsa imadinicca ima tadsajani madija mari icanabaqquipomajari: —Jehe, Diocca cacahuehe tahimarini onihi naqui pina huidsaja jinede pocca huidsajahuaji nocco bicahi huira inaridsajaricca imassa najaro. ²⁵ Dsome huapima cahadijadsapa pocca huadi ccajonajaria aroso jidsadsa trigo bicahi tetepidsa dsero nocconi pina trigossa najaro huira inaridsajaro. Huira inaridsaha jicadsapa aja huidsaja jinededsa huadi tajaripa toccanijari. ²⁶ Nadsapa trigo bicahi moro tajari, bono cajijari. Dsero pina trigossa najaro naqui moro tajararo. ²⁷ Nadsa huidsaja jinedecca dodosse tabaqqi qqui toquinadsa pohuadeni dossedehuaji jai tojanidsapa huati toquinajari: “Ia dossede ¿trigo noccora ticca huidsajadsa

huira tajarajarittaco? ¿Nejecohuajicca dsero pina trigossa najaro nocconi ccajonajarotte? inajaro” quinajari. ²⁸ Naraha huidsaja jinede attipa: “Jaho, madija ohuadsa huadi tajaripa dsero nocconi huira inaridsajaroa” najari. Nadsa pocca dodosse tabaqqi attidenipa: “Jipa tinadsapi dsero dsoppade jaijanipomana, inajaro” quinajari. ²⁹ Naraha jinede attipa: “¡Poni! Najaro dsero dsoppa tiquinejerana. Trigo naco dsoppa tiquirana” najari. ³⁰ “Apajaccana, pamaha napi-manaccana. Nidsa trigo bono jadadsana ahuato tahitohui. Nadsana bonotohui edema ti tiquinaridsahijine bica tahi. Nadsapa titidedenidsa ajima onanitohui: Jari, tahide dsero ti tiquinapona, onanitohui. Tide jicadsa ponira hua naqquidsapi jore nacossadsana botta tiquinaji, onanitohui. Naraha trigo bicahi bonotohui edema ti tiquinadsapa occa odsahuaji ohuadsa tojahijine jore jore tanimanajo, onanitohui” najari huidsaja jinede atti. Jehe, Diocca cacahuehepi najaro imassa najaro –nade Jeso.

Jesopa mostaza noccocca ima tadsajani mari icanabaqquijari

Maraco 4.30-32; Roca 13.18-19

³¹ Nadsapa Jeso pocca ima huati tapomahijine ajijaro namidsa imadinicca ima tadsajani mari icanabaqquipomajari: —Diocca cacahuehepi pina mostaza noccocca imassa najaro. Madijapa pocca huidsajadsa mostaza nocco ppa idsajari. ³² Najari mostaza noccopa potera tajarari. Ppa nahi nocco ohuaha naco potera tajarari caji taraha mostaza noccopa denima potera

tahi. Naraha mostaza nocco moro tadsapa huidsajacca ppa nahidsa pohuana deni tojajari. Napidsapa pina ahua imehissa najari. Motarad-sapa pohua ininedsa ppiriri pohuadeni tadsari bina tarimana tahi. Jehe, Diocca cacahuehecca ima mari ocanabaqquijaripa pina najaro imassa najaro. Tahidepi madija pamahadsa tojapojaro. Dsotodena madija huapimadsa tojaridsad-sapi Diocca cacahuehedsa madija tohuapihitohui -nade Jeso.

Jesopa pan ssaja tahijine quequejemacca ima tadsajani mari icanabaqquijari

Roca 13.20-21

³³ Nadsapa Jeso pohua tahimari ajijaro namidsa imadinicca ima tadsajani mari icanabaqquipomadsa naco: —Jehe, Diocca cacahuehe tahimarini onihi naqui pina pan ssaja tahijinecca imassa najaro. Amoneje pan inahatohuijinepa pan ssaja tahijine quequejema levadura trigo ria nahidsa icanejemajari. Ssaja tahijine quequejema badsira taraha trigo ria nahi harina 3 kilopa motarajari. Naraha ssaja tahijine quequejema trigo ria nahi harinadsa tojaribaqquidsapa ssaja tajari. Aji Diocca cacahuehecca ima naqui najaro imassa najaro. Tahidepa madija pamaraha dsotodena Diocca cacahuehecca ima dsama huapimadsa tojaribaqquidsapa madija huapimadsa tojaridsajaro -nade Jeso.

Jesopa pohua tahimari ajijaro namidsa imadinicca ima tadsajani mari mari ihicanabaqqi

*najari**Maraco 4.33-34*

³⁴ Jehe, Jesopa pohua tahimari ajijaro namidsa imadinicca ima onihi onihi najaro tadsajani madija huapima mari mari ihicanabaqqui najari. Pohuadenidsa huati tadsapa ajijaro namidsa imadinicca imadsara mari mari ihicanabaqqui najaride. ³⁵ Jeso nama najaripa aja maittaccadsamacca Dio Atti cacomerabote Jeso tedsejemacca ima dsodo inaponicca najarossa inanajaro. Najaro ima Dio Atti dsodo nanidsa ajima najaro:

—Otahimari ajijaro namidsa imadinicca ima tadsajani mari mari ohocanabaqqui nahitohui.

Dsama onahato-jeraccadsama naqui otahimari ahuatora tajonaraha.

Nidsa ojine najaro ima ahuatoridsadsapi madija huapima mari ocanabaqquiridsahitohui

—napohui nade Dio Atti cacomerabote.

—Aroso jidsadsa trigo tedseje dsero quejemanicca marinajapi ajima najaropaji —najari Jeso

³⁶ Nadsapa nahidsa Jeso madija huapima inebobaqquidsapa toqquemoranijari. Odsahuaji toqquedsimanidsapa nahidsa pocca dodosse tabaqquideni iapi pohuahuaji huajijira inadsa huati inajaro: —Jari, jidacca huidsajacca aroso jidsadsa trigo tedseje dsero quejemani tahimarini huati tinapojaro iadsa huati timanipomaji, imittanissa tanijine, inajaro —inade.

³⁷ Nadsapa ia mari tocanabaqquijari: — Jehe, ohuapi Madija Bedi ojajaroa pina trigo bicahi huihuiradessa onajaro. ³⁸ Nadsama

huidsajapi ajijaro dsamassa najaro. Trigo bicahi noccopa pina madija Diocca cacahuehedsa toquejenajarissa najari. Pohnadenipa Dio Attidsa iboraqquiri najari. Naraha dseropi pina madija Diocca huadi Satana attidsa iboraqquiri najaridenissa najaro. ³⁹ Nadsa dsero nocconi huihuiradepa huidsaja jinedecca huadi Satana. Nadsama nidsa trigo bono jadadsa ti nahijinecca huada bacco tajaropi pina nidsa dsama jicadsa Dio Pohnadsa toquejenajarideni icattejidsa-baqquihijine tahimarissa najaro. Aja trigo titidedenipa Diocca dodosse tabaqqui memehuaicca. ⁴⁰ Aji dsero huanacquidsa botta quinaniijinecca imapi nidsa ajijaro dsama jicadsa madijadsa najarossa najaro tojanitohui, onajaro. ⁴¹ Naraha nidsa ohuapi Madija Bedi ojajaroa memehuaji omadipomadsa occa dodosse tabaqqui memehuaicca dosse onaronaridsa-baqquidsapa imasiri mamaridedeni, imasiri totonanadedeni tedseje huapima icattejidsabaqqui-manahitohui, Diocca cacahuehedsa toquejena-jarahijine. ⁴² Najarideni huapimapa jororoni jiquejeranihuaji hua idsimabaqqui-manahitohui. Nahihuaajipa ocasserani ahuamana-dsanapodsapa panodeni todsahi nadsa oji oji quinahitohui. ⁴³ Nadsama icattejidsa-baqquimanaha jicadsapa madija Dio Pohna jipa tahicca inanamanajarodenina aja Pohnadsa toquejenajarideni huapima Abi Diocca cacahuehedsa madimana-dsanapodsapa pina maji dsibehi tajarissa quinahitohui. Nadsama teribodeni ticajimanadsapi ohuatti timittamananissa taji, onajaro -nade Jeso.

Todsepetaji huatini ccara tanicca inajimani tahimarinidsa mari icanabaquijari

⁴⁴ —Jehe, Diocca cacahuehepi pina todsepetaji bicabote huatini ccara taniccassa najaro. Madijapa pajimaranihuaji qquide ccaridsadsa todsepetaji tonajimani bacco inajaro. Todsepetaji bicabote, huatini ccara tanicca qqui tadsapa najaro todsepetaji denima inajimapomajaro. Nadsapa huatidsedsa toccanijari. Pocca odsahuaji bacco tanidsapa pohua dsepetaji nemaneha manaconitohui da ineha jicajaro. Najaro manaconi cajidsapa aja pohua qquide ccaridsapohuihuaji toccapomajari. Nadsapa najaro dsama mita inadsapi pocca tojajaro. Aji todsepetaji bicabote huatini ccara tanicca pohujine tonajimani naqui pocca tojajaro. Najaro imassa najaro Diocca cacahuehe denima bica tadsapi madija pocca imabote nemaneha inebodsapi Diodsara huatidse-dsanapohuitohui -nade Jeso.

Bicabote huatini ccara tanicca perla tahimarinidsa mari icanabaquijari

⁴⁵ —Jehe, Diocca cacahuehe tahimarini onihinaqui pina madija tomattocca huatini ccara tanicca perla mittade tohuini nadsa qquide ccaridsajari. ⁴⁶ Nadsama perla bicabote huatini ccara tanicca bacco inadsapa jinededsa: “Ohuadsa tecahuaji” nadsa pocca odsahuaji toccanijari. Pohua dsepetaji inequeriqquidsa nemaneha da inadsapa najaro manaconidsa perla mittade toccapomajari. Mita inadsapi pocca tojajaro. Jehe, Diocca cacahuehepi najaro imassa najaro.

ICCA imabote nemanehē inebodsapi Diocca cacahuehe bicabote iadsa tojajaro –nade Jeso.

Aba cocoro tahimarinidsa mari icanabaqqujari

⁴⁷ —Jehe, Diocca cacahuehe tahimarini onihi naqui pina aba cocoro imenibote passo imenihuaaji tappa icadsippamanadsa joca icamoranimanadsapa aba ohuaha, ohuaha naha huemajari. ⁴⁸ Nadsapa aba cocorodsa ijihissa tadsapa ssiquihuaajina joca icamoranimanadsapa jassi tadsa aba bica tajarira icattejidsamanadsa dsaminedsa hua idsaridsamanajari. Naraha aba tabaccora tajaripa hua quinajari. ⁴⁹⁻⁵⁰ Najarossa nanitohui nidsa ajijaro dsama jicadsa naqui. Tahidepa Diocca huadidsa toquejenajarideni Dio inajidsobaqquihijinepa pina aba tabaccora tajari tocattejidsadessa quinahitohui. Diocca dodosse tabaqqui memehuaajiccana madija tabaccoraqquri najari icattejidsabaqqui-manacchitohui. Pohnadenira domo huahitohui. Najaridenipa jororoni jiquejeranihuaaji hua todsimabaqquihitohui. Nahihuaajipa ocasserani ahuanana-dsanapodsapa panodeni todsahi nadsa oji oji quinahitohui. Naraha ohuadsa toquejenajarideni, aja Dio Pohua jipa tahicca inanamanajarodenina Dio madihihuaaji toquejenahitohui, onajaro –nade Jeso.

Todsepetaji jadani, todsepetaji dsati tadsajani tahimarinidsa mari icanabaqqujari

⁵¹ Nadsapa Jeso iadsa huati tajari: —¿Nija? Occa ima aji tiadeni mari mari ohocanabaqqui

najaro ¿timittamananissa taqui? -nade. Nadsapa: —Jehe, imittani -inade, ia huapima.

⁵² Nadsapa iadsa Jeso attia: —Nema nadsapi jodiodenicca marinaja maridedeni Diocca cacahuehe tahimarini dsatidsa toquejenadsapa pina odsa jinedessa quinajari. Odsa jinedepa pohua dsepetaji odsa bodihuaji ecahuajaro. Todsepetaji jadani caji, todsepetaji dsati naqui caji najari. Nadsapa pohua bodi nahato tadsa todsepetaji jadani dsojo inine tani. Todsepetaji dsati naqui dsojo inine tani. Nadsama aja Dio Atti maridedeni madija maride toquejenadsapa Dio Atti dsodo napojarocca, Diocca cacahuehe tahimarini dsati tadsajani maride nahatoqqiri najari -nade Jeso.

Jesopa Nasaretihuaji toccanidsa mari icanabaqqijari

Maraco 6.1-6; Roca 4.16-30

⁵³ Nadsama Jesopa pocca marinaja ajijaro namidsa imadinicca ima tadsajani huatide jicadsapa nahihuaji nebotsa ⁵⁴ pohua napihuajina toccanijaride. Odsa panani Nasareti bacco tanidsapa poccadeni Dio Atti mamarihuaji toqqedsimadsa mari icanabaqqijari. Naraha nahicca madijapa Jeso canahatoriri canahi qqui toquinapo-jaradsa huajo caniredsa attidenipa: —A ¿nejecohuaji tohuattajaritta? -quinade. —¿Nejecojaricca nahatohue Jesodsa tojajarotte? -quinade. ⁵⁵ —¡Naraha ajararipa ahua nanahatode bedia! Imeni oninipi Maria. Pohua imecotedeni naco: Satiaco, Dsodse, Ssino, Joda quinajaripajade. ⁵⁶ ¿Pohua caripenedeni naqui

aji imadinidsa madimana-jeraqui? Madimanani. Nadsama ¿nejecohuajicca nahatohue pohuadsa tojajarotte? –quinade. ⁵⁷ Nadsapa pohua atti mittade tojiperamanajari. Nadsapa Jeso attia: —Ohuadsa pajissa tiquinejeradsapi pina Dio Atti cacomeraqquiri najarideni tahimarissa tinanamanajaro: Madija huapimapa aja Dio Atti cacomerabotedsa: “Pajissa Diocca dossenijia” quiquinanaraha aja pohua dsamariccapa nama quina-jarahi, pocca odsacca naco pohua attidsa jiperaqquiri naha nama najonamanajari –nade. ⁵⁸ Nadsapa nahihuajicca madija Jesodsapa pajissa quina-jaradsapa pohua canahatohuajapohui canahicca huapi tejerani. Madija pamahara inanomibaqquijaride.

14

Huano Baotista dsoqquehicca ima

Maraco 6.14-24; Roca 9.7-9

¹ Nadsapa Jeso canahatori canaridsadsapa pocca ima tojaribaqquijaro. Nadsapa dsama arobeni Carireahuajicca tamine Herodepa Jesocca ima huati huati toquinahi mittadsapa ² pocca dodosse tabaqquidsapa huati tajari. Herode attipa: —Aja canahatori canajaripa Huano Baotista dsoqqueraha nahatonijari. Najaro nahatonihejine canahatori canahi –nahi nade tamine Herode.

³⁻⁴ Nadsama Herode atti nama nadsa tahide pohuajine Huano Baotista inanadsqque-manapojari. Najaro imapi ajima najaro: Tahidepa tamine Herode pohua imecote Feripecca amoneje Herodia icajidsa ima tojajaro.

Huanopa poccadeni ima mittadsa Herodedsa huati tajari: —Diocca dossenijidsapi timecotecca amoneje tidijidsadsapi bica tejerani -nanaja najari Huano. Najaro ima Herodia mittadsapi Huanodsa huadijaro. Ponicca maqquidsa dosse dosse nadsa tamine Herodepa pocca dodosse tabaqqui idossebaqquidsa Huano dama quinadsapa toponi cocoro todsimadsa coro idsimamanajari. ⁵ Nadsapa tamine Herodepa Huano Baotista dsoqquehijine tohuini naraha madija noppinedeni cappinajari. Ajana, madijadeni huapimapa: —¡Huano Baotista attipa pajissa! Puhuapa Dio Atti cacomerabote -quinajari huapima.

⁶ Naraha huada onihidsa tamine Herode pohua tossonahicca huada bacco tadsa ejete inanajaro. Herodia bedeni dsobi dsobi todsadsapi huapima qqui toquinajari. Nadsapa tamine Herode ponicca dsobinaja bica tani qqui tadsa huatidsed-sapa ⁷ dsohuatodsa pohua attia: —Jari jata, ticca huatinaja ohuadsa huati tinaji. Nadsapi tiadsa da onanitohui -najari. —¡Pajissa! Tia ocamaidsa-jerajaro, ohuattissa onanitohui -nahi nade tamine Herode. ⁸ Nadsapi dsohuatocca ami attinipi: —Huano Baotista tatitohui huati tinaji -nadsa najarossa inanajaro. Attinipi: —Ohuadsa Huano Baotista tati parato imehidsa huittidsadsa da ticanajo -nani nade dsohuato attini.

⁹ Nadsapa Herode pohua bodi jipera taraha pohua atti tahide: —Tia ocamaidsa-jerajaro, ohuattissa onanitohui -nanaja napodsa pohua tessedeni: —Pajissehe huati tajari -quinahijine

tohuini nadsapa: —Jehe, Huano matto ca tijid-sadsapa paratodsa ponidsa da ticanajo -najari. ¹⁰ Nadsapa pocca dodosse toponi cocorohuaji dosse inajari. Nadsapa tamine Herode attidsa Huano matto ca ijidsamanajari. ¹¹ Nadsama tati paratodsa ettidsadsa dsojo icadsimanidsapa dso-huatodsa da icanajari. Nadsapi dsohuato poni imenidsa da icanajari. ¹² Nadsapa Huanocca dodosse tabaqquideni assiretohui jahijonadsa dsojo ininemanajari. Nadsapa ppa idsamanajari. Dsotodepa: —Najaro ima Jesodsa huati inana -quinadsa Jesodsa huatide jai tojajari.

Jeso madija 5 mil quinajarideni inajipabaqquijari

Maraco 6.30-44; Roca 9.10-17; Huano 6.1-14

¹³ Jesopa —Huano Baotista dsoqquehi -quinahi ima mittadsapa pohua motta madihijine madija madide nohuerahihuaji canoadsa jaijaro ia huapima. Naraha madija huapimapa —Jeso toccahi -quinahi ima mittamanadsa odsa onihi onihi naridsanicca madija Jeso pohuatohui coridsa huapi jai tojabacossajari. Dsotorinihuaji jai huajanijari. ¹⁴ Nadsapa Jeso canoa huana tocanadsa toqqemorajari. Nanaja madija pohuatohui jai tojajarideni bacco toquinapodsa domo hueri nahi qqui inabaqquijari. Nadsapa pohuadenitohui huati cahanari canadsapa comaqqui najarideni inanomiridsa-baqquijari.

¹⁵ Nadsapa maji toccadsa pocca dodosse tabaqqui iapi Jesodsa huati inade: —Ahuajipa madija madide nohuerahi. Maji toccahi. Madija

dosse tinanibaqquijo, ahuajipa dsamatapa mitta quinahijine nohuerahi. Aja, odsacca dsamatapa mittade jai tojanina -inade.

¹⁶ Naraha Jesopa: —Jai tojanihijinepa ipohua! Ajadsa tiadeni tinajipabaqquimanajo -nade. ¹⁷ Naraha iapi: —Iadsapa pan 5, aba pama napaja. Denima icappirani -inade. ¹⁸ Nadsapa Jeso attia: —¡Apaja! Najari ohuadsa teccajonamanajo -najari.

¹⁹ Nadsapa Jeso madija huapimadsa huati tajari: —Nani dsero caji tanidsa jassi jassi tineri naridsaji -nade. Nadsapa Jeso pan 5 naha inacca, aba pamaha idsaba nadsa memehuaji tocattamacossa nadsa Diodsa huati tajari: —Jehe, epejeni. Ticca daniji iadsa bica tahi -najari. Nadsapa Jeso canahatori canajarijine pan, aba najari tohuapidsa icanabobiridsadsapa pocca dodosse tabaqqui iadsa pan da inabaqquijari. Iana madija jassi jassi teri najaridenidsa pan da inabaqquiridsajaride. ²⁰ Da inabaqquiridsadsa jipamanadsapa accararidsa-manajari. Jipamanahissa taraha mota tojjari. Pan bobi, aba ime mota inaccaniridsa-manadsapa quiqui 12 naha ijiridsajari. ²¹ Nadsa aja madija jipamanajaridenipa maqquideje 5 mil quinajari. Denima poccadeni amoneje, poccadeni ejedenideni naco jipamanajari.

*Jeso passo tetepi ccajonajaricca ima
Maraco 6.45-52; Huano 6.16-21*

²² Nadsapa canahatori canahicca pan jipamanahi nattipa Jeso pocca dodosse tabaqqui ia

coridsa jippehuaji ia dosse tabaqquipojari: — Jari, canoadsa jai tijedsadsa tahide jippehuaji jai tijapoji, onajaro -nade. Naraha Jeso pohuapa nahidsa ibocajari. Nadsapa madija huapimadsa huati tajari: —Epejeni, huapima jai tijanina -nade. ²³ Nadsapa madija jai tojanihijine huati taha jicadsapa manaco pohua motta ssonohuaji denima toqquemorajari, imehi Diodsa huati tahijine. Jeso pohua motta nahi ssonohuaji Diodsa huatide tojadsa cadsomejari. ²⁴ Naraha iapi coridsa nocconi ori inaraha jode itedsejema ccajonadsapi passo ssoda ssoda najarojine canoa quehenacossajaro. ²⁵ Nadsapa ssiajaricossadsa Jesopa qquedsippanidsa passo tetepi iahuaji ccamissajonadsa ia bacco tamissabaqquujari. ²⁶ Nadsapa Jeso passo tetepi ccajonahi qqui inadsapi otessedeni tedseje ijabojo najarode. Pohua noppine icappinadsapi johua johua inade: —¡Tocorime itidija! -inajarode ia huapima.

²⁷ Naraha iadsa Jesopa: —¡Ticappinamana tejeraji, ohuapi ohua! -nade.

²⁸ Nadsapa Pedro attia: —Ohua Medsede ¿pajissa tiaqui? Pajissa tijadsapi tiahuaji passo tetepi occanijine ohuadsa huahua taji, onajaro -najari.

²⁹ Nadsapa Pedrodsa Jeso huahua najari: —Jehe, ticcajonaji -najari. Nadsa Pedropa canoadsa huittidsaraha totehema, passodsa toqquedsippadsapa Jesohuaji passo tetepi toccajari. ³⁰ Naraha jode dacorajaro, oppina tani qqui tadsa Pedro bodi cappinajari. Cappinadsapa passodsa jaro dsanajari. Jaro dsanadsapa

Jesotohui huahua najari: —¡Ohua! ¡Ohua!
¡Ohua Medsede, ohua tidimoraji! —najari Pedro.

³¹ Nadsa Jesopa amadsati Pedro dsepedsa dama mari idsanadsapa huati tajari: —Pedro, ticca jeheniji pajiranissa tejerajarojine jaro tid-sanajaropaji. ¿Nejecotohui ohuadsa: “Jehe, Jesopa passo tetepi occanijine pajirahi” tejerajaro? —nade Jeso.

³² Nadsama canoadsa huededsanidsapa jojode totappajaro. ³³ Nani canoadsa jassi idsaraha ia huapima ibodipi: —Jeso deni tojahi, iapi ajimani iquejenani —inadsa Jeso baccohuaji ipitodsa jassi idsadsapi pohuadsa huati inajaro: —Pajissa, tiapi Dio Bedi tijani —inajarode, ia huapima.

*Jenesarehuaji Jesopa comaqqiri najari
inanomiridsa-baqqijari*

Maraco 6.53-56

³⁴ Dsotode coridsa jippehuaji iaqquejidsadsapi dsama onini Jenesarehuaji bacco inajaro. ³⁵ Nadsapi jaijemoradsa nahihuaji madimanagerideni Jeso qqui toquinajari. Nadsapa —Jeso iadsa bacco nahi —quinahi ima tojaridsadsapi comaqqiri najarideni pohuadeni tesse ehecajona-baqquimana najaride. ³⁶ Nadsama huapima Jesotohui disseraqqiri nadsa pohuadeni attidenipa: —¡Jeso, ohua tinanomiji! ¡Ticca etero iponira bara onanijine ahuaji ticcajonaji! —quiquinanajari. Nadsapa pocca etero iponi bara quinajarideni huapimapa tocanomireridsahissa tajari.

15

Jodiodenicca marinajajine Diocca dosseniji huahuattaajo tojajaro

Maraco 7.1-13

¹ Nadsapa huada onihidsa odsa panani Jerosarehuajicca jodiodeni marinaja pariseodsa jehe quinajarideni, jodiodenicca marinaja maridedeni tedseje Jesodsa bacco najonamanajari. Jesocca dodosse tabaqqui pohuadeni dsepe ssahuarahi jipamanahi qqqi toquinadsapa Jesodsa huati toquinajari:

² —¿Nejecotohui ticca dodosse tabaqquiipa jodio quejenaraha icca ididenicca marinaja ecahuamana-jerajaro? —quinade. —Ajana, pohuadeni dsepe ssahuarahi jipamanadsapa Diodsa bica tejerani, iadsa naqui oppina tani, ihinanajaro —quinade.

³ Naraha Jesopa: —Jari, tahide ohuatti tecomeramanaji. ¿Nejecotohui tiadenipi Diocca dosseniji nahatoqquri tiquinaraha najaro dosseniji tecahuamananissa tejerajaro? Aji ticcadeni ididenicca marinajadsana disseraqquri tiquinadsapi Diocca dosseniji ponima tinanamanajaro. ⁴ Ajina, Diocca dossenijipi:

“Ticcadeni abidsa, ticcadeni amidsa tetideni huaqquri nana. Pohuadenitohui tetideni huaqquri nadsa attidenidsa iboraqquri tiquinana” napohui nade.

Pohua atti naqui:

“Madijapa imehidsa, imenidsa imasiri inanadsapi manaco najaripa dsoqquehitohui”

napohui nade Dio Atti, Moisesijine dsodo nanidsa. ⁵ Naraha tettidenipi: “Madija imehidsa, imenidsa pohua attipa: ‘Jaho, tiadeni acco ocambaqquinijineraha ocajijaro huapimapa Diodsa da onahijine onapodsapi tiadeni acco ocambaqquinijine opajira-gerani’ nadsa pocca abi, pocca ami acco icamabaqqui-jaradsapa bica tani” tiquinaraha. ⁶ Ticcadeni madijacca marinajadsana “bica tani” titiquina nadsapi tijinedeni Diocca dosseniji huahuattajo tinanamanajaro. ⁷ Jaho, tiadenipi maidsehe ticajimanani. Maittaccadsama Diojine Pohua Atti cacomerabote Isahiapa ticcadeni imassa nehe dsodo inapojaro. Jidapanana najarossa najarodsa timadimanajaro. Ajana, maittaccadsama Diojine Isahiapa:

⁸ “Ajajarideni madijapa ohuadsa: ‘Dio, tiapi bica tinani’ quiquinanaraha pohuadeni bodidenidsa otohui quina-jarahi.

⁹ Pohuama ohuadsa jiri jiri quiquinanajari. Pohuadeni maride naco: ‘Dio Atti mari mari inajaro’ quiquinanaraha madijacca marinajara mari mari nanaridsamana najari” napohui nade Dio Atti –nade Jeso.

Tabaccorehe madija bodidsa ahuatomadsapi imasiri toja tani

Maraco 7.14-23

¹⁰ Dsotodepa Jeso madija pohuahuaaji jahijonahijine tohuideni huahua najari. Pohuahuaaji bacco najonamanadsa Jesopa: —Jari, ohuatti titaharibobo canaji timittamananissa tanijine –nade. ¹¹ —Tiadenidsapi jijipa oppina tahicca caji tahi. Madija nama nahicca jipadsapa

tettidenipi: “Diodsa bica tejerani, Moisesicca marinajadsa naqui oppina tani” titiquina najaro. Naraha ohuattipi ajima najaro: Huapima ita-paripa dappi inadsa ibodidsa tojadsapa imasiri toja-jejerani. Naraha ebenodsa huati huati ihinajaroinena madijadsa imasiri ihinanamana najaro –nade Jeso.

¹² Nadsapi ia pocca dodosse tabaqqui iquejenajaropi madija atti atti quinahi imittadsa manaco Jesodsa huati inajarode: —Nija, jidacca huati tinajarocca ima pariseodeni mittamanadsapa tettidsa nacasseraqquri nahi ¿nahato tinaqui? –inade.

¹³⁻¹⁴ Naraha Jeso attia: —¡Epeje! ¡Nama dsanapomanahitohui! Madija occa Abi Dio memehuaji madijaridsa toquejenajaridenipa pina pocca huidsajacca ppa nahissa quinajari. Naraha aja pariseodenipa pina pohnama moro toquinajarissa quinajari. Nadsama huidsaja jinedepa pohnama moro tahicca jaboma dsoppa inadsa ajacca hua inajari. Dio naco najaro imassa inananitohui. Pohnadsa toquejenajarajardeni aji jororoni jiquejeranihuaji hua idsimabaqquihitohui. Ajana, pohnadeni attipa: “Dio Atti maride iquejenajaropi pina noccodeni siri jahinedeni dsopi icanabaqquijarissa inajaro” quinaraha pohnadeni huapima naco pina noccodeni sirissa quinajari. Pohnama noccodeni siri ohuahadeni jahinedeni dsopide toquejenajari. Nadsama nocco siri pamahapa pohna tesse jahine dsopide tojaridsadsapa odi tohuajarodsa pohnadeni pamahapa tocatojedsimera tahi. Aja pariseodenipa

pina najaro imassa inanamanajaro. Paji, pohuadenidsa tiquejemamana tejeraji, onajaro -nade Jeso.

¹⁵ Nadsa Pedropa Jesodsa huati tajari: — Ia Maride, ticca marinaja aji “Huapima itapari dappi inadsa ibodidsa tojadsapa imasiri toja-jerani” tajaropi ¿nejecoma najaro? -nade Pedro. ¹⁶ Nadsapa Jeso attia: —¿Tiadeni naqui occa marinaja timittamana-jerajaroqui? ¹⁷ Timittamananissa tanijinepi tiadeni mari ocanabaqquipomana. Aja ejeridsa toqquedsi-majari itapari. Itaparipa idsonedsa totoqquedsima najari. Dsotode miji inadsapa toqqueqquimajari. ¹⁸ Naraha ejeridsa qquenajaropi etti. Ettipi ibodi huatodsa ebenojine huati huati inajaro. Najaro huati huati inajarojinenena imasiri totoja najaro. ¹⁹ Ajina, tabaccorehe huapimapi madija pohua bodidsa ahuatomadsa pohua todossenidsapa imasiri inajaro. Najaropi pina madija imasiritohui pohua bodi huatojari, madija inanadsoqquehijine tohuini najari, madija amoneje cajiraha amoneje onihi ajade tohuini najari, amoneje maqqui cajiraha maqquideje ohuaha najade tohuini najaro, maqquideje tabiraraha amoneje ajade tohuini najari, amoneje tabiraraha maqquideje najade tohuini najaro, najaro ima madija pohua bodidsa ahuatomadsapi imasiri toja tani. Tabaccorehe onihi naqui pina botie tohuini najari, maidsehe huati tahijine tohuini najari, madija tatamasso nahijine tohuini najari. ²⁰ Najaro tabaccorehe huapimajinepi madija pohua bodi totabaccorajari. Najarojinena madija imasiri ihinanamana

najaro. Naraha idsepe ssahuarani ijipadsapi ibodidsa imasiri toja-jerani. Aja jodiodeni marinaja pariseodsa jehe quinajarideni, jodiodenicca marinaja maridedeni tedseje attidenipa: “Ia ehuerani icca ima Diodsa tohuirenijinepi huajijiradsa idsepe ssahua ssahua inadsa tohuirenijine” quiquinanaraha ibodidsa imasiri ecahuadsapi idsepera ssahua inaraha imapi tohuirenijine ssamo tani –nade Jeso.

*Jodio madija jeraraha Jesodsa pajissa najaro
Maraco 7.24-30*

²¹ Nadsapa nahihuaaji mari icanabaqquia jicadsapa Jeso toccajari. Odsa panani pamehe Tiro, Sidohuaji toccajari. ²² Nanihuaicca amonejepi Canahacca madija, jodio jerani. Najaro amoneje bacco ijidsade. Jeso qqui tadsapi huahua huahua najaro: —¡Ohua Medsede, tiapi maittaccad-samacca tamine Dabi Potemahi tijajaro! ¡Otohui teti huana taji! –nade, johua johua nadsa. —Occa ejedeni tocorime cajijaro. Najarijine ponipi ocasserani ahuadsanapojaro –nade.

²³ Naraha Jeso ponidsa huati tajarajari, joma najari. Nadsapi ia pocca dodosse tabaqquia pohuadsa huati inajaro: —Apaja, ponidsa: “¡Ticcaniji!” taji, inajaro. Aji inattihuaaji huahua huahua namissajonajaro tocasserani nani –nade. ²⁴ Nadsapa Jeso attia: —Occa Abi Dio ohua dosse naronajaripa Isaraeri potemahi jodiodenidsara ohua dosse naronajaride. Najari-denipa pina edede jano toquejenajarissa quinajari –nade Jeso.

²⁵ Naraha ponipi dissera tadsapi joppa namisajaro, tossoniquima, Jeso pohua baccohuaji poni pitonidsa huittajaro. Poni attinipi: —¡Ohua Medsede, ohua acco ticamaji! —nade. ²⁶ Nadsapa Jeso ponidsa huati tajari: —Madija ohuaha jodio quejena-jarajari tahide acco ocamabaqquipohuijinepa bica tejerani. Najaro imapi pina madija pocca ejedenidenidsa dsamatapa da inaraha idinidsa pocca ettedsana da inajarissa najaro. Naraha Diocca madija jodiodenina tahide acco ocamabaqquipohuijine bica tani —nade Jeso.

²⁷ Nadsa Jeso attidsa ponipi: —Pajissa, ohua Medsede, naraha ettepa pohua jinedecca huahuanaridsa dsamatapa tabotto catojadsapa pohua naco jipajari. Jodio ojajeraraha ohuadsa ticca acco camehe badsira tehe tinanaji, onajaro —nade Jesodsa.

²⁸ Attini nema nadsapi ponidsa Jesopa: —Jehe, amoneje, tiapi ohuadsa jehe tanissa tajaro. Ohuadsa tibodipi: “Jehe, Jesopa occa ejedeni inanomihijine pajirahi” tadsapi ticca huatinaja tiadsa onanana, onajaro —nanaja nadsapa ponicca odsahuaji bedeni tonomijaro.

Jesopa huapima inanomiridsa-baqquijari

²⁹ Jehe, Jeso toccanidsapa Carireacca coridsahuaji toqquedsippanipomajari. Coridsa poni huapi toccabacossajari, ssonohuaji toqqemoradsapa nahi ssonodsa huittajari. ³⁰ Nadsapa madija huapima Jesotohui ssonohuaji jahimorajari. Jesodsa bacco nimoramanajaridenidsapa isso siri quejemamana, nocco siri quejemamana, biji siri

quejemamana, ebena siri quejemamana najari. Comaqquri najari huapi taha quejemamanajari. Nadsapa Jesohuaji comaqquri najarideni pohuadeni tesse eccajonabaqqui-manadsapa pohua baccohuaji ettaridsamanadsa inanomibaqquijari. ³¹ Inanomibaqquidsapa madija nahidsa queriqquimanajarideni qqui toquinadsa jabojo quinajari. Aja ebena siriraha atti nimanipomajari. Biji ttomoraha biji cajimanimanapomajari. Isso siriraha issodeni biquemaniridsa-manadsapa jahiridsapomajari. Noccodeni siri naco noccodeni biquemanimanajari. Nadsapa madija attidenipa: —¡A, Isaraeri potemahi jodiodenicca Diopa bica tahi, deni tojahi! —quinajari, huapima Diodsa huatidsemanadsa.

Jeso madija 4 mil quinajarideni inajipabaqquijari

Maraco 8.1-10

³² Nadsapi ia pocca dodosse tabaqqui iquejenajaro Jeso itohui huahua napomadsapa iadsa huati tajari: —Madija huapimatohui ohuati cahanariri canani. Huada 3 nehe ohuadsa jahiridsadsapa pohuadeni tapari jicajari. Nema nanipi pohuadenidsa: “Jai tijaniji” onanijine jipera onajaro. Pohuadenipa pemi huatiacossaja camarana —nade Jeso.

³³ Naraha pocca dodosse tabaqqui iquejenajaro ettipi: —Naraha iapi madija madide nohuerahihuaji iqueriqquidsapi ¿nejecohuaji madija huapima jipamanahijine dsamatapa mitta inapadsaja? —inajarode. ³⁴ Naraha iadsa Jesopa: —¿Nejecoma naha pan ticajimanani? —nade.

Nadsapi ettia: —Pan 7 naha icaji, aba bedi pamaha icaji nani -inade.

³⁵ Nadsapa madija huapimadsa Jeso huati tajari: —Jari, jassi tinaridsaji -najari. ³⁶ Nadsapa pan 7 naha pohua dsepedsa inacca, aba pamaha idsaba nadsa Jesopa Diodsa huati tajari: —Jehe Abi Dio, epejeni, ticca daniji iadsa bica tahi -nadsapa pan icanabobiridsajari. Icanabobiridsadsapa pocca dodosse tabaqquideni iadsa da inabaqquijari. Iana madija huapimadsa da inabaqquiridsajaride. ³⁷ Nadsapa Jeso canahatori canajarijine pan, aba najari tohuapidsa madija huapima jipamanadsapa accararidsa-manajari. Jipamanahissa taraha mota tojajari. Pan bobi, aba ime mota iana inaccaniridsadsapa quiqui 7 naraha ijiridsade. ³⁸ Aja jipamanajaridenipa maqquideje 4 mil quinajari. Denima poccadeni amoneje, poccadeni ejedenideni naco jipamanajari. ³⁹ Dsotode madija huapimadsa Jeso attipa: —Jehe, jidapanana jai tjaninissa tana -najari. Nadsapa Jeso canoadsa toqquedsanipomajari. Coridsa jippehuaji jaijadsapi dsama Macadao-huaji bacco inajaro.

16

Pariseodeni, sadosodeni tedsejepa: —Jeso canahatori canahi qqui inana -quinajari

Maraco 8.11-13; Roca 12.54-56

¹ Jesopa dsama Macadaodsa bacco tadsa nahicca Isaraeri potemahi jiodideni mota mari-naja onini pariseodsa jehe quinajarideni, mari-naja onini sadosodsa jehe quinajarideni tedseje

pohua qquide jahijonajari. Pohuadeni bodipa: —Jeso nattome inana, pocca ima tossamonijine -quinadsapa Jesodsa huati toquinajari: —Jeso, pajissa Diocca dacorehe ticajidsapi memehua-jicca nahatohue bicabote ahuato tinanaji. Qqui inana -quinade. ² Naraha pohuadenidsa Jeso attipa: —Tiadenipi maji tocca-cca nadsa memehuaaji maccohua ssire-re nani qqui tiquinadsapi: “A, dsemassapi meme bica tanitohui” titiquina najaro. ³ Aji dsidsidsamassa naqui memehuaaji maccohua diji tadsa tettidenipi: “Jidapapi jojode, passo caji tani” titiquina najaro. Meme qquide nahatoqquiri tiquinaraha aji jidapanacca ima dsati toजारopi qquide ssamoqquiri tiquinani. Diojine ajijaro dsamadsa Cristo-Mesia dsepe ijiridsahi tiadenidsa ahuato taraha tiadenipi ticahattera-jerajaro -nade Jeso. ⁴ —Jidapana timadimanajarodeni tabaccoraqquiri tiquinehe timadimanajaro. Tahidepi tettideni: “Diocca iquejenani” tiquinaraha dsotodepi Pohua Atti tinebomanajaro. Tiadenipi ocanahatoriri cananijine tohuira huati tiquinaraha occa nahatohue onahatona onejerani. Naraha ocanahatoriri cananicca ima ojariena qqui tiquinani-tohui. Najaropi Jonasocca imassa najaro -nade Jeso. (Aja pohua atti nama najaripa Jonaso pina huatijarissa naraha Diojine tossiajadsa madipomajari.)

Nadsapa nahihuaajicca madija inebobaqquidsa Jeso toccapomajari.

—*Paji, marinaja onini pariseo, marinaja onihi*

onini sadoseo naqui tiadenidsa toja-jerana -najari Jeso

Maraco 8.14-21; Roca 12.1

⁵ Nadsapi Jeso pocca dodosse tabaqquideni ia huapimapi coridsa jippehuaji jaijaraha iji-panijine itapari eti ajimadsapi dsojo inajarade. ⁶ Nadsama nahi canoadsa jassi idsadsa Jeso iadsa huati tajaride: —Tetideni huatoji. Marinaja onini pariseo, marinaja onihi onini sadoseo naqui pina pan ssaja tahijine quequejema tahimarissa najaro. Paji, najaro tiadenidsa toja-jeranjine tiadenipi dacoco tijiraji, onajaro -nade Jeso. ⁷ Pohua atti nama nadsapa iara ojidsa huati icanirere canade: —¿Nejecotohui pohua atti nama najari? Aji ijipanjine pan icappirajarocca huati tajarirana -inade. ⁸ Naraha Jesopa ibodi nahato tadsa huati tajari: —Jaho, ticcadeni jehenijipi badsira tani. ¿Nejecotohui ohuadsa: “Jehe, Jesopa ia tonajipabaqquihijine pajirahi” tiquinejerani? ¿Nejecotohui pan ticappiramananicca imadsara imahaha ticana-jaro? ⁹ ¿Nejecoma nadsa ticahatteranjine? Tibodideni huatomaji. Madija 5 mil quinaraha pan 5 naha dside onariridsadsa jiparidsamajaride. Mota tojadsapa quiqui ijiridsahi qqui tiquinaraha ¿tetideni ajimajaroqui? ¹⁰ Aja madija 4 mil quinaraha pan 7 naha dside onariridsadsa jiparidsamana-pomajaride. Motapa quiqui ijiridsahi qqui tiquinapomaraha ¿tetideni ajimajaroqui? ¹¹ ¿Nejecotohui occa mari-najadsa tibodideni huatoma-jerajaro? Pancca ima huati onejerapa. Aji pariseo, sadoseo najaro marinajassa tinanamana-jeranjine dacoco tiji-

raji, onajaro. Najaro marinaja pamehepi tojarib-aqqi tani. Pina pan ssaja tahijine quequejema tahimarissa najaro –nade Jeso.

¹² Nadsana ibodi huatomajaro. Jesopa pan ijipanijinecca quequejema tahimaridsa ia mari tocanabaqquijaripa marinaja pariseo, marinaja sadoseo iadsa toja-geranjine huati huati tajari inade.

—*Jesopa Cristo-Mesia –najari Pedro*
Maraco 8.27-30; Roca 9.18-21

¹³ Dsotode Jeso, pohua huatimadedeni ia in-adsa odsa panani Sesarea de Piripohuaji jai-jajaro. Jahui jaijadsa Jeso iadsa huati tajari: —Madijapa ohua Madija Bedi otahimari huati huati nanaridsamana nadsapa ohuadsa attideni ¿nejecoma nejecoma quiquinanajari? –nade Jeso iadsa.

¹⁴ Naraha ettipi: —Tiadsa madija motapa: “Hvano Baotista tijani” quiquinanajari. Ohuahadenipa: “Maittaccadsamacca Dio Atti cacomerabote Eria tijani” quiquinanajari. Ohuahadeni naco: “Maittaccadsamacca Dio Atti cacomerabote Jeremia tijani” quiquinanajari. Madija ohuaha attideni naco: “Maittaccadsamacca Dio Atti cacomerabote ohuaha tijani” quiquinanajari –inade Jesodsa.

¹⁵ Nadsapa Jeso iadsa huati tajari: —Naraha tiadenidsapi ¿nejecojari ojani? –nade.

¹⁶ Naraha manaco Pedro huati tajari: —Tiapi Cristo-Mesia tijani. Dio camitta tajari Bedi tijani –nade.

¹⁷ Nadsapa Pedrodsa Jeso attipa: —Jehe Ssino, tiapi Huanocca ejedeni tijajaro. Diopa tiadsa ima

bicani inanajaro. Aji otahimari nahato tinajaropi madijajine jerani. Occa Abi memehuaji madijarina otahimari Cristo-Mesia ojani tiadsa ahuato inanajaro. ¹⁸ Jidapapi tia onipi “Pedro” onajaro. (Ettidsapi: Siba, inajaro.) Tiapi otahimari mari ticanabaqquidsapa ohuadsa pajissa quinajardeni tohuapiridsahitohui. Nadsapi otahimaridsa quequeriqquimana nahijinecca tojaridsanijine. Najaro otahimaridsa quequeriqquimana nahiccapì dacorajaro, pina sibassa najaro. Amossi nanijine ssamo tajaro. Dsoqquehecca dacorehe naqui otahimaridsa quequeriqquimana nahicca inajicanijine pajira-jerajaro. ¹⁹ Pedro, occa dacorehe tiadsa onananitohui, tetti dacoranjine. Najaropi pina Diocca cacahuehecca noccobijicca pipico tiadsa da onajarissa nahitohui. Madija otahimari mari ticanabaqquidsa pajissa quinadsapa Diocca cacahuehedsa toquejenahitohui. Pina Diocca cacahuehecca noccobiji pohuadenidsa ticanahabajarossa nanitohui. Tetti dacorajarojine naqui ajijaro namicca imadsa: “Jehe, bica tani” tadsapi Dio memehuaji madijari naco: “Jehe, bica tani” nahitohui. Naraha ima onihidsa: “Najaropi poni, bica tejerani” tadsapi Dio memehuaji madijari naco: “Poni, bica tejerani” nahitohui –nade Jeso.

²⁰ Nadsapa pohua huatimade iadsa Jeso pohua attipa: —Ohuapi Cristo-Mesia ojani madija ohuadenidsa tecomamanaccana –nade.

*Jesopa pohua dsoqquehicca ima huati tapojari
Maraco 8.31–9.1; Roca 9.22-27*

²¹ Dsotode Jeso pocca dodosse tabaqqui ia mari tocanabaqquidsapa ajama najaride: — Occa Abicca dossenijidsa odsa panani Jerosarehuaji occanitohui. Nanidsa jodiodeni ime jochuideni, dada toqquimade taminedeni, jodi-odenicca marinaja maridedeni quinajarideni-jine najidsohue imeni ocasserani onahananitohui. Nadsapi ohua inanadsoqqe-mananitohui. Naraha ohua ppa idsamanaraha huada huatinimade tojari nadsapi Abi Dio ohua nahatonihitohui –nade Jeso.

²² Naraha Pedroa Jeso iacca-cca nadsa huati tajari: —Jidacca ima huati tinajaro ticca ima nema najaro imapi huati tina tejeraji. Diopa tidsoqquenijine jipera tahi. Dio tia cacahuahi –nahi nade Pedro. ²³ Naraha Jeso tahide huajanidsa Pedrodsa huati tajari: —¡Paji, otedsejemapi! Ohua teccocco tejeraji, onajaro. Tettipi pina maidsehe jinede Satana attissa nani. Diocca dossenijidsa ibora onanijineraha tettidsara ibora onadsapi Dio jipa tahicca onana-jeranitohui. Tiapi Dio jipa tahicca ssamo tinani. Madija tohuini quinajariccana nahato tinajaro –nahi nade Jeso Pedrodsa.

²⁴ Nadsapa Jeso pohua huatimade iadsa denima huati huati tajari: —Aji “Jesocca madija iquejenana” tiquinadsapi tiadeni tohuini tiquinanicca tohui tetideni ajimamanaji. Ohuadsara disseraqquri tiquinaji. Madija tiadenidsa: “Ahua porimacossanidsa tidsoqqeji” quinadsa naco: “Jehe, odsoqqueni bica tani. Jeso onebo-jarahi” titidsanapomana nana, onajaro.

²⁵ Tiadenipi ticcadeni madie ohuadsa tecco-

ramanadsapi madija tiadeni tonajicabaqqui-manaraha camittehe jiquejeranicca ticajimana-dsanaponitohui. Naraha madija ohuahapa pocca madie ohuadsa eccocodsapi, pina ajijaro namidsa madi-dsanapohuijine tohuinira nadsapa najaripa dsoqquehitohui. Dsoqquedsapa camittehe jiquejeranicca caji-jarahitohui –nade Jeso. ²⁶ —Madija naco ajijaro namicca biquehe tohuini madidsa, ajijaro dsamacca ima deni tojanicca tohuini madidsa naco huapima pohuadsa tojaraha Diotohui najaradsapa nidsa pohua dsoqquedsa jororoni jiquejeranicca dsori tajarahitohui. Nadsapa pohua cajijaricca huapima ponima tojanitohui. Puhuapa pohua cajijariccdsa camittehe jiquejeranicca mitta inanijine ssamo tani. ²⁷ Naraha ohuapi Madija Bedi ojajaroa nidsaranibote Abi Dio ssiejenema pocca dodosse tabaqqui memehujicca tedseje occaronapomanitohui. Nadsapa madija madihissa tajari pocca madie tonanabicadsa Diodsa dsepe ijijaripa nidsa pohuadsa denima bica tanicca da onanitohui. Madija ohuadsa dissera tajarajari Diodsa badsira tehe dsepe ijijaripa bica tanicca badsira tehe pohuadsa da onanitohui. Naraha madija ima bica tajarodsa dsepe ijijaradsapa occa daniji cappirahitohui. Madija ima tabacora tajarodsa dsepe ijijaripa occa najidsohue cajihitohui. ²⁸ Ohuapi pajissara tiadenidsa huati onajaro: Ajidsa tidomodeni huajaro motadenipi tidsoqquemana-jeraccadsama ajijaro titedsejemadenicca ima qqui tiquinanitohui. Najaroa aji ohua Madija Bedi ojajaroa nidsaranibote madija ohuacahuabaqquihijine occa deni tojehema oc-

caronapomanitohui, onajaro –nade Jeso.

17

Jeso assire tojidsa, jidseremani najari

Maraco 9.2-13; Roca 9.28-36

¹ Jeso pohua tedsejemacca ima huati tahi nattini huada 6 nadsa ssonohuaji Jeso toqqemoradsapa Pedro, Satiaco, Huano quinajari-denira iaqqemorabaqquijari. Jai tojemoradsapa ssono tetepihuaji bacco tomoramanajari.

² Nahidsa qqui toquinanaja Jeso pano todsibehijaro pina maji ssiejenessa najari. Pocca etero naqui tonopojaro pina ssiaja tajarossa najaro.

³ Nadsapa qqui toquinanaja Eria, Moisesi tedseje Jesodsa ahuatoma-manadsa imahaha canajari. (Pohuadenipa maittaccadsamacca Dio Atti comeraqqui najarideni.)

⁴ Nadsapa Pedro Jesodsa huati tajari: — Ohua Medsede, iapi ajidsa iquejenadsa bica tani. Ticcadeni odsa huahuaqquide 3 canehe inahatona. Nadsapi tiadsa, Moisesidsa, Eriadsa cananijine –nahi nade Pedro. ⁵ Pedro huati huati nanaja pohuadeni tetepihuaji essen dsibehi tajararo ccaronajaro. Ccaronadsapi pohuadenidsa ijihujanijaro. Nadsapa nahi essen bodidsa atti qquenajaro: —Ajaripa occa Ejedeni. Pohuadsa ohuati huana tajararo. Pocca ima bica tajarojine ohuatidsejaro. Pohua atti timittamananissa taji –nahi nade Dio.

⁶ Nadsapa Pedrodeni atti mohuini mitta-manadsa cappinamanadsapa pohuadeni baccohuaji domodeni pona najari. ⁷ Nadsapa Jeso pohuadenihuaji ccanijari. Bara inabaqquidsa

pohua attipa: —Titehemamanaji, ticappinamana tejeraji -nahi nade. ⁸ Nadsapa totehemanadsa qqui toquinanaja Jesodsa madija ohuahapa nohuerajari. Pohua motta hua canajari.

⁹ Nadsapa ssonohuaji jahidsippanidsa Jeso pohuadenidsa huati tajari: —Aji ssono tetepidsa qqui tiquinajarocca imapi tecomamanaccana. Ohuapi Madija Bedi ojajaroa nidsa odsoqqueni nattini onahatonidsana najaro ima tecomermananijine bica tani -nahi nade.

¹⁰ Nadsapa Jesodsa huati toquinajari: —¿Nejecotohui jodiodenicca marinaja maridedeni attipa: “Cristo-Mesia ccajona-jaraccadsama Dio Atti cacomerabote Eriana tahide ccanipohuitohui” quiquinanajari? -quinahi nade pohua huatimade 3 quinajarideni.

¹¹ Nama quinadsapa Jesoa: —Pajissa, tahidepa Eria ccanipohuitohui, ima huapima icattermaridsaponijine. ¹² Naraha ohuattipi: Eriapa ccanipode, onajaro. Aja Eria dsoqquejari ccanipojararaha madija ohuaha pina pohuassa najari ccajonadsa ima icattermaridsapode. Naraha pohuadsa noccodeni jidsaqquri nadsa nacasserehe pohuadsa inanamanade. Najarossa najaro nidsa ohua Madija Bedi ojajaroa ohuadsa naco nama quinadsapa ocasserani onahananitohui -nahi nade Jeso. ¹³ Pohua atti nama nadsapa pohua huatimadedeni bodideni huatoma-manajari: —Ja... Jehe, Eria tahimariraha imapi Huano Baotistana paja. Pohuana madijacca ima cattemade ccaridsapode -quinahi nade.

Ejedeni bodidsa tocorime madidsaraha Jeso dosse ininejari

Maraco 9.14-29; Roca 9.37-43

¹⁴ Nadsapa Jeso, pohua huatimade 3 quina-jarideni tedseje jahidsippanidsapa madija to-queriqquihihuaji bacco nanimanajari. Nahidsa madija ojaria Jesodsa huati tahijine ccajonajari. Jesohuaji bacco najonadsapa pohua bodi: — Jesopa deni tojahi, ohuapi ajimani ojani -nadsa Jeso baccohuaji pohua pitodsa huitta tocat-tedsa najari. Nadsapa Jesodsa huati tajari.

¹⁵ Pohua attipa: —Ohua Medsede, occa ejedenidsa teti huana taji. Huatiajojo comani cajijari. Ocasserani imeni inahanajaro. Najaro comani quidsa nadsapa pitora pitora naridsa-jari. Dsippodsa naco ssonidsanaja naridsapohui nanaja najari. Passodsa naco je taja naridsapohui nanaja najari -nade. ¹⁶ —Nadsama ticca do-dosse tabaqquidenidsa occa ejedeni ohuaccajonajari naraha inanomimanahijine ssamoqquiri napa -nade imehi atti. ¹⁷ Nadsapa Jesoa: —Jaho, madija huapima Diodsa jehe tiquinanissa tejerani. Ajijaro namicca ima bica tejeran-icca ticajimaneje najaro. Tiadeni mari mari ohocanabaqqi naraha ¿nejecoma nadsa tica-hatterapadseje? Ticcadeni jeheniji pajiranissa tejeradsapi ohuadsa ocassera taraha ¿nema nehe onahana-dsanaponijinequi? ¡Jari, ticca ejedeni ohuadsa teccajonajo! -nade Jeso.

¹⁸ Nama nadsapa Jesohuaji ejedeni coma tajari eccajonamanajari. Nadsapa Jeso ejedeni bod-icca dosse ininehijine huati tajari: —¡Tocorime tabaccorabote! ¡Ejedeni tinebodsa tiqquenaji,

onajaro! –nade. Nadsapa qqunenadsa amadsati ejedeni coma tajaripa tonomijari.

¹⁹ Nadsapi dsotode ia pocca dodosse tabaqqi ia motta Jesodsa huati inade: —¿Nejecotohui iaha ajajari ejedeni bodicca dosse ininehijine ipajira-jerapa? –inajarode. ²⁰⁻²¹ Naraha Jeso pohua attipa: —Tipajiramana-jerajaropi tibodideni Diodsa jehe tiquinanissa tejerajaro. Pajissara tiadenidsa huati onajaro: Ticcadeni jeheniji badsira tehe pina mostaza nocco badsira tajarissa nehe ticajimanadsapi ssamo tanicca tinamananijine tipajiramananitohui. Pina ajaro ssonodsa huati tiquinadsa: “Ajiccahuaji ticcaji” tiquinadsapi tettidenidsa ssono poni ehuerani toccanitohui, onajaro. Nadsama ticcadeni jeheniji dacoradsapi tiadenidsa ima ssamo tanicca nohueranitohui, onajaro –nade Jeso.

Jesopa pohua dsoqquehicca ima huati tapomajari

Maraco 9.30-32; Roca 9.43-45

²² Nani dsama arobeni Carireahuaji Jeso tedseje jaijaridsadsa iadsa Jeso huati tajaride: —Aji ohua Madija Bedi ojararopi nidsa dsotode madija ojaria ohua ccaccoradsapa madija dsepedenidsa ojanitohui. ²³ Nadsapi ohua inanadsoqque-mananitohui. Ohua ppa idsamanaraha huada huatinimade tojari nadsapi Abi Dio ohua nahatonihitohui –nade Jeso. Najaro ima huati tadsapa ibodi qquedsa nade.

Diodsa dada toqquimahuaji cacahuanijine madijacca dsiniro mota nanaccadenicca ima

24 Nani odsa panani Capernaohuaji bacco inanidsapi iahuaji dsiniro nanaccadedeni bacco quinajari. Pohnadenipa madijacca dsiniro mota ihinaccamana najaro, Diodsa dada toqquimacca odsa ecahuamananijine. Nadsapa Pedrosda huati toquinajari: —¿Nija? Tiadeni maridepa pocca dsiniro mota Diodsa dada toqquimacca odsa cacahuanijine ¿da da nattaco? —quinahi nade. 25 Naraha Pedropa: —Jehe, da da nahi pohuapa —nahi nade.

Dsotode Pedro odsahuaji qquedsimanidsapa Jeso dsinirocca ima Pedrosda huati tojidsapojari: —¿Nija Ssino, nejecoma tani tibodi? Ajijaro namicca tamedeni ¿poccadeni madijacca dsiniro mota ihinaccamana najaroqui? ¿Madija ohuahadeni poccadeni dsamadsa madimanajaricca dsiniro motana ihinaccamana najarorane? —nade. 26 Nadsapa Pedro ecomerajaro: —Dsama onihicca, dsama onihicca jahijonajaridenicca dsiniro motana ihinaccamana najaro —nade. Nadsapa Jeso atti: —Nama nadsapa tamine pocca dsamacca madija paca paca quiquinanajarahi. 27 Naraha iapi dsama onihicca madija iquejena-jeraraha Diodsa dada toqquimacca dsiniro nanaccadedenidsa ima ocassera tejeranijine pohnadenidsa dsiniro da inana. Jari, aba corode coridsahuaji tiqquedsippaji. Tahidecca huana tapojari ajaridsa qqui tana. Nanidsapi dsiniro qqui tinanitohui. Najaro dsiniro tididsa dsiniro nanaccadedenidsa da tinadsapi occa, ticca naqui pajiranissa tanitohui —nade Jeso. Nadsapa Pedro Jeso attissa inanajaro.

18

—¿Nejecojarina deni tojajari? –quinajari
Maraco 9.33-37; Roca 9.46-48

¹ Nadsapi ia Jesocca dodosse tabaqqui Jeso pohnadsa huati inajarode. Ettipi: —Dio memehuaaji madijaricca cacahuehedsapi ¿nejecojarina deni tojajari? –inajarode. ² Naraha Jesopa ejedenitohui huahua nade. Ejedeni ccajonadsapa idomo huahuajanini nocconidsa ejedeni inahua najari. ³ Nadsapa Jeso huati tajari: —Pajissara tiadenidsa huati onana: Tibodi pina ejedeni bodissa nanijine tecajiqquimerajeradsapi Diocca cacahuehedsa tija-jeranitohui. ⁴ Diocca cacahuehedsa madija denima bica tajaripa: “Deni ojani” najarajari. Pohnuapa pina ajajari ejedenissa najari. Pohnua bodipa: “Ohuapi ajimani ojani, Diodsara ibora onani” nanaja najarina deni tojajari Diodsa. ⁵ Ajajari ejedenissa najaridsa tetideni huanaqquri nadsapi ohuadsa naqui tetideni huanaqquri najaro –nade Jeso.

Imasiri tinanadsapi oppina tanihuaji ticcanitohui

Maraco 9.42-48; Roca 17.1-2

⁶ Jesopa denima huati huati tajari: —Nadsama madijapa pohnuajine ohuadsa jehe quinajarideni imasiri inanamanadsapi pohnuadsa najidsohue oppina tanicca ssonarinitohui. Ejedeni ohuadsa jehe quinajarideni naco madija imasiri mamaridejine imasiri tocahatteradsapa aja imasiri mamaride pohnuadsa najidsohue oppina tanicca ssonarinitohui. Pina ajijaro imassa najaro: Siba ccanajabote pohnua mattodsa ssoque dsanadsa

passo imeni dsaja tanihuaji je tahijine cco todsippadsapa oppina taraha najidsohue den-ima oppina tanicca pohnadsa ssonarinitohui. ⁷ Jaho, ajijaro namicca imasiripi jiquejerani. Aji namidsa timadimanajaropi ima tinanamananijine caji tani. Paji, nema najarodsa imasiri tinanamana tani. Naraha madijajine imasiri tinanamanadsapi pohnadsa ima denima oppina tanicca ssonarinitohui. Madija nama najaripa manaco Diona inajidsohuitohui.

⁸ —Nadsama imasiri tinana-jeranijinepi tibodi daco tijiradsa poni taji. Pina tidsepedsa imasiri tinanabote naraha daco tijiradsa poni taji. Nema tadsapi pina tidsepe ca ticajidsajarossa najaro. Tidsepe cajarie amossi canaraha Diocca cacahuehedsa timadidsapi tetidsenitohui. Naraha imasiridsa dissera tinadsapi pina tidsepe capamehe ticajijarossa naraha jororoni jiquejeranihuaji tia coro todsimahitohui.

—Nadsama imasiri caji tanihuaji ticcanijine naqui tohuini taraha poni taji. Nema tadsapi pina temori ca ticajidsajarossa najaro. Temori cajariraha Diocca cacahuehedsa timadidsapi tetidsenitohui. Naraha imasiridsa dissera tinadsapi pina temori capamehe ticajijarossa naraha jororoni jiquejeranihuaji tia coro todsimahitohui.

⁹ —Nadsama tinocodsa naqui tohuini tanicca qqui tinadsa imasiri tinananijine tohuini taraha daco tijiradsa poni taji. Nema tadsapi pina tinocco huari, joca, jeo, coro tinajarossa najaro. Tinocco ojariraha Diocca cacahuehedsa timadidsapi tetidsenitohui. Naraha imasiridsa dis-

sera tinadsapi pina tinocco pamehe ticajijarossa naraha jororoni jiquejeranihuaaji tia coro tod-simahitohui -nade Jeso. ¹⁰⁻¹¹ —Tibodideni tet-tidenima tiadeni tecahuamananissa taji. Madija ohuadsa pajissa najaridsa tettidenipi: “¡Ssamo tinani!” tiquina tejeraji. Occa madija ajamani tinanabaqquimana tajarajo, onajaro. Occa Abi Dio memehuaaji madihidsapa pocca dodosse tabaqqui occa madija cacahuade madimanajari. Najaridenipa Abi Dio Pohua pano naco qqui qqui dsanapomanajari -nade Jeso.

Edede amossi najari tahimari

Roca 15.1-7

¹² Nadsapa Jeso ia mari tocanabaqquijari: — Ajjaro ima tibodidenidsa ¿nejecoma tiquinani? Jari, tiadenipi ticcadeni edede 100 naha tica-jimanadsapa onideni hua tiquinadsa ojaria amossi nadsapa ¿pohuatohui qquide jai tija-jeraqui? Jehe, edede jinedepa pocca edede qquide toccahitohui. Pocca edede 100 naha cajiraha ojaria amossi nadsapa 99 tojjari. Pocca edede 99 naha huamonihuaaji inebobaqquid-sapa ojaria amossi najari qquide toccahitohui. ¹³ Pocca edede bacco inanidsapa huatidsehitohui. Pocca edede 99 naha amossihuaajaradsa naco huatidse tahi. Pajissara tiadenidsa huati onajaro: Edede jinedepa pocca edede amossi najari bacco inanidsapa denima huatidse tahi. ¹⁴ Najarossa najaroa ticcadeni Abi Dio memehuaaji madijaria pocca madija ojaria pocca cacahuehedsa amossi nahijinepa jipera tajari.

Madijapa Dio Pohnadsa tohuajiraha pohnadsa tojanipomahijine jipa tajari –nade Jeso.

Imecote iadsa imasiri inanaraha pocca imadsa eti ajima dsanaponijinecca ima

Roca 17.3

¹⁵ Jesopa denima huati huati tajari: — Madija ohuadsa jehe najari timecote tojaraha tiadsa imasiri inanadsapi pohua ojari nadsa mohuaradsa huati ticanana: “Ohuadsa tijine bica tejerani” tana. Nadsapa pohua cacomeradsapa: “Jehe, pajissa tiadsa nema onanade. Ojine bica tejerani. Jidapapi nema onapoma-jejanitohui” nadsapa manaco pohnadsa: “Jehe, epejena, bica tani” tana. Nadsapa timecote tedseje ticatidserapomanijine. ¹⁶ Naraha timecotedsa mohuaradsa huati tinaraha mitta-jaradsapa timecote ohuaha pamaha tiaccabaqquina, pohnadeni tedseje pohnadsa huati tiquinanjine. Pohnadeni naco pocca ima mittamanahijine. Nadsapa madija pama itide, huatimade tojari nahitide nahatoto tadsapa bica tahi. Mohuaradsa imahaha ticanadsa pohua huati ticanamananaja mittadsapa: “Jehe, epejena” nadsapa timecote tedseje ticatidserapomanijine. ¹⁷ Naraha najarideni atti mitta-jaradsapa otahimaridsa queriqquimana najarideni tedseje pohnadsa huati tiquinaji. Pohnadeni atti mittadsapa pocca ima tobicanitohui. Naraha otahimaridsa queriqquimana najarideni atti mitta-jaradsapa pina Diodsa jehe quina-jarajaridenissa nahijine. Imasiri cajijari. Pohnapa pina romanodenicca

taminecca dosseniji dsiniro nanaccadenissa najari –nade Jeso.

¹⁸ Iadsa denima huati huati tajari: —Pajissara tiadenidsa huati onajaro. Ajijaro namicca imadsa: “Jehe, bica tani” tiquinadsapi Dio memehuaji madijari naco: “Jehe, bica tani” nahitohui. Naraha ima onihidsa: “Najaropi poni, bica tejerani” tiquinadsapi Dio memehuaji madijari naco: “Poni, bica tejerani” nahitohui. ¹⁹ Pajissara tiadenidsa huati onapomajaro. Ajijaro namidsa tipamehe Diodsa huati tiquinanijine jehe ticaniredsapi occa Abi memehuaji madijaripa ticcadeni huatinaja mittahitohui. Puhuapa ticcadeni huatinaja tiadenidsa inananitohui. ²⁰ Jehe, ohuadsa jehe tiquinajarodenipi tipama nitide, denima tetimade ojaria itide otahimaridsa titiqueriqqui nadsapi nani tiqueriqquinidsa ohua naqui ohoquejema najaro –nade Jeso.

²¹ Nadsapa Pedro Jesodsa tohuajiressidsa pohuadsa huati tajari: —Ohua Medsede, ohueme-cotepa ohuadsa tabaccorehe inanajaro. Dsotode naqui ohuadsa imasiri inanajaro. Dsotode naqui ohuadsa tabaccorehe inanapomajaro. Nama dsanapojari. Naraha ohuapi: Puhuadsa ohuadijerani, onajaro. Dsotode naqui ohuadipomajerani. Dsotode naqui ohuadipomajerani. Nema onapomajaro. Nema onapomajaro. Naraha ¿nema odsanaponijinequi? onajaro. Aji pocca nacasserehe ohuadsa onihi, onihi, onihi 7 nehe bacco tadsapi ¿nadsana pohuadsa ohuadinijinequi? –nade Pedro. ²² Naraha Jesopa: —Paji, nema tejeraji. Nacasserehe onihi onihi onihi tas-

saqquini 70 denima 70 denima 70 dsanaporaha “Manaco” tejerana. Titessecca imadsa teti ajima dsanapona, onajaro –nade Jeso.

Tamine biji accodepa pohuadsa debe najaridsa: —Epejena –najarajari

²³ Jesopa ajijaro namidsa imadinicca ima tad-sajani mari icanabaqquijari. Pohua attipa: — Jehe, Diocca cacahuehecca imapi pina tamine pohua biji accodedenicca cuenta icattermarid-sanijinecca imassa najaro. ²⁴ Taminepa pohua biji accodedenicca cuenta icattermanijine huahua inabaqquijari. Jahijonajari, bacco najonamanad-sapa tamine biji accode ojariana pocca cuenta deni tojadsapi najarina taminehuaji iaqquedsi-mamanajari. Najaripa dsiniro imeni pina 10 mil nehe debe najari. ²⁵ Naraha aja debe najari pocca cuenta paca nahijine cappiradsapa tamine pohua biji accodedeni icadossebaqquijari: “Jari, pocca cuenta paca nahijine pohua dsepetaji nemanehi dsinirotohui da tiquinaji. Nadsama pohua, pocca amoneje, pocca ejedeni naco manaconedenitohui da tinabaqquimanajo, madijacca dodosse tabaqqui toquejenahijine. Nadsapa najari manaconedenidsana pocca cuenta jicani-jine pajirani” najari tamine atti. ²⁶ Naraha tamine biji accode dsiniro imeni debe najari pocca tamine atti mittadsapa nahi tamine bac-cohuaji pohua pitodsa huitta nadsa ojiema huati huati tajari: “Jaho, ohua medsede, nidsa ia da tinabaqqui-jeraccaji. Tia paca onanissa tanitohui, omaidsa-jerani” najari. ²⁷ Nama nanaja taminepa pohuatohui huati tohuanahi nadsa:

“Jehe epejeni. Bica tani” najari. “Jidapapi ticca cuenta oneboni. Epeje onani” najari.

²⁸ —Nadsapa tamine biji accodepa toccaniraha pohua tesse pohuadsa debe najari bacco ijid-sajari. Najaripa pohuadsa badsira tehe debe najari, pina dsiniro ccarara 100 najaro. Naraha tamine biji accodepa pohua tesse pohuadsa debe najari bacco ijidsadsapa pohuadsa debe najari acconi ssiporidsa dama niqui inadsa huadiema pohuadsa huati tajari: “¡Jari, ohuadsa ticca cuenta paca taji!” najari. ²⁹ Naraha pohua tessepa pohua pitodsa huitta nadsa ojiema huati huati tajari: “Jaho, otesse, nidsa tia paca onanito-hui, omaidsa-jerani” najari. ³⁰ Naraha pohuadsa debe najari attidsa jehe najaradsapa: “¡Poni! Ohua paca tejerade. Nadsapi toponi cocorodsa tedsaji. Ticca cuenta paca tanissa tadsana tiqqenanijine” najari. Nadsapa coro idsimajari.

³¹ —Naraha tamine biji accode ohuahadeni pohua tesse inajidsohui qqui toquinadsapa nacasseraqqiri nadsa najaro ima poccadeni taminedsa huati tanimanajari. ³² Nadsapa tamine aja pohua biji accode dsiniro imeni debe najari tohui huahua napomajari. Ccanidsa najaridsa tamine attipa: “Tiapi obiji accode tabaccorabote tijani. Ajina, tiapi dsiniro imeni ohua debe taporaha ohuadsa huati huati tinadsa ticca debe epeje onanajaro. ³³ Naraha tiapi titesse tiadsa debe najaricca debedsa epeje tejerajaro. Ohuapi tiadsa ohuati huana tade. Tia naqui pina ohuassa tadsapi titessecca debedsa epejena tanitohuiraha” najari pocca tamine.

³⁴ Nadsapa tamine huadidsa pohua biji accode inajidsomanahijine dosse inabaqquijari: “Ajaripa ohuadsa pocca cuenta paca najaradsapa tinajidsomana-dsanapojo” najari. “Pocca cuenta nemanehe paca nahissa tadsana toccanihijine, onajaro” najari tamine atti -nade Jeso.

³⁵ Nadsapa Jeso denima mari icanabaqquijari: —Aja, occa Abi memehuaiji madijari naco tiadenidsa nama nahitohui. Timecote tiadenidsa nacasserehe inanaraha tiadenipi: “Manaco, manaco” tiquinadsapi Abi Dio naco ticcadeni tabaccorehe epeje inana-jeranitohui, onajaro. Titedenicca ima tiadenidsa ocassera taraha epeje tiquinaji. Pohuadenidsa pina tetideni huanacquiri naji, onajaro -nade Jeso.

19

Jesopa amoneje nebo nebocca ima mari icanabaqquijari

Maraco 10.1-12; Roca 16.18

¹ Nadsapa Jeso dsama arobeni Carireahua-jicca madija mari icanabaqquia jicadsapa dsama arobeni Jodeahuaji toccajari. Hueni Jordao jippehuaji toccadsapa dsama arobeni Pereahuaji bacco tajari. ² Madija sibema pohuadsa jai tojad-sapa comacquiri najarideni Jeso inanomibaqquijaride.

³ Naraha nahidsapa Isaraeri potemahi jodiodeni mota marinaja pariseodsa jehe quinajarideni Jesodsa jiperaquiri nadsa pocca marinaja inassamomananijine ima najoramanajari. Jesodsa tohuajiressimanadsapa pohuadsa huati toquinajari: —Aja ¿maquideje pocca amonejedsa

jipera tadsa inebodsapi pohuadsa ima nohuer-aqui? –quinade.

⁴ Naraha Jeso pohuadenidsa huati tade: —Dio Atti dsodo nani hua hua titiquina naraha ¿ajijaro ima tetideni ajimamanajarorane? Maittaccadsama Dio dsama inahatoponipi Pohuajinena madija toquejenapodsapa ajima najaro:

“Maqquideje, amoneje tadsajani inahatobaqquijari. ⁵ Nema najarojinea maqquideje pohua bedimenidsa tojadsapa imehi imenidenidsa nebo, pohuadenira madimanajari. Nadsapa pamaraha pina ojarijarissa quinajari” nahi nade Dio Atti Moisesijine dsodo nanidsa.

⁶ Nadsapa assiredeni pamaraha cacajiredsapa Diojine pina ojarijarissa dsanapohuijine. Nadsama Diojine pina ojarijarissa quinaraha caneboredsapa bica tejerani. Madija ohuaha atti noppine caneboredsa naco bica tejerani –nade Jeso.

⁷ Naraha marinaja pariseodsa jehe quinajari attidenipa: —Naraha ¿nejecotohui Moisesicca marinajapi ajima naha? “Maqquideje pocca amoneje inebonijinepi nebohuecca papeo dsodo inadsa ponidsa da inadsa inebodsapi pohuadsa ima nohuerani” nani nade –quinajari.

⁸ Naraha Jeso huati tajari: —Najaropi maittaccadsama ticcadeni idideni huaribodeni sibaqquri nadsa nebohue tohui quinadsapa Moisesi najaro marinaja pohuadenidsa dsodo inajarode. Naraha Dio dsama inahatoponipi amoneje nebo nebocca imapi nohueraccade.

⁹ Tadenidsa huati onana: Ticcadeni amoneje

nebomana tejeraji. Ticca amoneje tinebodsamoneje onihi ticajidsapi imasiri tinanajaro. Diocca dosseniji naqui tecahua-jerajaro. Naraha ticca amoneje maqquideje ohuaha inajadsana “Onebona” tadsa tinebodsapi tiadsa ima nohuerani -nade Jeso.

¹⁰ Nadsapi ia Jeso huatimadedeni pohuadsa huati inade: —Jaho, amoneje ineboni oppina tadsapi ia motta amoneje jirehe imadidsana bica tani -inade.

¹¹ Nadsapa Jeso iadsa huati tade: —Jehe, naraha madija huapimapa amoneje jiraha pajiramana-jarahi. Diojine madija motana najaro imadsa pajiramanajari.

¹² Ima onihi onihi cajimanajaripa amoneje cajimana-jarajaripaja. Mota ojari ojari quinahapa tossonamanapohuidsama amoneje cajimanahijinepa ssamoqquiri najari. Madija motapa pohua ime inajidsomanadsapa amoneje ajade ssamoqquiri najari. Maqquideje motapa pina amoneje ajade pajiramana-jarajarissa quinaha madimanajari. Pohuadeni attipa: “Diodsara idsepe ijidsa icca ima ojari nanijine” quinajari. Ajijaro imapi madija huapimacca jerani. Madija mota ojari ojari quinajaridenicca ima. Pohuadenipa: “Jehe, nema onana” quinadsapa nema ihinanamana najaro -nade Jeso.

Jesopa: —Abi, ticca biquehe ejedenidsa tinanaji -najari

Maraco 10.13-16; Roca 18.15-17

¹³ Nadsapa madija poccadeni ejedeni Jesodsa eccajonabaqqui-manajari, —Jeso tatideni

bara inabaqquidsa Diodsa huati tahijine –quinadsa. Naraha Jeso huatimadedeni attidenia: —¡Ejedenipa pohua! ¡Jesohuaji teccajonabaqquimana tajarajo! —quinade.

¹⁴ Naraha Jeso pohua huatimadedeni attideni mittadsapa: —¡Poni, nema tiquinejeraji! Pohuadeni jahijonana, onajaro. Eccajonabaqquimanahijine tecossamana tejeraji. Madijapa pina ajajari ejedenidenissa quinajarina Diocca cacahuehedsa toquejenahitohui –nade.

¹⁵ Nadsapa ejedeni ojari ojari tatideni bara, inebo, bara, inebo naridsajari. Jicadsapa Jeso toccajaride.

*Madija dsepe sse tajari Jesodsa huati tajari
Maraco 10.17-31; Roca 18.18-30*

¹⁶ Jesopa denima toccaraha madija pohuahuaji ccajonajari attipa: —Nija Mamaride ¿nejeco ima bicani onanadsana camittehe jiquejeranicca bacco onanijine? –nade.

¹⁷ Naraha Jesopa: —¿Nejecotohui ohuadsara ima bicanitohui huati tinajaro? Ima bicani jinedepa Diona paja. Pajissa. Naraha camittehe jiquejeranicca bacco tinanijinepi Dio pocca dossenijidsara ibora tinaji –nade.

¹⁸ Naraha dsabisso attipa: —¿Nejecomanajaro Diocca dossenijidsara ibora onanijine, tajarajo? –nade. Naraha Jeso attipa: —Diocca dosseniji Moisesi dsodo inajarocca nahato tinani. Najaropi ajima najaro: “Madija tinanadsoqquejarajo. Madija ohuahacca amoneje tija tejeraji. Tiboti tejeraji. Maidsehedsa naqui madijadsa ponima ima tinahana tejeraji” nani Diocca

dosseniji. ¹⁹ Onihi naqui: “Ticca abi, ticca amidsa bica tinadsa tinamadibaqquihissa tajo. Tinoriccadsa naqui teti huana taji, pina tia tiadsa teti huana tajarossa taji” nani Diocca dosseniji Moisesi dsodo inajaro -nade Jeso.

²⁰ Naraha dsabisso attipa: —Najaro marinaja huapimapi ohuacahuajonajarode. ¿Naraha ne-jeco imara ohuadsa dsori taccajaro? -nade.

²¹ Naraha Jeso pohuadsa huati tade: — Tipajiranissa tanijinepi ajima taji: Ticcanidsa tidsepetaji nemaneha manaconidsa da tinaridsaji. Nani najaro dsiniropi madija tohuati nahanaqquri najaridenidsa da tinabaqquinijine. Nema tinanadsapi nidsa memehuaji Diocca biquehe tiadsa tojanitohui. “Nema onana” tadsapi ohuadsara dissera tinaji -nade Jeso.

²² Naraha dsabisso najaro ima mittadsapa: — Jehe, nema onana -najarajari. Pohua dsepetajitohui, pocca dsinirotohui huati huana tajari. Pohuapa dsepe sse taja nadsapa bodi ocassera taha toccanide.

²³ Nadsapa Jeso ia pohua huatimadedenidsa huati tade: —Pajissara tiadenidsa huati onana: Madija dsepedeni sseqquri najaridenipa Diocca cacahuehedsa toquejenahijine najo tani.

²⁴ Tiadenidsa huati omanipomana: Pina bani imehibote camellopa etero ssessequi odinidsa toqqequimahijine pajira-jarajarissa najari madija dsepe sse tajaripa Diocca cacahuehedsa tojahijine ssamo tani -nade Jeso.

²⁵ Nadsapi ia pohua huatimadedeni najaro ima imittadsapi ijabojo nadsa huati icanirere canade: —Jaho, madija tocassiejerahijinepa

ssamo tani. ¿Nejecojarina tossiajapadsaja? –inade. ²⁶ Nadsapa Jeso ia tocattabaqqui nadsa huati tade: —Madijapa ssamomo taraha Diodsapi ssamo tejerani. Pohuajinena madija tocassiejerahitohui –nade.

²⁷ Naraha Pedropa Jesodsa huati tade: —Ia Maride, iapi tiadsa jaijaridsanijinepi icca odsa, icca madija, huapima ineboridsabaqquide. Nadsapa Dio iadsa ¿nejecora da inapadsaja? –nade.

²⁸ Naraha Jeso iadsa huati tade: —Pajissara tiadenidsa huati onana: Ohuapi Madija Bedi ojararo nidsa ajijaro dsama Diojine dsati tojadsapi occaronapomanitohui. Nadsapi deni ojanicca huihuittari bicanidsa ohuittaridsa dosse dosse onanitohui. Nadsana tiadeni 12 tiquinajaro naqui ima cacahuadecca huihuittari 12 nehe cacahitteri najarodsa jassi tinariridsanitohui. Nadsapi icca madija jodiodeni aja icca idi Isaraeri pohua bedi 12 quinajarideni potemahicca ima ticattemamananitohui –nade.

²⁹ —Nadsama tiadenipi occa madija tiquejenajarojinea ticcadeni odsa ticanebomana, timecotedeni tinebobaqquimana, ticcadeni abi, ami tinebobaqquimana, ticcadeni ejedeni tinebobaqquimana, ticcadeni dsama tinebomana nadsapi nidsa dsotode aji huapima tineboridsa-manajarossa nehe Dio tiadenidsa da inaridsadsapi denima ticajimananitohui. Tetidsemaneri nanitohui, camittehe jiquejeranicca naqui ticajimananitohui –nade Jeso. ³⁰ —Jehe, jidapana tiadenipi ajimani tiquejenaraha ajijaro imadsa tibodideni huatomanaji: Madija jidapana

madimanajarideni motapa deni toquejenaraha nidsaranibotepa ajamani toquejenahitohui. Jidapana madimanajarideni mota ajamani toquejenajarideni naco nidsaranibotepa deni toquejenahitohui –nade Jeso.

20

Huidsaja tatarabaidasadedenicca imadsa mari icanabaqqijari Jeso

¹ Jesopa pocca marinaja ajiaro namidsa imadinicca ima tadsajani mari icanabaqqijari. Pohua attipa ajama nade: —Diocca cacahuehecca imapi pina huidsaja jinedecca imassa najaro. Pocca huidsajadsa ppa nahi uva pohuara ppa naridsajari. Huidsaja jinedepa dsidsidsamassa qquenadsa pocca huidsajahuaji tarabadsa quinahijine madijatohui toccajari.

² Bacco inabaqquidsapa pohuadeni tedseje imahaha canajari. Poccadeni dsamacca tarabadsa huada ojarie manaconipi ccarara cajarie 1 denario. “Najaropi bica tani” quinadsapa jehe canirejari. Nadsapa pocca huidsajahuaji tarabadsa quinahijine dosse inabaqqijari.

³ —Nahi dsotode maji huarionadsa naco huidsaja jinedepa todsepetaji dada caji tanihuaji toccajari. Nahidsapa madija ohuaha dsepedeni jiraha domo huahi qqui inabaqqijari.

⁴ Najaridenidsa naco huati tajari: “Tiadeni naqui occa huidsajahuaji tarabadsa tiquinanijine jai tijaji. Tiadenidsa manaconi pajiranissa tehe da onanijine” najari. Nadsapa jai tojjajari.

⁵ Nahi dsotode maji itetepidsa naco huidsaja

jinedepa nama napomajari. Maji tohuenajonadsa naco nama napomajari. ⁶ Nahi dsotode maji toccadsa naco huidsaja jinedepa madija ohuahadenitohui toccapomadsa madija dsepedeni jiraha bacco inabaqquidsapa pohuadenidsa huati tajari: “¿Nejecotohui majidsama ajidsa tidsepedeni jirehe tiquejenajaroneje?” najari. ⁷ Naraha pohuadeni cacomeramanajari: “Itohui madija huahua quina-jaradsapa” quinajari. Nadsapa pohuadenidsa naco: “Jehe, occa huidsajahuaji tidsepedeni ijimananijine tiadeni naqui jai tijaji” najari. Nadsapa pohuadeni naco jai tojajari, maji toccaraha.

⁸ —Nadsapa maji todsidsidsa huidsaja jinede pocca tatarabaidssadedeni cacahuadedsa huati tajari: “Jari, tatarabaidssadedeni huahua tanibaquijo, poccadeni tarabaidsa manaconi da tinaridsanijine. Tahidepa aja maji toccadsa tarabaidsa quinajaridenina paca tinabaquipona. Najarideni nattipa maji tohuenajonahicca paca, maji itetepicca paca, maji huaripohuicca paca tinabaquina. Nadsana tahide dsidsidsamassa tarabaidsa quinajarideni paca tinabaquina” najari. ⁹ Nadsapa dsotode tarabaidsa quinajaridenidsaha pohuadenidsa ccarara cajarie 1 denario da inaridsapojaropi pina tarabaidsa huada ojarie manaconissa nehe da inaridsajaro. Pohuadenidsa pohuadenidsa inanaridsajaro. ¹⁰ Nadsapa maji tohuenajonahicca paca, maji itetepicca paca, maji huaripohuicca paca inabaquua jicadsapa dsidsidsamassa tarabaidsa quinajarideni paca inabaquihijine najorajari. Naraha pohuadeni

bodi attidenipa: “Iapi dsidsidsamassa tarabaidsa inapa. Iapi denima icajinitohuia” quinaraha pohuadenidsa naqui huada ojariacca tarabaidsa manaconissa nehe ccarara cajarie 1 denariora da inaridsajaro.

¹¹ —Nadsapa huapima najarossa nehe cajaridsamanaraha tahide tarabaidsa quinajari-denipa najoramanapojari, huidsaja jinededsa ima idimamanahijine. ¹² Nadsapa huidsaja jinededsa pohuadeni attipa: “Maji toccadsa jai tojajaridenipa maji badsira taha tarabaidsa quinaraha pohuadenidsa pina iadsassa nehe da tinabaqquia” quinajari. “Naraha iapi majidsama maji ppocone eraha icca tarabaidsa manaconi iadsa denima da tejerani. Aja maji toccadsa tarabaidsa quinajaridenicca manaconissa nehe icajia” quinajari. ¹³ Naraha huidsaja jinedepa aja attideni nama quinajarideni ojariadsa huati tajari: “Jehe otesse, ticca tarabaidsa manaconi ojine dsori tejerapa. Nadsa tahide huada ojariacca tarabaidsa manaconi tiadsa huati onapopa. Tettipi: ‘Ccarara cajarie 1 denario ohuadsa bica tani’ ¿tapo-jerajaroqui? Nadsa tahide ‘Bica tani’ tapa” najari huidsaja jinede. ¹⁴ “Nadsapi ticca tarabaidsa manaconi ticajini. Epeje, ticcaniji. Dsotode tarabaidsa quinajaridenidsa naqui tarabaidsa manaconi pina tiadenidsassa nehe da onanijine jipa onadsapi epeje, nema onanajaro. ¹⁵ Occa dsiniropi occa. Ohua tohuini onadsa da onanijine bica tani. Aja pohuadenidsa ohuati huana tadsapi pohuadeni acco ocamabaqquijari. ¿Najaro acconi tijami-manajarorane?” najari huidsaja jinede -nade

Jeso.

¹⁶ Nadsapa Jeso denima huati tajari: —Jehe, Abi Diopa huati huana tajari pina huidsaja jinedessa najari. Pocca cacahuehe tojadsapi dsotode toquejenajaridenipa pocca biquehe cajimanahitohui. Pina tahide toquejenajarideni cajimanajarissa quinahitohui –nade Jeso.

Jesopa pohua dsoqquehicca ima huati nimanipomajari

Maraco 10.32-34; Roca 18.31-34

¹⁷ Jeso tedseje odsa panani Jerosarecca jahui jaijadsa pocca dodosse tabaqqui 12 inajaro ia motta pohuadsa iqueriqquinijine ia huahua tabaqquide. Nadsapa jahui jaijadsa iadsa huati huati dsanapodsapa pohua atti ajama najaride:

¹⁸ —Aji, Jerosarehuaji jaijemorarajropi nahatoqquri tiquinani. Ohuapi Madija Bedi ojararoa nidsa Jerosare bacco inadsapi dada toqqumade taminedeni, jodiodenicca marinaja maridedeni quinajarideni dsepedenidsa ojanitohui. Ohuadsa: “Dsoqquena, dsoqquena” quinahitohui. ¹⁹ Dsotodepi madija ohuaha jodio quejena-jarajaridenidsa ohua da quinadsa najaridenina ohua jaja icanacquimanajaro, ohua cossi inacquimanajaro nanitohui. Nadsapi ahua porimacossanidsa ohua inanadsoqque-manadsa ohua ppa idsamananitohui. Naraha huada huatinimade tojari nadsa onahatoninitohui –nade Jeso iadsa.

Satiaco, Huanodenicca ami Jesodsa huati tajaro

Maraco 10.35-45; Roca 22.24-27

²⁰ Nadsapi Sebedeo bedimenipi poni bedi pamaha Satiaco, Huano quinadsa Jesohuaji tohuajiressimanajari. Poni bodinipi: —Jesopa deni tojahi, ohuapi ajimani ojani -nadsa Jeso baccuhuaji poni pitonidsa huitta nadsa Jesodsa huati tade: —Ohua Maride, tiadsa huati onanijinea -nade. ²¹ Naraha Jesopa: —¿Nejeco imara ohuadsa huati tinanijine? -nade. Nadsapi poni attinia: —Ticca cacahuehe bicanihuaji madija cacahuade tittaridsapi occa ejedeni pahimarihijine tinori nahatonihuaji huittari, tinori ssamohuaji huittari quinahijine nama tinanabaqquijo, onajaro -nade Sebedeo bedimeni.

²² Naraha pohuadenidsa Jesoa: —A, najaro imapi ssamomo tinani. Ohuapi ocasserani ohuabote nani. Ohuadsa najidsohue ssonarinitohui. Aji tiadenipi najidsohue tinahanamananijine ¿tipajiramanaqui? -nade. Naraha pohuadenipa: —Jehe, ia naqui ipajirani -quinade. ²³ Nadsapa pohuadenidsa Jesoa: —Jehe, pajissa ocasserani tinahanamananitohui. Aji ohua najidsohue onahanadsapi tiadeni naqui nidsa dsotode najidsohue tinahanamananitohui. Naraha memehuaji occa cacahuehedsa madija cacahuade ohuadsama pahimarihijinepa ohua dosse dosse onejerani. Abi Dio icattejidsabaqquijaridenina ohuinoridsa pahimarihijine -nade Jeso.

²⁴ Najaro ima imahaha canahi imittadsapi Jeso huatimade mota 10 inajaroa imecote pamahadsa edijarode. ²⁵ Nadsapa Jeso ia huahua tabaqquidsa pohuadsa iqueriqquide. Iadsa huati

tade: —Tiadenipi madija ohuaha jodio quejenajarajaridenicca madie nahatoqquiri tiquinani. Poccadeni taminedenipa dossede dacoraqquiri nadsa poccadeni madija dosse dosse quiquinanajari. Deni toquejenajari ohuahadeni naco poccadeni madija dacorehedsa ehcahuabaqquimana najari. ²⁶ Naraha aji ohuadsa tiquejenajaropi nema tiquinanijine bica tejerani. Naraha titessedeni ojariapa: “Ohuana deni ojana” nadsapa pohana huapima bijideni acco icamaridsabaqquihijinena bica tani. ²⁷ Diocca cacahuehedsa deni tijanijinepi titesse bijideni acco ticamaridsajo. Pina poccadeni medse tijajarossa tanijine. ²⁸ Aji ohua Madija Bedi ojararopi madija dosse dosse onanijine occajonarajaro. Madija acco ocamabaqquihijinena occajonarajo. Madija poccadeni imasiri manaconi pohnadenidsa ssonari-jeranijine poccadeni imasiri manaconipi ohuana ohua ohuaccoranitohui —nade Jeso.

Jesopa nocco siri pamaha noccodeni ssire inanabaqquijari

Maraco 10.46-52; Roca 18.35-43

²⁹ Nadsapi odsa panani Jericodsa jaijedsima... jaijenaraha Jeso natti madija sibema jahimissajari. ³⁰ Jahui jaijadsapi nocco siri pamaha jahui inididsa pahimajari. —Jeso toqqeqquimahi —quinahi ima mittamanadsapa huahua quinajari: —¡Ia Medsede, Dabi Potemahi! ¡Iadsa teti huana taji, inaha! —quinade.

³¹ Naraha madija attidenipa: —¡Poni! ¡Joma tiquinaji! —quinaraha pohnadenipa denima paja

huahua toquinarihi huahua toquinarihi najari: —¡Ia Medsede, tamine Dabi Potemahi! ¡Itohui teti huana taji! —quinapomade.

³² Nadsapa Jeso toccaraha huaha tahi nadsa: —¿Nejecotohuira ohuadsa huahua tiquinajaroneje? —nade. ³³ Nadsapa: —Ia Medsede, inocco ssire tinanabaqquiji, inajaro —quinade. ³⁴ Nadsapa Jeso tohuideni huati huana tadsa noccodeni bara inabaqquidsapa amadsati noccodeni ssire-re nade. Nadsapa Jesodsa tohuedade.

21

Jesopa Jerosaredsa bacco todsimajari

Maraco 11.1-11; Roca 19.28-40; Huano 12.12-19

¹ Nadsapi Jesodsa madija huapima jaijade. Odsa panani Jerosarehuaji iajiradsapi odsa capamema najaro onini Betapaquedsa bacco inapojaro. Betapaquepi ssono onini Oribodsa anijaro. Nahidsana Jeso pocca dodosse tabaqqui pamahadsa huati tajaride: ² —Jari, ajicca odsa capamema nanihuaji ticadapoji. Nanidsapi bojo namidsadsa bedima ssoque dsanehe huani. Najaro dicca tiquinadsa poni bedima teccanimanaji —nade. ³ —Naraha tiadenidsa madija attipa: “¿Nejecotohui bojo dicca tiquinajaro?” nadsapa pohnadsa huati tiquinana: “Ia Medsede ajaro bojo tohuini nadsapaja” tiquinana. Nadsapa bojo tiadenidsa toccanijine dosse inanitohui —nade Jeso.

⁴ Najaro imapi pina maittaccadsama Dio Pohua Atti cacomerabote Sacariadsa huati tapojarissa nehe tojajaro:

⁵ —Odsa panani Siodsa madimanajaridenidsa ajima taji: “Qqui tiquinanaja, ticcadeni tamine bicabote tiadenihuaji bacco nahi.

Pohuapa jone tahi, jadsire tohui najarahi. Ajana, bojo imehidsa huittarijona-jarahi. Bojo namidsadsa todsepetaji jojorede bedi idedsa huittarijonahi” -napohui nade Sacaria.

⁶ Nadsapa pocca dodosse tabaqqi pamahapa Jeso pohua attissa inanamananijine tohuedajari.

⁷ Nadsapa bojo namidsadsa imeni bedima bacco toquinadsapa eccanimanade. Bacco nanimanadsapa poccadeni etero huapicca motarajaro ssiti quinadsa bojo idedenidsa bina quinadsa bojo bedidsana Jeso huittarijari. ⁸ Nadsapa madija huapi taha Jesodsa huatidsemanadsa pohua tedsejema jahui bina idsanapomanajaro, pohuadsa: —Deni tijani -quinahijine. Nadsapa jahuidsa pohuadeni tetepe namidsa hua idsanapomanade. Madija ohuahadenipa birijari eppe ca ippimanadsa hua idsanapomanade. Nadsapa Jeso jahui bina tani motta toccadsanapojari. ⁹ Madija huapima pohua tedsejema jai tojaja, pohua nattihuaji jahijonaja dsanapomanajari. Pohuadsa huatidsemanadsa huahua dsanapomanajari: —¡Tamine Dabi Potemahi deni tojahi, deni tojahi! -dsanapomanajari. —¡Ia Medsede onima ccajonajaridsa biquehera tojana, tojana! ¡Memehuaij Diotsa madimana-

jarideni pohuadsa: “¡Deni tijani!” quinana, quinana! –dsanapomanade.

¹⁰ Nadsapa Jeso Jerosarehuaji bacco todsimadsapa nahi odsa pananicca madimanajarideni huapima huatidsemanadsa ahuaaji huahua ahuaaji huahua naridsamanajari: —¿Nejecojaridsa huatidsejona-manajarinja? –quinajaride. ¹¹ Naraha madija Jeso pohuadsa jahijonajaripa ecomeramanajari: —¡Jehe, ajararipa Jeso! Puhuapa Dio Atti cacomerabote. Dsama Carireahuajicca odsa onini Nasareticca madija. ¡Najaria! –quinade.

Diodsa dada toqquimacca odsadsa manaconi-tohui dadadedeni mohua ininebaqqujari

Maraco 11.15-19; Roca 19.45-48; Huano 2.13-22

¹² Nadsapa Jeso Diodsa dada toqquimahuaji toqquedsimade. Najaro odsacca boronidsa madija bani bedi Diodsa da tahijinecca dade toquejenahi qqui tajari. Manaconitohui dadadedeni qqui inabaqquidsapa huapima mohua ininebaqqujari, mimittadedeni naco mohua ininebaqqujari. Dsiniro cacacajiqquimeradedenicca huahuanari naqui hua inaridsajaro, midsori dadadedenicca huihuittari naqui hua inaridsajaro naridsade.

¹³ Nadsapa pohuadenidsa Jeso huati tade: — Dio Atti dsodo nanidsa ima ajima najaro: “Occa odsapi Ohuadsa huati huati toquinahijinecca odsa tocajanitohui” naponi nade Dio Atti dsodo nanidsa. Naraha tiadenipi madija titicamaidsa-baqquimana nadsa tijinedenia pina bobotidedenicca quequeriqqui odsassa ticananamana-jaro –nade.

¹⁴ Nahi dsotodepa Diodsa dada toqquimahuaji Jesodsa nocco siri jahijona, isso siri jahijona nadsa inanomiridsa-baqquide. ¹⁵ Naraha dada toqquimade taminedeni, jodiodenicca marinaja maridedeni quinadsa Jeso canahatori canadsa madija tocanomirehi qqui toquinadsapa jiper-aqquri nade. Ejedenideni naco najaro odsacca boronidsa Jesodsa huatidsemanadsa johua johua quinajari. Ejedeni attidenipa: —¡Tiapi tamine Dabi Potemahi! ¡Deni tijani, deni tijani! —quinahi mittamanadsapa Jeso deni tojajari accone huadimanajari. ¹⁶ Ejedeni attideni pohnadenidsa ocassera tadsa Jesodsa huati toquinajari: —¿Ajajari ejedeni attideni timittajerajaroqui? —quinade. Naraha Jesopa: —Jehe, omittani. Attideni omittaraha tiadenina Dio Atti dsodo nanicca hua hua titiquina naraha ¿najaro ima tetideni ajimamanajarorane? Imapi ajima najaro: “Ejedenideni, ejedeni tobaccocca naco tiadsa huatidsemanadsa jiri jiri quinahitohui: ‘¡Bica tinani! ¡Bica tinani!’ quinahitohui” naponi nade Dio Atti dsodo nanidsa —nade Jeso.

¹⁷ Nadsapa Jeso tedseje Diodsa dada toqquimahuaji inebo Jerosare inebo nadsapi odsa capamema najaro onini Betaniahuaji jaijanide. Nanidsa bacco inanidsapi nanidsana icahadijade.

Jesojine ahua iquiera dseqqueri inanajari
Maraco 11.12-14, 20-26

¹⁸ Huada ssiaja dsidsidsamassa Jerosarehuaji jaijapomadsapi jahuidsapa Jeso pemide.

¹⁹ Nadsapa jahui inorinidsa ahua iquiera

qqui tadsapa nahihuaji toccajari... bacco tade. Dsaboradsa qqui tadsapa iquiera bono nohuerade. Eppera qqui tajari. Bono nohueradsapa iquieradsa Jeso huati tade: — ¡A, apaja! Jidapapi tibonomani-jeranitohui. ¡Nohueranitohui! -najari. Nanaja amadsati eppe dseqqueri-ri nade. ²⁰ Naraha pocca dodosse tabaqqui iapi icattomama canadsa ettipi: —A ¿nejecotohui amadsati iquiera dseqqueri najari? -inade.

²¹ Nadsapa Jeso iadsa: —Pajissara tiadenidsa huati onajaro: Tiadeni naqui Diodsa jehe tiquinanissa tadsa Pohuadsa huatide tiquejenadsapi tibodideni: “¿Pajissa tojapadseje? Nohueranitide” tiquinejeraji. Nadsana pina ojinessa najaro ahua iquiera dseqqueri tinanamanahitohui. Naraha najaro imaha ojarijerani. Ajijaro ssonodsa naqui huati tiquinadsa: “Ssono, titehemadsa passo imenidsa jaro tid-sanaji” tiquinadsapi nema nanitohui. ²² Jehe, Diodsa huati tiquinadsapi tibodidenidsa: “Jehe, Diopa nema inananijine pajirahi” tiquinadsapi aji ticcadeni huatinaja Diojine najarossa inanani-tohui -nade Jeso.

—*¿Nejecojaricca dacorehe ticajijaro?*
—*quinajari Jesodsa*

Maraco 11.27-33; Roca 20.1-8

²³ Nani dsotode Jerosarehuaji bacco inanipomadsapi Diodsa dada toqqumahuaji jaijed-simapomajaro. Nahidsa Jeso maride tojaraha

pohuadsa jiperaqquiri najarideni aja dada toqquimade taminedeni, jodiodeni ime joco-huideni quinadsa Jesodsa tohuajiressimanadsa pohuadsa huati toquinajari: —Iadsa ticca ima tecomeraji. ¿Nejecojaricca dacorehe ticajijaro? ¿Nejecojaricca attidsa dadadedeni mohua tininebaqquijari? —quinade, Jeso pohua cacomerahijine tohuini quinadsa.

²⁴ Naraha manaco Jeso pohuadenidsa huati tade: —Ohua naqui tiadenidsa huati onana, tecomeramananijine. Ohuadsa tecomeramanadsapi ohua Cadossede oni, occa dacorehe tahimarini tiadenidsa huati onanijine —nade. ²⁵ —Jari, Huanopa ¿nejecojaricca icadossedsa topa idsanabaqquijaritta? ¿Diojine ttarana, madijajine ttarana? —nade Jeso.

Naraha taminedenipa pohuadenira huati tocanirere canade: —Jaho “Huanocca topaniji Diocca dosseniji” inadsapi Jesopa: “¿Nejecotohui pohuadsa jehe tiquinejerajjarotte?” nahitohui iadsa —quinade. ²⁶ —Naraha “Huanocca topanijipi madijacca dosseniji” inadsapi madija iadsa huadimanarana. Aja madija huapima attidenipa: “Huanopa Dio icadossejari. Dio Atti cacomerabotedija” quiquinanade —quinajari taminedeni, madijadeni noppine cappinamanadsa. ²⁷ Nama quinana Jesodsa: —Ssamomo inani —quinade.

Nadsapa Jesoa: —Ohua naqui ohua Cadossede onipa tiadenidsa ohuacomera-jarahi —nade pohuadenidsa.

Madija bedi pamajaricca imadsa Jeso mari icanabaquijari

²⁸ Jesopa pohuadenidsa denima huati huati tajari: —Ajijaro ima huati onadsapi ¿nejeco imara tibodideni huatoni? Madijapa bedi pamajari. Ojariadsa huati tajari: “Ato, occa huidsaja uva ppa nahihuaaji tidsepe ijiji” najari. ²⁹ Naraha bedipa ibo tadsa: “Oqquejerani” najari. Naraha dsotodepa pohua bodi cacajiqquimeradsa uva ppa nahihuaaji toccajari. ³⁰ Dsotode pohua bedi dsotodeccadsa naco najarossa najaro huati tapomajari: “Ato, occa huidsaja uva ppa nahihuaaji tidsepe ijiji” najari. Pohua bedi dsotodecca attipa: “Jehe abi, occana” naraha tocca-jarajari. ³¹ Pohua bedi pamaraha ¿nejecojarina imehi attidsa ibora tajari? —nade Jeso.

Nadsapa dada toqquimade taminedeni, jodio-denicca taminedeni quinadsa Jesocca marinaja ecomeramanade: —Tahidecca napaja —quinade. Nadsapa Jeso pohuadenidsa huati tajari: —Pajissara tiadenidsa huati onajaro: Romanodenicca taminecca dosseniji dsiniro nanaccadedeni, amoneje dsinirotahui ponideni dada quinarodeni naqui Diocca cacahuehedsa toquejenahijine najoramanapojari. Naraha tiadenipi tinajoramana-jerajaro. ³² Ajana, Huano Baotistapa madija madimanahissa tahijine mari icanabaquiraaha tiadenipi pohuadsa pajissa tiquinejerajaro. Manaco ajararideni romanodenicca taminecca dosseniji dsiniro nanaccadedeni “imasiri sseqquiri nahi” tiquinajaro. Amoneje dsinirotahui ponideni da da quinarajo

naqui “imasiri sseqquiri nani” tiquinaraha narjaridenina Huanodsa pajissa quinajari. Bodideni cacajiqquimerajari. Naraha tiadenipi Huanocca ima timittamana, madija bodi cacajiqquimerahi qqui tiquinaraha tibodideni cacajiqquimerajerajaro. Pajissa tiquinejerade –nade Jeso.

Huidsaja cacahuade tabaccoraqqiri najaridenicca ima

Maraco 12.1-12; Roca 20.9-19

³³ Jeso attipa: —Ajijaro namidsa imadinicca ima onihi tadsajani tiadeni mari ocanabaqquina. Titaharibobo canaji. Madijapa pocca huidsajadsa uva pohuara ppa inajari. Nadsapi huidsaja inidi siba hua inahuajanijaro. Uva bono ttai nadsa ppejene tojahijine naqui sibadsa odi inahatojaro. Huidsaja cacahuade huitarihijine siba hua tamaroni naqui hua inamarojaro. Najaro huapima jicadsapi huidsaja jinede pocca huidsaja ecahuamananijine madijatohui qqui naridsajari, nahi pocca huidsajadsa tarabadsa quinahijine, ppa nahi uva ecahuamanahijine. Uva bono jadadsapa motapa huidsaja jinededsa tojahijine. Motapa huidsaja cacahuadedeni pohuadenidsa tojahijine. Nadsapa pocca huidsaja ecahuamananijine madija qqui inabaqquidsapa pocca huidsaja pohuadenidsa inebojaro. Nadsapa jinede dsama huaji tanihuaji toccajari. ³⁴ Uva bono jadahicca abadsico bacco tadsapa huidsaja jinede huaji tanidsa madiraha pocca uva bonotohui pocca dodosse tabaqqui dosse inanibaqquijari. ³⁵ Naraha pocca

dodosse tabaqqui huidsajahuaji bacco nani-manadsapa huidsaja cacahuadedeni itadamanajari. Motapa itabaromanajari. Motapa inanadsoqque-ridsamanajari. Motapa sibadsa iquinabaqqui-manajari. ³⁶ Nadsapa huidsaja jinede pocca dodosse ohuahadeni dosse inani-baqquijari. Tahideccassa quinaraha denima huapi taha dosse inanibaqquijari. Huidsaja cacahuadedenihuaji bacco nanimanaraha narideni naco inajidso-baqquimanajari. Motapa itabaromanajari. Motapa inanadsoqque-ridsamanajari. Motapa sibadsa iquinabaqqui-manajari.

³⁷ —Nadsapa huidsaja jinede pohua bodipa: “Occa ejedenidsana cappinamanahitohui” nadsa pocca ejedeni huidsaja cacahuadedenidsa dosse inanijari. ³⁸ Naraha huidsajahuaji bacco nanidsapa huidsaja cacahuadedeni pohua qqui toquinadsa pohuadenira huati tocanirejari: “Najaripa huidsaja jinede bedi. Nidsaranibote imehi dsoqquedsa huidsajapi pohuadsa tojanitohui. Jari, inanadsoqquena, huidsajapi icca tojanijine” quinajari. ³⁹ Nama quinadsapa huidsaja jinede bedi dama quinadsa huidsaja inidihuaji iacca-manadsapa inanadsoqque-manajari —nade Jeso.

⁴⁰ Nadsapa pohuadsa queriqquimanajari-denidsa huati tajari: —Jari, tibodideni huatoji. Huidsaja jinede bacco nanidsapa ¿nejecoma napadsaja huidsaja cacahuadedenidsa? —nade Jeso.

⁴¹ Nadsapa ecomeramanajari: —Jehe, huidsaja jinede pohua bacco nanidsapa huidsaja

cacahuadedeni tabaccoraqquiri naja najari inajicabaqquihitohui. Pocca huidsajapi madija ohuahadenidsana da inanitohui. Pohuadenina pocca huidsaja ecahuamanadsa pina jinede at-tissa inanamanadsapi uva bono jadadsa motapa jinededsa da inanimanahitohui –quinade.

⁴² Nadsapa Jeso pohua tahimari pohuadenidsa ahuato taniijine pohuadenidsa denima huati tajari: —Tiadenipi Dio Atti dsodo nanicca hua hua titiquina naraha siba huahuattajo tojajaro tahimarini ¿tetideni ajimamanajaroqui? Imapi ajima najaro:

“Odsa sibadsa icanahatomananijinepi nanahatodedenipa siba ojariepi ettajomanani nade.

Naraha dsotodepi najaro sibana odsa daco cajiranjine tojajaro.

Aji siba huahuattajo tojajaropi ia Medsede Diiijine deni tojajaro. Najaro imajine Diodsa etidsejaro”

nani Dio Atti dsodo nanidsa

–nade Jeso. ⁴³ —Nadsapi tiadenidsa ajima onajaro: Diopa pocca cacahuehe tiadenidsa tojanijine najoraporaha Pohua Bedi tettajomanadsapa pocca cacahuehepi idininitohui, madija ohuahadenidsana da inanijine. Najaridenina Diodsa iboraqquiri nadsa poccadeni madiedsa ima bicani ahuato tanitohui. ⁴⁴ Nadsama siba dacorehe cajijarocca ima onihi naqui ajima nani: Najaro sibadsa madija tohuedimamanadsapa poccadeni ima tossamodsapi assiredeni tajoririd-samanajarissa quinahitohui. Najaro siba madijadsa ssonaridsapi mere tocaniredsapa jamiro-

manahissa tahitohui –nade Jeso, pohua tahimari huati tadsa. (Aja madija pohuadsa pajissa quinaradsapa paja jicarihi nahitohui, najari.)

⁴⁵ Nadsapa dada toqquimade taminedeni, marinaja pariseodsa jehe quinajarideni quinadsa Jesocca marinaja mittamanadsapa bodideni nahatoqquiri najari: —Jesopa icca ima huati huati tajari, iapi pohua ettajojarijine –quinade. ⁴⁶ Nadsapa Jesodsa huadimanadsa: —Jeso todsepe inanana –quinaraha madija noppinedeni cappinamanajari, aja madija huapima: —Jesopa Dio Atti cacacomerabote –quiquinanadsa.

22

Jesopa cajicajicca jipaqquiecca ima tadsajani mari icanabaquijari

Roca 14.15-24

¹ Nadsapa Jeso pocca marinaja ajijaro namidsa imadinicca ima tadsajani madija huapimadsa huati tapomajari. ² Pohua attipa: —Diocca cacahuehecca ima onhipi pina ajijaro imassa najaro. Tamine deni tojariipa pocca ejedeni amoneje cajihijinecca jipaqquie inahatojaro. ³ Nadsapa cacajirehicca jipaqquie najoradsa pohua tessedeni jahijonahijine pocca dodosse tabaqqui dosse inabaqquiridsajari. Huati naridsamanadsapa attidenia: “Ohua medsedecca jipaqquie najorani. ‘Jai tijajonaji’ napaja” quinaraha pohua tessedenipa jai tojahijine jiper-aqquri najari. ⁴ Dsotode naco pocca dodosse tabaqqui ohuahadeni dosse inabaqquipomajari.

Pohua attipa: “Aja huahua onabaqquipojari-denidsa ajima tiquinaji: ‘Tamine attipa ajama napaja: Jipacquie onajorani. Occa bohui dsoqqe, occa bohui bedi oquibote dsoqqe nahi. Huapima najorahi, najari. Occa ejedeni cacajirehicca jipacquietohui jai tijajonaji, napaja tamine’ tiquinana” najari. ⁵ Nadsapa jai toja, huati toquinaraha pohua tessedenidsa pina ponimassa najaro. Ohuahapa pocca huidsajahuaji tocca, ohuahapa pohua dsepetaji dadahuaji tocca najari. ⁶ Motapa taminecca dodosse tabaqqi itadamamanadsa inajidsobaqquimana, inanadsoqqe-ridsamana najari.

⁷ —Nadsapa tamine huadidsapa pocca soldado icadossebaqquijari, pocca dodosse tabaqqi jicajarideni acconedeni jicahijine. Inajicabaqquimanadsapa poccadeni odsa naqui botta inaridsamanajaro. ⁸ Nadsapa pocca dodosse tabaqqi ohuahadenidsa tamine attipa: “Jehe, occa ejedeni cacajirehicca jipacquie najoranissa taraha otesse huahua onabaqquipojaridenipa occa huatidsehedsa pajiramana-jarahi. ⁹ Jari, madijatohui jahui imeni huapimadsa jai tijaridsaji. Nahihujicca madija huapima bacco tinabaqquimanadsa ajima tiquinaji: ‘Tamine attipa: Occa ejedeni cacajirehicca jipacquietohui jai tijajonaji, napaja’ tiquinana” najari tamine atti. ¹⁰ Nadsapa taminecca dodosse tabaqqi jahui imeni jai tojaridsadsa madija bacco inabaqqui-manajaridenipa tabacoraqquiri najarideni, bicaqquiri najarideni naco inequeriqquimanajari. Nadsapa madija jai tojaja canadsa taminecca odsa bodihuaji madija

ijimanajari.

¹¹ —Nadsapa huapima jipamanadsa taminepa pocca ejedenicca jipaqquedsa queriqquimana-jari qquide qquedsimajari. Pocca daniji etero huedsaridsamanaha bica bica quinajari. Naraha madija ojariapa taminecca daniji cacajirehicca etero huedsa-jaraha qquedsimahi tamine qqui tajari. ¹² Nadsa taminepa pohuadsa huati tajari: “¿Nija otesse? Occa ejedeni cacajirehicca etero occa daniji huedsaridsamanaraha tiaha tedsani qqui onejeraha. ‘Ohuapi cajicajicca etero jirani oqquedsimana’ ¿tajarorane?” najari. Naraha pohuapa tamine atti mittaraha joma najari. ¹³ Nadsapa tamine pocca dodosse tabaqquidsa: “Jari, ajajari madija isso jore, biji jore tiquinajo. Ajicca amossini dsidsinihuaji coro tininemanajo. Nahihuajipa ocasserani ahua-dsanapodsapa pano todsahi nadsa oji oji nahi-tohui” najari.

¹⁴ —Jehe, Diocca cacahuehecca imapi najarossa najaro. Diopa pocca cacahuehedsa to-quejenahijine madija huapima huahua inajon-abaqquiraha pamema naha icattejidsabaqqui-jari, pohuadsa jehe quinahijine -nade Jeso.

—¿*Romanodenicca tamedsa icca dsiniro mota da inanijine bica taqui? -quinajari*

Maraco 12.13-17; Roca 20.20-26

¹⁵ Dsotodepa Isaraeri potemahi jodiodeni mota marinaja pariseodsa jehe quinajarideni tohuajimanahi nadsa pohuadenira imahaha canajari. —¿Nejecoma inanadsa Jeso atti inassamodsa pohuadsa ima inassonariniijine? -quinahi nade.

¹⁶ Nadsapa pariseodenicca mamari tabaqqui pama, tamine Herodecca madija pama quinadsa Jesodsa huati toquinahijine dosse inabaqquijari. Nadsapa maidsehedsa ajama quinade: — Mamaride, ticca ima iadsa ahuato tani. Pajisara huati huati tinajaro. Pajissa Diocca marinajadsa madija madimanahissa tahijine mari mari titicanabaqqui najari. Madija attideni noppine ticappina-jeradsapi ticca ima onihi tojajerajaro. Madija deni tojajari, madija dsepe sse tajari, madija ajamani tojajari tedsejepa tiadsa najarissa caniqquimerajari -quinade. ¹⁷ — Nadsama ibodi acco ticamabaqquiji. ¿Nejeco imana bica tani tajaro? Romanodenicca tamine deni tojahicca pocca dossenijidsa icca dsiniro mota pahuadsa da inanijine ¿bica taqui? ¿Bica tejerarane? Moisesicca marinajadsa ¿oppina taqui? ¿Oppinera tarane? ¿Tetti nejecoma tani? -quinade.

¹⁸ Jesodsa attideni bica tadsa huati huati toquinaraha poccadeni tabaccorehe pahuadsa ahuato tadsa pahuadenidsa huati tajari: — ¡Timaid samanajaro! ¿Nejecotohui occa ima tossamonijine ohuadsa huati tiquinajaro? ¹⁹ Jari, ohuadsa dsiniro ccarara romanodenidsa da tanijinecca nohue ticanamanaji, qqui ocanana -nade Jeso. Nadsapi denario dsojo icanajonamanadsa Jesodsa da icanamanade. ²⁰ Nadsapa pahuadenidsa huati tapomajari: — Jari, ajijaro ccararadsapi ¿nejecojari corimena anijaro? ¿Nejecojari oni dsodo najaro? -nade Jeso. ²¹ Nadsapa pahuadsa ecomeramanajari: — Romanodenicca taminedija -quinade. Nadsapa

pohuadenidsa Jeso attipa: —Romanodenicca tamine pocca dsiniropi pohuadsa da tinanimanaji. Naraha Diocca tiquejenadsapi Pohua jipa tahiccara Pohuadsa da tiquinaji —nade Jeso.

²² Jeso atti mittamanadsa jabojojanadsapa: —A, icca ima ecomeranjine nahato tajaria —quinade. Nadsapa Jesodsa apaja quinadsa jai tojanijaride.

Nidsa jicamanajarideni nahatonimanadsapa cajicaji nohueranitohui

Maraco 12.18-27; Roca 20.27-40

²³ Najaro huadadsa Isaraeri potemahi jodio-denimota marinaja onini sadoseodsa jehe quinarideni Jesohuaji bacco quinajari. Poccadeni marinajapi: —Idsoqquedsapi inahatoninjine nohuerani —quiquinanajari. —Najaro imadsa Jeso atti ijine tossamodsa cobara tana —quinadsa Jesodsa najaro ima huati toquinade:

²⁴ —Mamaride, Moisesicca marinajadsapi ajima nani: “Maqquidejepa amoneje cajiraha ejedeni jiraha dsoqquedsapa pocca amonejepi pohua imecotena icajina, nahi ejedeni cajidsapa pocca ato dsoqquejaricca ejedenissa nahijine” nade Dio Atti Moisesijine dsodo nanidsa.

²⁵ Nadsama tiadsa ima ajima najaro huati inana. Aja iadsapa pohuadeni imecote pohuadenira 7 quinaha madimanajari. Tahideccaha amoneje cajipojari, naraha bedi jiraha dsoqquejari. Nadsapa pocca amonejepi pohua imecotedsa tojajaro. ²⁶ Najari naco pohua ohuaha bedimeni icajiraha ejedeni jiraha dsoqquejari. Dsotodecca naco najaro

amoneje icajiraha najari naco ejedeni jiraha dsoqquejari. Najarossa dsanapojaro cajide 7 quinaraha ejedeni jiraha jicajari. ²⁷ Najarideni jicadsapa poni naqui dsoqquejaro. ²⁸ Nadsapi dsama jicadsa madija inahatonidsapi pohua imecote 7 quinajaripa najaro amoneje icajiqquimanaporaha ¿nejecojarina ponicca maqqui tojapadsaja? -quinade.

²⁹ Naraha Jeso attipa: —Ticcadeni marinajapi dsori tajaro. Dio Atti nahatoqquri tiquinaraha pajissa tiquinanissa tejerajaro. Diopa pocca dacorehema madija inahatonibaqquihijine pajirahi naco ssamoqquri tiquinajaro. ³⁰ Jicamanajarideni nahatonimanadsapa caji caji cana-jarahitohui. Diohuaji madimanadsapa pina Diocca dodosse tabaqqui memehuajicassa quinahitohui. Aja pohuadenipa caji caji cana-jaradsa madimanajari.

³¹ —Nadsama Djojine madija nahaton-imanahicca imapi Dio Pohua Atti dsodo nanidsa dsodo napojaro. Pohua Atti dsodo nani hua hua titiquina naraha ¿najaro imapi tetideni ajimamanajaroqui? ³² Aji maittaccadsama Abarahao, Isahaca, Jacobo quinajari dsoqquemanahi nattipa Diopa Moisesidsa huati tajari: “Ohuapi Dio, ticca idideni Abarahao, pohua bedi Isahaca, pohua bedi Jacobo quinajaridenicca Dio ojani” nahi nade. Aja Dio Atti nama nadsapa Abarahao deni nahatonimanadsa madimana-dsanapohuicca ima ahuato tajaro. Diopa paja dsoqquemanarihi najaridenicca Dio jarahi. Diopa camittaqquri

najaridenicca Dio. Puhuapa jidapana naco poccadeni Dio -nade Jeso.

³³ Najaro ima mittamanadsa madija huapima jabojo quinadsapa: —A, Jesopa nahato tajari -quinajaride.

Diocca dosseniji deni tojanicca

Maraco 12.28-34; Roca 10.25-29

³⁴ Marinaja pariseodsa jehe quinajaridenipa ima mittamanajari: —Jesopa marinaja sadoeodsa jehe quinajarideni attideni ajimani inanajaro -quinahi ima mittamanadsapa pohuadenira queriqquidsa imahaha canajari: —Jari, ia naqui Jesodsa huati inana -quinadsa Jesodsa huatide jai tojajari. ³⁵ Najarideni ojaria jodiodenicca marinaja maride tojajaripa pohua bodidsa: —Jeso nattome onana -najari. Jesodsa bacco toquinadsapa najaria pohuadsa huati tajari: ³⁶ —Mamaride, Diocca dosseniji huapi tehe Moisesidsa da inaraha ¿nejecojaro dossenijina pocca dosseniji huapimadsa deni tojajaro? -nade.

³⁷ Naraha Jesopa pohuadsa huati tajari: —Aji Diocca dosseniji deni tojaniccapi ajima najarona paji:

“Tiadeni Medsede Diodsa tetideni huanacquiri naji. Tibodideni huatonissa tadsa, dacoco tijiradsa Pohuadsara disseracquiri tidsanapomanadsapi Pohuadsa tetideni huanacquiri nanijine.”

³⁸ Najarona Diocca dosseniji deni tojanicca.

³⁹ Diocca dosseniji deni tojanicca onihi pina tahideccassa najaro ajima najaro:

“Tinorideniccadsa tetideni huanacquiri naji, pina tiadenidsa tetideni huanacquiri najarossa naji.”

⁴⁰ Najaro Diocca dosseniji pamehedsa pocca dosseniji Moisesijine dsodo najaro huapima tassaquijaro. Dio Atti cacomerabote attideni naqui najaro pamehedsa tassaquijaro –nade Jeso.

—¿Cristo-Mesiapa nejecojari potemahi tiquinajaro? –najari Jeso

Maraco 12.35-37; Roca 20.41-44

⁴¹ Marinaja pariseodsa jehe quinajaridenipa Jesodsa queriqquimanahi paja naccadsapa Jeso pohuadenidsa huati tajari: ⁴² —Cristo-Mesiacca imapi tibodidenidsa ¿nejecoma nani? ¿Pohuapa nejecojari potemahi tiquinajaro? –nade Jeso. Nadsapa ecomeramanajaro: —Pohuapa Dabi Potemahi –quinade. ⁴³ Nadsapa pohuadenidsa Jeso atti: —Naraha tamine Dabipa maittaccadsama madidsa Dio Corimejine pohua tedsejemacca ima huati tadsapa Cristo-Mesiadsa: “Ohua Medsede” napojari. Dabi pohua attipa:

⁴⁴ “Ia Medsede Diopa ohua Medsede Mesiadsa huati tajari: ‘Ohuitori nahatonihuaji tittariji. Ohua tedsejepi tohuatti dacorajaro ticajiji’ najari. ‘Nidsaranibote tia huadidedenipa ajamani onanabaquihitohui. Poccadeni dacorehepi onajicanitohui’ napohui nade Dio.”

⁴⁵ Naraha Cristo-Mesia tamine Dabi Potemahi tojadsapa ¿nejecotohui Dabi pohua potemahid-saraha: “Ohua Medsede” napojaritta? –nade Jeso.

⁴⁶ Pohnadenipa najaro ima ecomeramananijine pajiramana-jarajari. Najaro huadadsa Jesojine poccadeni ima tossamoridsadsapi ima onihi Jesodsa huati toquinahijine huapima cappinamanajari.

23

Pina pariseodenicca madiessa, pina jodiodenicca marinaja maridedenicca madiessa tiquinejeraji

Maraco 12.38-39; Roca 11.43, 46; 20.46

¹ Nahi dsotodepa madija queriqquihidsa, ia pocca dodosse tabaqquideni naqui pohnadenid-sama iquejemadsa Jeso iadsa huati tajaride: ²—Jodiodenicca marinaja maridedeni, marinaja pariseodsa jehe quinajarideni tedsejepa Moisesicca marinaja nahatoqquri nadsapa timit-tamananissa tanijine tiadeni mari mari tocanabaqqumana najari. ³ Moisesicca marinaja tiadeni mari tocanabaqqui-manadsapa poccadeni marinajadsa iboraqquri tiquinaji. Naraha pina poccadeni madiessa tiquinejeraji. Pohnadenipa ima bica taniccadsa mari mari quinaraha poccadeni madiapi pina poccadeni marinajassa nejerani. ⁴ Pohnadeni attipa: “Diocca dossenijidsa ajima tiquinaji” quinaraha poccadeni marinaja najo tanicca inaharimanajaro. Nadsapi pohnadenijine ima toccanajani najaro. Najaro imapi madija ecahuamananijine pajiramana-jarahi. Pohnadeni naco najaro ima madija ecahuamananijine acco icamabaqqumana-jarahi. ⁵ Pohnadenipa madija

pohuadenihuaji noccodeni jo najonahi nahitohuira madimanajari, madija pohuadeni qqui toquinadsa: “A, Diodsa disseraquiri nahi” quinahijine. Aja jodiode ni motapa pohuadeni assaridsa, pohuadeni bijidsa Dio Atti dsodo nani dsaminidsa oro idsamanadsa ssoque ssoque teri najaro. Naraha pariseodeni, jodiode nicca marinaja maridedeni tedsejepa dsamini denima imenicca ssoque ssoque teri najaro, “Dio Atti dsamini denima ahuato tanijine” quinadsa. Poccadeni etero iponidsa naqui cohuani dequerema cahuiheheri najaro. “Iana denima Diodsa bicacquiri inani” quinaraha. ⁶ Jipacque imenidsa naqui deni toquejenajaridenicca huihuittaridsa jassi tarihijine tohuini quiquinanajari. Aja Dio Atti mamarihuaji naco jassi tarihijine deni toquejenajaridenicca huihuittari tohuini quiquinanajari. ⁷ Jahuihuaji jahiridsadsa naco madija pohuadenidsa: “¿Nija, bica tinani? Tiapi deni tijani” quinahijine naco tohuini quiquinanajari. Madija naco pohuadenidsa: “Ohua maride” quinahijine tohuini quiquinanajari.

⁸ —Naraha tiadenipi madija tiadenidsa: “Ohua maride” quinahijine tohuini tiquinejerana —nade Jeso iadsa. —Tiadeni Maridepa ojarihi. Nadsapi tiadeni huapimapi timecotedeni tiquejenajaro. Tiadenidsa ojaria deni tojahicca nohuerahi. ⁹ Aja namidsa madimanajaridenidsa naqui: “Abi” tiquinejerana. Ticcadeni Abi memehuaji madijarina ojarihi. Najaridsara: “Abi” tiquinaji, onajaro. ¹⁰ Madija tiadenidsa: “Ia dossede” quinadsa naqui poni tiquinaji. Tiadeni dossedepa Cristo-Mesia ojarihi.

¹¹ Naraha tiadenidsa madija denima bica tajaripa huapima bijideni accode dissera tajari. Pina ticcadeni medsesa najarina deni tojajari Diodsa.
¹² Ajana, madijapa pohua ehuerahi pohua deni tonanadsa: “Ohuana deni ojani” nadsapa nidsa dsotode najaripa Dio ajamani inanahitohui. Naraha madijapa: “Ohuapi ajimani ojani” nadsa pohua imecotedeni accode tohuini naha madijaripa nidsa dsotode najarina Dio deni inanahitohui –nade Jeso.

Pariseodeni, jodiodenicca marinaja maridedeni tedseje huahuattajo toquejenahijinecca ima Maraco 12.40; Roca 11.37-54; 20.47

¹³ Nadsapa Jeso jodiodenicca marinaja maridedenidsa, marinaja pariseodsa jehe quinajari-denidsa huati tajari: —Jaho, tiadenipi huahuattajo tiquejenanitohui. Maidsajidede tijirani. Dio Atti madija mari ticanabaqquimanahissa tadsapa madija Dio Atti tocahatterahijineraha. Dio Atti mari ticanabaqquimanahissa tajaradsa, ticcadeni marinaja najo tanicca tinaharimanadsapi tijinedeni madija Dio Atti tocahattera-jarajari. Nema tiquinadsapi pina Diocca cacahuehecca noccobiji ticahacossamanajarossa najaro. Nadsapa madija Diocca cacahuehedsa jai tojedsimajarajari. Tiadeni naqui pocca cacahuehedsa jai tijedsima-jerajaro.

[¹⁴ —Jaho, jodiodenicca marinaja maridedeni, marinaja pariseodsa jehe tiquinajaro, tiadenipi huahuattajo tiquejenanitohui. Maidsajidede tijirani. Tabira tocajamana-jarodeni ponideni madimananijineccaraha

ticamaidsabaqquimanadsa tiadenidsa totoja nadsapi ponidenicca odsa naqui tiadenidsa totocajaridsa najaro. Naraha ticcadeni tabaccorehe ahuatora tanijinepi Diodsa huati huati tiquinadsa ticcadeni huatinaja dequerajaro. Aja madija tiadenidsa: “A, Diodsa disseraqquri nahi” quinahijine. Tiadenina Dio Attima mamaidsadsa tadsapi nidsa Diocca najidsohue denima oppina tanicca tiadenidsa ssonarinitohui –nade Jeso.]

¹⁵ —Jaho, jodiidenicca marinaja maridedeni, marinaja pariseodsa jehe tiquinajaro, tiadenipi huahuattajo tiquejenanitohui. Maidsajidede tijirani. Madija ohuaha jodiidenicca marinajadsa toquejenahijine maride disseraqquri tiquinadsapi dsama onihihuaji, dsama onihihuaji maride jajahi tijaridsa najaro. Passo imeni jippehuaji naqui maride jajahi tijaridsa najaro. Madija ohuahadenipa: “Jodiidenissa inana, Diodsa iquejenanijine” quinaraha tijinedenina ticcadeni marinajadsara toquejenajari. Najarojinena poccadeni ima denima totabaccorajaro. Ticcadeni ima tabaccora tadsapi jororoni jiquejeranihuaji tiquejenanitohui. Tijinedeni poccadeni ima denima totabaccoradsapi pohuadeni naco jororoni jiquejeranihuaji toquejenahitohui.

¹⁶ —Jaho, tettidenipi: “Iapi Dio Attidsa madija mari icanabaqquijaripa pina madija jahinedeni dsopide iquejenajarossa najaro” tiquinaraha tiadeni huapimapi noccodeni sirissa tiquinajaro. Huahuattajo tiquejenanitohui. Dio Atti mari mari titicanabaqquimana naraha tibodideni huatonissa tejerajaro. Ticcadeni marinajapi ajima

najaro: Madijapa madija ohuahadsa huati tajari: “Ohuatti ojine pajiranissa tanitohui, pina Diodsa dada toqquima pajiranissa tajarossa najaro” najari. Naraha pohua attissa inana-jeradsapi: “Epeje, oppinera tani” titiquina najaro. Naraha pohua attipa: “Ohuatti ojine pajiranissa tanitohui, pina Diodsa dada toqquimahuajicca oro pajiranissa tajarossa najaro” najari. Naraha pohua attissa inana-jeradsapi: “Oppina tani” titiquina najaro. ¹⁷ Tiadenipi ssamoqquiri tiquinani. Tibodideni huatonissa tejerajaro. ¿Nejecojaro imana deni tojajaro? ¿Diodsa dada toqquimahuajicca orona deni tojajaroqui? ¿Dada toqquimacca odsana deni tojajarorane? Jehe, dada toqquimacca odsana Dio pocca. Najarodsa oro da idsimamanadsana Dio pocca tojajaro. Najaroa aji dada toqquimana deni tojajaropaji.

¹⁸ —Ticcadeni marinaja onihi naqui ajima najaro: Madijapa madija ohuahadsa huati tajari: “Ohuatti ojine pajiranissa tanitohui, pina Diodsa da tahijinecca huahuanari pajiranissa tajarossa najaro” najari. Naraha pohua attissa inana-jeradsapi: “Epeje, oppinera tani” titiquina najaro. Naraha pohua attipa: “Ohuatti ojine pajiranissa tanitohui, pina Diodsa da tahijinecca huahuanaridsa da naqquinaja huapima pajiranissa tajarossa najaro” najari. Naraha pohua attissa inana-jeradsapi: “Oppina tani” titiquina najaro. ¹⁹ Tiadenipi ssamoqquiri tiquinani. Tibodideni huatonissa tejerajaro. ¿Nejecojaro imana deni tojajaro? ¿Madijacca da naqquinaja huahuanaridsa huanarijaropi deni tojajaroqui? ¿Diodsa da tahijinecca huahuanarina deni toja-

jarorane? Huahuanarina Dio pocca. Najarodsa madijacca da naqquinaja hua inarimanadsana Dio pocca tojajaro. Najaroa aji Diodsa da tahijinecca huahuanarina deni tojajaropaji.

²⁰ —Madijapa madija ohuahadsa huati tadsapa: “Ohuatti ojine pajiranissa tanitohui, pina Diodsa da tahijinecca huahuanari pajiranissa tajarossa najaro” nadsa najaro huahuanaricca ima huati tadsapa najaro huahuanaridsa huaniarjaro huapima naqui huati tajari. ²¹ Madijapa madija ohuahadsa huati tadsa naco: “Ohuatti ojine pajiranissa tanitohui, pina Diodsa dada toqquima pajiranissa tajarossa najaro” nadsa najaropi dada toqquimacca imaha ojari-jerani. Najaropi Diocca ima. Nahidsapa Dio madijari. ²² Madijapa: “Ohuatti ojine pajiranissa tanitohui, pina meme pajiranissa tajarossa najaro” nadsa najaropi memecca imaha ojari-jerani. Nanihua-jipi Dio Pohua dosse dosse nahicca huihuittari cahittajaro. Najarodsapa Dio Pohua huittarijari. Memehujicca ima huati tadsapa Diocca ima naco huati tajari -nade Jeso.

²³ —Jaho, jodiodenicca marinaja maridedeni, marinaja pariseodsa jehe tiquinajaro, tiadenipi huahuattaajo tiquejenanitohui. Maidsajidede tijirani. Ticcadeni odsa inorinicca ppa nahi dsamatapa quequejema majo bica tajari pore tiquinadsa naco badsira taraha mota Diodsa da da titiquina najari. Najaropi ticcadeni marinaja ajimanicaraha tecahuamananissa tajaro. Naraha Diocca dosseniji deni tojaniccapi tecahuamana-jerajaro. Diocca dosseniji deni tojaniccapi madija ticamaidsabaqquimana-

jaradsa tettiideni pajiranissa tanijine. Madijadsa naqui tetideni huanacquiri nanijine. Maidseraquiri tiquinadsa tettiidenissa tinanamana-dsanaponijine. Jehe, najaro dosseniji tecahuamana-jeradsapi ticcadeni ima dsori tajaro. Aji ticcadeni odsa inorinicca ppa nahi mota Diodsa da da titiquina najari bica tahi naraha najaro dosseniji ajimanicca aji Diocca dosseniji deni tojanicca tadsajani tecahuamanaji, onajaro. ²⁴ Jaho, tiadenipi pina noccodeni sirissa tiquinajaro. Oppina tahicca dappi tiquina-jarahijine ticcadeni dsedse eterodsa tinaqquequima-manadsana dse dse titiquina najaro, “sisipe ssonippahitide” tiquinadsa. Naraha Diocca dosseniji deni tojanicca tecahuamana-jeradsapi pina bani jipahi oppina tahicca camello motararaha nama naha dappi tiquinajarissa najari.

²⁵ —Jaho, jodiidenicca marinaja maridedeni, marinaja pariseodsa jehe tiquinajaro, tiadenipi huahuattajo tiquejenanitoahui. Maidsajidede tijirani. Ticcadeni madiepi pina dsedse, parato huapihuajira ssahua ssahua tiquinajarissa najaro. Naraha tibodidenina pina dsedse parato bodihuaji ssahuarahi oba tajarissa tiquinajaro. Tibodidenidsa tibotimanajarocca ima ijijaro. Tohuini tiquinajarocca naqui ijijaro. ²⁶ Tiadenipi tibodideni huatonissa tejerajaro. Ticcadeni dsedse, ticcadeni parato bodihuaji naco ssahua ssahua tiquinajo. Najaropi aji ticcadeni tabacorehe tinebomanaji, tibodideni tohuirenijine. Nadsana ticcadeni madie naqui tobicanitoahui, onajaro –nade Jeso.

²⁷ —Jaho, jodiogenicca marinaja maridedeni, marinaja pariseodsa jehe tiquinajaro, tiadenipi huahuattajo tiquejenanitohui. Maidsajidede tijirani. Tiadenipi pina tonocobiricca siba bica tanijine nopohuidsa sse tiquinadsa bica tajarossa tiquinajaro. Huapihuaji bica taraha bodihuajipi oppina tani. Madija dsoqquehi tonedeni caji, imedeni jadsini obani naqui caji tani. ²⁸ Tiadenipi najarossa tiquinajaro. Madija tiadeni qqui toquinadsapa pina bicaqquri tiquinajarossa naraha tibodidenidsa maidsehe iji, imasiri iji najaro.

²⁹ —Jaho, jodiogenicca marinaja maridedeni, marinaja pariseodsa jehe tiquinajaro, tiadenipi huahuattajo tiquejenanitohui. Maidsajidede tijirani. Tiadenipi Dio Atti cacomeraqquri napojarideni nocobirideni tetepidsa siba hua tinamaromanajaro. Madija bicaqquri najarideni nocobirideni tetepidsa naqui bica tanijine tijinedeni hua naridsajaro. ³⁰ Naraha tettidenipi: “Maittaccadsama icca idideni madimanapohuidsama imadidsapi nassa pohuadenissa inejeraneje. Icca ididenipa Dio Atti cacomeraqquri najarideni inanadsoqquebaqqumanadsapa nassa iapi pohuadeni acco icamabaqqui-jaranaja” titiquina najaro. ³¹ Naraha tettideni nema tiquinadsapi tijinedeni ima ahuato tajaro. Tiadenipi Dio Atti cacomeraqquri najari nanadsoqquededeni potemahi tiquejenajaro. Pohuadenissa tiquinajaro. ³² Nadsapi ticcadeni ididenicca jarehe idimamanapojarocca najarossa tinanamanadsa jicana -nade Jeso.

³³ —Tiadenipi pina maccassa tiquinani. Ticcadeni ima tabaccora tajaro. “Diocca najidsohue dsori icanirenitohui” ¿tiquinajaroqui? ¡Dsori ticanire-jeranitohui! Jororoni jiquejeranihuaji tiquejenanitohui. ³⁴ Nema nadsapi tiadenidsa Dio Atti cacomeraqquri najarideni, Diojine nahatoqquri najarideni, Dio Atti pajissacca mamaridedeni dosse onaridsabaqquihitohui. Naraha motapa tinanadsoqqe-baqquimanahitohui. Motapa ahua porimacossanidsa tinanadsoqqe-baqquimanahitohui. Motapa jodiodenicca Dio Atti mamarihuaji titacossimanadsa biqueramanahitohui. Motapa odsa onihihuaji odsa onihihuaji mohua tinabaqquimanaridsahitohui. ³⁵ Nema tiquinajarojinepi tiadenidsa najidsohue imeni ssonarinitohui. Ajijaro dsamacca madija bicaqquri najari tojicadsa emenedeni toccajaro manaconedeni tiadenidsa ssonarinitohui. Aja tahidepa Abeo bicabotena pohua ohuahajine dsoqquepojari. Najari dsoqquepodsama aja Dio Atti cacomeraqquri najarideni naco inajicamanaja najonapohui najaria aja Berequia bedi Sacaria inanadsoqqe-manahi bacco najonajaropaji. Sacariapa Diodsa dada toqquima bacconihuaji aji Diodsa da tahijinecca huahuanari inorinidsa inanadsoqqe-manajaripaja. ³⁶ Pajissara tiadenidsa huati onajaro: Aja huapima jicajonajarideni manaconedeni jidapana madimanajaridenidsa Diojine najidsohue ssonarinitohui -nade Jeso.

Jesopa Jerosarecca madijatohui oji oji najari
Roca 13.34-35

³⁷ Jesopa odsa panani Jerosarehuaji madimanajaridenicca ima huati tajari: — Ohuapi titohuideni oji oji onadsapi: “Jerosare, Jerosare” ohonanajaro. Maittaccadsama ticcadeni idideni madimanapodsa naco Dio Atti cacomeraqquiri najarideni inanadsoqqe-ridsamana najonapohui najari. Diopa pocca dodosse tabaqqui tiadenidsa dosse dosse inajonabaqquiporaha sibadsa tiquinabaqquimanaja najonapohui najari. Naraha ohuapi tiadeni ohuacahuabaqquina, onajaro. Pina tacara poni bedi poni appani dopanidsa ecahuabaqquijarissa onanijineraha tiadenipi ohuadsa jiperaqquiri tiquinajaro. ³⁸ Tetideni huatoji. Diopa tidsamarideni Jerosare inebonitohui. Tiadeni tohuacahuabaqquijarahitohui. ³⁹ Ohua naqui, ohua qqui timanimanapoma-jeraccanitohui. Nidsaranibote ima najoranissa tadsa occanipomadsana ohua qqui tiquinapomanitohui. Nadsana tettidenipi: “Jehe, ajaripa Dio onima ccaronajari. Puhuapa bica tahi, bica tahi” tiquinanitohui –nade Jeso.

24

—Diodsa dada toqquimacca odsa taboridsanitohui –najari Jeso

Maraco 13.1-2; Roca 21.5-6

¹ Nadsapa Diodsa dada toqquimadsa Jeso qquenadsapa toccadsa ia pohua huatimadedeni pohuadsa iajressidsa huati inajarode: — Ia Maride, aji dada toqquimahuajicca odsa

huapimapi bicaqquiri naha -inade. ² Nadsapa Jesoa: —Aji odsa imeni sibadsa nahatoridsani jidapana qqui tiquinaraha pajissara tiadenidsa huati onana: Nidsa dsotode ajijaro odsa huapimapi taboridsehe jicanissa tanitohui -nade Jeso.

Dsama jicani tohuajiradsa nahatoqquiri inani-jinecca ima

Maraco 13.3-23; Roca 21.7-24; 17.22-24

³ Nadsapi ssono Oribohuaji jaijemorajaro. Nahidsa Jeso huittaridsapa ia pohua huati-madedeni iara pohuadsa huajijira icanadsa pohuadsa huati inajaro: —Ia Maride, jidacca ima huati tinajaropi ¿nejecoma nadsa tojapadseje? Aji namihuaji ticcaronapomanijinecca ima, aji dsama jicanicca ima tohuajiradsa nahatoqquiri inanijinepi ¿nejecora qqui inapopadseje? -inade.

⁴ Nadsapa Jesoa: —Paji, madija tiadeni tocamaidساباққирана. ⁵ Nidsa madija huapi taha pohuama ohua onidsa maidsamanadsapa: “Ohuapi Cristo-Mesia ojani” quiquinanahitohui. Najaridenipa madija huapi taha icamaidsabaққуи-манаhitohui.

⁶ Ima onihi naqui: “Jadsire tojaridsani” timittamananitohui. Naraha ticappinamana tejerana. Jadsirepi epeje tojaponitohui. Naraha dsamapi jiquejeraccanitohui. ⁷ Nadsama

madija dsama onihicca, dsama onihicca tedseje jadsire inanamana-ridsanitohui. Tamine ohuahacca madija, tamine ohuahacca madija tedseje cahadire-ridserahitohui.

Pemi naqui cajiridsanitohui. Namidsadsa naqui tojaridsanitohui. ⁸ Najaro ocasserehe tahide tojaporaha denima ocasserehe tojadsanaponitohui.

⁹ —Nadsapa tiadeni tadamamanadsapa tod-sepedsa tiquejenaridsanitohui. Pohnadenijine nanajidso tiquejenadsapi tijicaridsanitohui. Occa madija tiquejenajarojinepi madija huapima tiadenidsa jiperaqquri nahitohui. ¹⁰ Nadsama ohuadsa toquejenajarideni motapa ohuatti nebomanadsa ima ponimacca maidsanijidsara toquejenaridsahitohui. Nama quinadsapa pohnadeni tesse dsoqquehijine ahuaji eccora, ahuaji eccora naridsamanahitohui. Pohnadenira pohnadeni tessedsa ahuaji jipera, ahuaji jipera naridsamanahitohui. ¹¹ Dsama jicanijinepi mamaidsade ahuatomaridsamanahitohui: “Ohuapi Diocca dosseniji, Dio Atti ohuacomerajaro” quiquinanaraha Diocca dosseniji jarahi. Naraha pohnadenipa madija mota huapi taha icamaidsabaqqui-manadsapa huapima attidenipa: “Jari, najaridenicca imadsara iquejenana” quinahitohui. ¹² Dsama huapimadsa madijapa imasiri denima denima inaridsamanahitohui. Dsama huapimadsa imasiri ijiridsajarojine tohuati huanehepi huatideni ajamamanahitohui.

¹³ —¡Naraha tiadenipi dacoco tijiraji! Najaro huadie tinahanamana-dsanapodsapi tijicaraha ticassiejeranitohui. Timadimanaccadsa dsama jicani bacco tiquinadsa naqui ticassiejeranitohui. ¹⁴ Naraha dsama jiquejeraccadsama Dio pocca cacahuehecca ima bicani dsama huapimadsa

ecomeraridsa-manaccanitohui. Najaro imapi otahimari madija tocassiejerahijinecca dsama nemanehedsa madiridsamanajarideni mittarid-samanahitohui. Nadsana dsama jicanicca huada bacco tanitohui -nade Jeso.

¹⁵ Jesopa dsama jicanicca ima denima ia mari tocanabaqquijari. Pocca marinaja hua tiquinadsapi timittamananissa taji. Pohua attipa: —Nidsa jodio quejena-jarajaridenijine Diodsa dada toqquimahuaji oppinabote corime huedsadsapa toppinanitohui. Nadsapi pohuadenijine icca madija jodiodenipa icappinaquimanadsa Diodsa dada toqquima paji inebomanarinitohui. Najaro imapi maittaccadsama Dio Atti cacomerabote Daniel dsodo inapojaro. Najaro ima tojani qqui tiquinadsapi tidomo toccaji, onajaro. ¹⁶ Aji dsama Jodeahuaji timadiridsa-manajaropi ssonohuaji tidomo toqqemorana. ¹⁷ Madija pocca odsa amossinihuaji ccaridsadsapa pohua dsepetajitohui pocca odsahuaji toqquedsimanijarana. ¹⁸ Madija pocca huidsajahuaji dsepe ijijari naco paja joppa tarina. Pocca eterotohui odsahuaji ccani-jarana. ¡Poni! ¹⁹ Jaho, amoneje jiamanajarodeni, bacconideni ijimanajarodeni naqui joppa toquinanijine tohuati nahanaqquiri nanitohui. ²⁰ Diodsa huati huati tidsanapomanaji, aji najaro ima oppinabote tojadsa tidomo toccadsapi ssirini nohueranijine, jassinajacca huadadsa naqui nohueranijine, onajaro. ²¹ Najaro ima oppina tanicca bacco nadsapi madija huapima ocasserani imeni inahanamanitohui.

Maittaccadsama Dio dsama inahatoponipi nema nanicca ocasserehe qqui quinapo-gerani. Nohuerani. Ia naqui qqui inejerani paji nani. Nidsa dsotode naqui nema napoma-geranitohui. Nohueranitohui. ²² Najaro ocasserehe nema dsanapodsapi madija tossiajaja cama-jarahitohuiraha najaro ocasserehecca huada Dio ajimani inananitohui. Dio pocca madija pohua icattejidsa-baqquijaridenidsa huati huana tadsapa: “Nanidsa epejena, jicana” nahitohui Dio –nade Jeso.

²³ —Nadsapa madija tiadenidsa pohuama: “Qqui, ajaripaja ia Idinide Cristo-Mesia” quinadsa, madija ohuaha attideni naco: “Qqui, ajaccarina Cristopaja” quinadsapa pajissa tiquinejerana, onajaro.

²⁴ Madija mamaisadedeni naco tiadenidsa jahijonahitohui. Puhuadenipa: “Ohuapi Cristo-Mesia ojani” quinahitohui. Ohuahadeni naco: “Ohuapi Diocca dosseniji ojani, Pohua Atti ohuacomeranijine” quinaraha maidsamanajari. Puhuadeni bodipa: “Dio icattejidsa-baqquijarideni icamaidsabaqquina” quinadsa poccadeni maidsehe canahatorimana canaridsahitohui. Madija puhuadenidsa:

“Pajissa Diocca dosseniji” quinahijine tohuini quinaraha Dio Pohua icattejidsa-baqquijarideni motapa puhuadenidsa pajissa quina-jarahitohui.

²⁵ Aji huati huati onajarocca imapi nidsaranibote tojanijineraha jidapana tiadenidsa huati onajaropajipa. ²⁶ Nadsama madija attideni:

“Ajacca madija madide nohuerahihuaji ia Idinide ccanihi” quinadsapa nani qquide

jai tija tejerana. Madija ohuahadeni naco: “Ajicajaro odsa bodidsa ia Idinide pohua najimahi” quinadsa naco pajissa tiquinejerana, onajaro. ²⁷ Aji ohuapi Madija Bedi ojajaroa nidsa occaronapomadsapi ahuato tanitohui, pina ssissiede dacorehema ssie nadsa meme nemaneha tossiajabacqui jarossa nanitohui. ²⁸ Abaridsa toqueriqquinidsa bani huatiahi ponahi nahatoqquiri tiquinajaro. Pina najaro imassa najaro occaronapomadsapi madija huapima nahatoqquiri nahitohui -nade Jeso.

Jeso ccaronapomahicca ima

Maraco 13.24-37; Roca 21.25-33; 17.26-30, 34-36

²⁹ Jesopa ima denima huati huati tajari: — Naraha ocasserehe inahanamanani nattinipi maji ohuihitohui. Abadsico naco cahuihitohui. Memecca abadsico bedi naco catojahitohui. Jidapapa memecca huapima dacoraqquiri naccahi. Naraha dsotodepa meme dsadsa nadsapi huenene huenene canahitohui. ³⁰ Nadsana ohuapi Madija Bedi ojajaroa occaronapomadsapi memehuaaji ahuato tanitohui. Nadsapa dsama huapimacca madija cappinamanadsa oji oji quinahitohui. Nadsapi meme essenima oquejemehe occaronapomani qqui toquinahitohui. Occa dacorehe, occa deni tojehe ahuato tanitohui. ³¹ Nadsapa occa dodosse tabaqqi memehuaajicca dosse onaridsabaqquidsa jadsirema jei jei quinadsa Dio icattejidsa-baqqipojarideni inequeriqquinibaqqi-manahitohui. Dsama nemanehedsa madiridsamanajarideni huapima

ahuajicca, ahuajicca inequeriqquinibaqqi-manahitohui –nade Jeso.

³² —Jari, ahua iquiera tahimaridsa ticahateraji. Eppe moro nimanahi qqui tiquinadsapi: “Jehe, dsadsajade tojemanini” titiquina najaro.

³³ Pina najaro imassa najaro aji dsama jicani tahimarini huati huati onajaro qqui tiquinadsapi: “Jehe, Jeso ccanihi, pina icca noccobijidsa huajarissa najari” tiquinana, onajaro.

³⁴ Pajissara tiadenidsa huati onajaro: Aji dsama jicani tahimarini huati huati onajarocca madija dsoqquemana-jaraccadsama najaro ima huapima tojanissa tani qqui toquinaccahitohui.

³⁵ Meme, nami naqui jicaridsanissa tanitohui. Naraha ohuattipi jiquejeranitohui. Aji huati huati onajaropi najarossa nanitohui –nade Jeso.

³⁶ —Occaronapomanicca huada, maji naco madija huapima ssamoqquri nahi. Diocca dodosse tabaqqi memehuajicca naco ssamoqquri nahi. Dio Bedi ohua naqui najaro ima ssamo onani. Naraha Abi Dio Pohana nahato tahi ojarihi –nade.

³⁷ —Jehe, ohuapi Madija Bedi ojajaroa nidsa occaronapomadsapi pina maittaccadsama Nohue madipodsa ppani ccajonajarocca imassa nanitohui.

³⁸ Ppani ccajoneraccadsama madijadenipa jijipamana najari, dse dse quinajari, caji caji canajari. Nama quiquinanapojaria aja Nohue pocca canoa imenidsa toqquedsimahicca huada bacco tajaropaji.

³⁹ Madija motapa ppani tojanicca huada ssamoqquri nadsa najoramanapojari. Nadsapa ppani huassinaja bacco

najonadsapi huapima je tocaniredsa jicajari. Najarossa nanitohui nidsa ohua Madija Bedi ojajaroa occaronapomadsa naqui madija mota otohui najoramana-jaradsapa ajijaro namidsa jicahitohui. ⁴⁰ Jehe, nidsa occaronapomadsapi ima ajima nanitohui: Madija pamaha huidsajadsa dsepedeni ijimanajari. Ojaria otohui najorapojarina iaccamacossanihitohui. Naraha ohuahapa otohui najora-jaradsapa inebohuitohui. ⁴¹ Amoneje pamehe naqui dododsa dode toquejenajaro. Ojarie otohui najorapojarona iaccamacossani-nitohui. Naraha onihipi otohui najora-jeradsapi inebonitohui -nade Jeso.

⁴² —Nadsama tetideni huatodsa ticat-tomama canaji. Ohua tiadeni Medsede occaronapomanicca huada ssamoqquri tiquinani. ⁴³ Ajijaro imadsa tibodideni huatoji: Odsa jinedepa bobotide qquedsimahijinecca huada nahato tapodsapa pocca odsadsa botide qquedsima-jarahijine pocca odsa cacahuade nocco bissahitohuiraha ssamo taja najari. ⁴⁴ Nema nadsapi tinajoramanehe timadimanaji. Madijapa ohua Madija Bedi ojajaroa occaronapomanicca huada ssamoqquri nahi. Nidsa huatideni ajamama canadsa bacco onanipomanitohui -nade Jeso.

Madijacca dodosse ibora tadsapa ima bicani cajihitohui, tabaccora tadsapa nanajidso tojahitohui

Roca 12.41-48

⁴⁵⁻⁴⁶ Jesopa ima onihi huati tajari: —Madija dsepe ssebotepa huaji tani tocchijine najorad-sapa pocca dodosse ojariadsa huati tajari: “Occa madija tecahuabaqquina. Jipamanahijine maji bacco tadsapa taparideni da da titinabaqqui nana” najari. Nadsapa dsepe ssebote toccajari.

—Nadsapa pocca dodosse nahato tadsa, ib-ora tadsapa madija ecahuabaqquihissa tahitohui, pina pohua dossede attissa inananitohui. Nama nadsapa dsepe ssebote ccanidsa qqui tadsapa pocca dodossedsa ima bicani inananitohui. ⁴⁷ Nadsapi pajissara tiadenidsa huati onajaro: Madija dsepe ssebotepa pocca dodosse ibora tajaridsa ajama nahitohui: “Tiapi occa odsa, occa huidsaja, odsepetaji huapima tecahuaji” nahitohui —nade Jeso.

⁴⁸ —Naraha dsepe ssebotecca dodosse tabacora tadsapa pohua dossede attissa inananjeranitohui. Pohua bodipa: “Ohua dossede najoccahi, qqui tajarahi” nahitohui. ⁴⁹ Nadsapa pohua dossedecca dodosse tabaqqi ohuahadeni ihinajidsobaqqui nahitohui. Nadsapa pohua naco noccodeni janoqquiri najaridenidsa quejemadsapa jipadera ccaridsadsapa coma tanicca naco dse dse nanaridsa nahitohui. ⁵⁰ Pocca dodosse tabaccorabotepa pohua dossede ccanihicca maji, huada ssamo tadsa pohuatohui najorajarahitohui. Nama nanaridsa nanaja dsepe ssebotepa bacco nanihitohui. ⁵¹ Nadsapa pocca dodosse inajidsohuitohui. Dsoqquedsapa maid-sajidede rabotedenihuaji inananhitohui. Nahihuajipa ocasserani ahua-dsanapodsapa pano totsahi nadsa oji oji nahitohui —nade Jeso.

25

Jesopa dsohuato 10 quinajaro tahimarinidenidsa mari icanabaqquijari

¹ Nadsapa Jeso madija denima mari icanabaqquijari: —Diocca cacahuehe tojadsapi pina ajijaro imassa nanitohui: Dsohuato 10 quinajaropi dsabisso dsohuato cacajirehicca jipaqquietohui najoramanadsapi ponidenicca jojororo equidiridsamanadsa dsabisso cajibote najari bacco ijidsamanahijine dsome jai tojajaro.

² Naraha dsohuatodeni mota 5 quinehepi bodinideni huatonissa tejerajaro. Naraha dsohuatodeni mota 5 quinehepi bodinideni huatonissa tajaro. ³ Nadsapi dsohuato bodinideni huatonissa tejerajaropi ponidenicca jojororo iaccamanaraha ppejene jicadsa denima sso idsamanahijine dsojo quina-jarajari. ⁴ Naraha dsohuato bodinideni huatonissa tajarodenipi ponidenicca jojororo iaccamanadsapa ppejene jicadsa denima sso idsamanahijine dsojo quina-jari. ⁵ Nadsapi jai tojajaro, boronidsa bacco toquinaraha dsabisso cajibote najari najodsapa dsohuatodeni cahadijabote nadsapi nanidsa cahadijajaro.

⁶ —Naraha dsome nocconi tojadsana madija jadsirema huahua najari: “¡Dsabisso ccajonahi, ccajonahi! ¡Jai tijajonaji, bacco tijidsamanahijine!” najari. ⁷ Nadsapi dsohuatodeni huapima nocco toquejenadsa totehemamanadsapi ponidenicca jojororo denima ssiaja tahijine najoramanajaro. ⁸ Naraha dsohuato bodinideni huatonissa tejerajaropi motadenidsa attinidenia:

“Ticcadeni jojororo ppejene badsira taha iadsa da tiquinajo, icca jojororo ohuiridsabote nahi” quinajaro. ⁹ Naraha dsohuato bodinideni huatonissa tajarodeni attinidenia: “Poni. Tiadenidsa badsira taha sso idsajarahi. Tiadenidsa, iadsa nadsapa pajira-jarahi. Dadahuaji jai tijaccaji, jojororo ppejene ohuaha mitta tiquinahijine” quinajaro. ¹⁰ Nadsapi mittade jai tojajaro. Naraha nanihuaji najomanadsapi aja dsabisso amoneje cajihijine bacco najonajari, cacajire-hicca jipaqquedsa toqquedsimajari. Nadsapi dsohuato bodinideni huatonissa tapojarodeni pohuadsa jai tojedsimajaro. Nadsapi noccobiji icahacossajaro. ¹¹ Naraha dsohuatodeni mota 5 quinehepi dadahuaji mittade najomanadsa dsotode bacco nanimanajaro. Amossinidsa domoni huadsa dsabisso cajibote najaridsa huahua quinajaro: “¡Ia, ia! ¡Jaijedsimanijine noccobiji ticanahabaji!” quinajaro. ¹² Naraha dsabissopa noccobiji icatabojidsa-jerani. Pohua attipa: “Tiadenidsa pajissa onocco jidsa tani. Occa madija tiquejena-jerani” najari -nade Jeso.

¹³ Nadsapa madija huapimadsa Jeso attipa: — Tibodideni huatonissa taji. Ohua occaninicca huada ssamoqquiri tiquinani. Maji naco ssamoqquiri tiquinani. Tinajoramanehe timadimanaji -nade Jeso.

Jesopa dsiniro inahapimananijinecca imadsa mari icanabaqqijari

Roca 19.11-27

¹⁴ Jesopa ima onihi huati tajari: —Diocca cacahuehe tojadsapi pina ajijaro imassa nanito-

hui. Madija pocca benehi toccahijinepa pocca dodosse tabaqqui queriqquihijine huahua inabaqquijari. Queriqquidsapa pocca dsinirodsa dsepedeni ijimanahijine pohuadenidsa da inaridsajaro. “Aja occa dsiniro tinahapimanadsa nidsa occanidsapi ohuadsa nemaneha da tani-mananijine” najari. ¹⁵ Pocca dodosse ojariapa dsiniro inahapinijine nahato tahissa tadsapa pohuadsa ccarara 5 mil nehe da inajaro. Ohuaha naco dsiniro inahapinijine nahato tadsapa pohuadsa ccarara 2 mil nehe da inajaro. Ohuahapa dsiniro inahapinijine ajamani nahato tadsapa pohuadsa ccarara 1 mil nehera da inajaro. Nadsapa dsiniro jinede pocca benehi toccajari.

¹⁶ —Nadsapa ccarara 5 mil nehe cajijaripa amadsati toccajari. Mitta, da, mitta, da naridsajari. Dsepe ijiridsahissa tadsapa 5 mil cajiporaha denima 5 mil cajijari. ¹⁷ Nadsapa ccarara 2 mil nehe cajijari najari naco mitta, da, mitta, da naridsajari. Dsepe ijihissa tadsapa denima 2 mil cajijari. ¹⁸ Naraha ccarara 1 mil nehe cajijaripa nema inana-jerajaro. Najaripa pohua dossedecca dsiniro inajimanijine nami hui idsadsa ppa idsajaro.

¹⁹ —Dsiniro jinedepa huada huapi tadsa ccanijari. Bacco nanidsapa pocca dodosse tabaqquicca ima mittahijine pohuadenidsa huahua najari, poccadeni cuenta icattemanijine. ²⁰ Nadsapa ccarara 5 mil nehe cajijari ccajonajari. Ccarara 10 mil nehe jinededsa da inanijaro. Pohuadsa da inanidsa pohua attipa: “Ohua dossedecca, ohuadsapi ccarara 5 mil nehe da tade. Naraha qqui taneje, odsepe

ijiridsanissa tadsapi denima 5 mil nehe tojajaro” najari. ²¹ Nadsapa dsiniro jinede attipa: “Jehe, tiapi occa dodosse ohuattidsa ibora tinajaro. Bica tinani. Tiadsa badsira tehe da onaporaha denima tojanijine dissera tinadsapi denima tiadsa da onanitohui. Tiqquedsimaji, etidsena” najari pocca dodossedsa.

²² —Nadsa pocca dodosse ohuaha ccarara 2 mil nehe cajijari ccajonajari. Pohua attipa: “Jehe, ohua dossede, ohuadsapi ccarara 2 mil nehe da tade. Naraha qqui taneje, odsepe ijiridsanissa tadsapi denima 2 mil nehe tojajaro” najari.

²³ Nadsapa dsiniro jinede attipa: “Jehe, tia naqui occa dodosse ohuattidsa ibora tinajaro. Bica tinani. Tiadsa badsira tehe da onaporaha denima tojanijine dissera tinadsapi denima tiadsa da onanitohui. Tiqquedsimaji, etidsena” najari pocca dodossedsa.

²⁴ —Nadsa pocca dodosse ohuaha ccarara 1 mil nehe cajijari ccajonajari. Pohua attipa: “Ohua dossede, tiapi madijadsa daco tijirajaro. Tiapi tarabajadsa tejeraraha ticca dodosse tabaqquijine titicaji najaro. ²⁵ Nadsapi tinoppine ocappinadsa nami hui odsadsa ticca dsiniro ppa odsajarode. Aja ticca dsiniro tiadsa da onanina” najari.

²⁶⁻²⁷ Naraha dsiniro jinede attia: “¡Occa dodosse ibobote! ¡Tabaccora tinani! Tettipi ohuadsa: ‘Madijadsa daco tijirajaro. Tarabajadsa tejeraraha ticca dodosse tabaqquijine titicaji najaro’ taha. Naraha ohuadsa nahato tinadsapi occa dsiniro aji dsiniro ehecahuamana nanihuajina tinebodsas tohuapidsapi occanidsa denima ohuadsa da taninitohuiraha” najari dsiniro jinede atti.

28 —Nadsapa pocca dodosse tabaqqui ohuahadenidsa huati tajari: “Jari, occa dsiniro ccarara ibobotedsa da onapojaropi tidinimanaji. Tidinimanadsapi madija dsiniro ccarara 10 mil nehe cajjaridsana da tiquinaji. 29 Aja, cajjaripa pohuadsa denima, denima, denima tojadsapi huemani cajihitohui. Naraha ibobotepa badsira taha cajiraha pohua cajjaricca todininitohui. 30 Nadsama aja occa dodosse ibobotepa dsidsinihuaji coro tininemanajo. Nahihuaajipa ocasserani ahua-dsanapodsapa pano todsahi nadsa oji oji nahitohui” najari dsiniro jinede atti -nade Jeso.

—*Madija ocattejidsa-baqquihitohui -najari Jeso*

31 Jesopa denima mari icanabaqquijari: —Ohuapi Madija Bedi ojararoa nidsa occaronapomadsapi occa deni tojehe ossiejenema occaronapomanitohui. Diocca dodosse tabaqqui memehuaajicca ohuadsa jahironahitohui. Nadsapi deni ojanicca huihuittari bicanidsa ohuittaridsa dosse dosse onanitohui. 32 Nadsana dsama huapimacca madija obacchohuaji queriqquihitohui. Nadsapa ohuana madija ocattejidsa-baqquihitohui. Pina edede cacahuadepa pocca edede icattejidsa-baqquijarissa onanabaqquihitohui. Edede cacahuadepa edede bicahi pohuadenira icattejidsabaqqui, edede jidsadsa cabra pohuadenira icattejidsabaqqui najari. 33 Pohua biji nahatonihuaajipa edede bicahi pohuara. Pohua biji ssamohuaajipa edede jidsadsa cabra pohuara inanabaqquijari.

Ohua naqui madija ocattejidsa-baqquidsapa madija bicaqqiri najari Dio Pohua jipa tahicca inanamanajarodenipa obiji nahatonihuaji onanabaqquihitohui. Madija tabaccoraqqiri najari Dio Pohua jipa tahicca inanamana-jerajarodenina obiji ssamohuaji onanabaqquihitohui.

³⁴ —Nadsapi ohua tamine ojadsa aja madija obiji nahatonihuaji domo huajaridenidsa huati onanitohui: “Nija, occa Abi tiadenidsa ima bicani inanaridsajaro. Pocca cacahuehe tiadenidsa tojani. Najaropi dsama nahato-jeraccadsama tiadenidsa najorapojaro.

³⁵ Ohuadsa bicaqqiri tiquinadsapi opemidsa ohua titapamanade. Obacco dsaridsa ohuadsa passo da ticanamanade. Tiadenihuaji bacco onajonadsa ohuadsa tinoccodeni jidsaqqiri naraha: ‘Iadsa timadiccaji’ tiquinade. ³⁶ Etero ocappiradsa naqui ohuadsa da tiquinade. Coma onadsa naqui ohua qquide jajahi tijajona nade. Toponi cocorodsa ohuedsadsa naqui ohua qquide jajahi tijedsima nade” onanitohui pohnadenidsa.

³⁷ —Nadsapa aja madija bicaqqiri najarideni ohuadsa huati toquinahitohui: “Ia Medsede ¿ne-jecoma nadsa tipemidsa tiadsa dsamatapa da inajaritta? ¿Nejecoma nadsa tibacco dsaridsa tiadsa passo da icanajarotte? ³⁸ ¿Nejecoma nadsa tiadsa inocco jidsa taraha, ‘Iadsa timadiccaji’ inajarotte? ¿Nejecoma nadsa etero ticappiradsa tiadsa da inajarotte? ³⁹ ¿Nejecoma nadsa coma tinadsa tia qquide jajiedsimajarotte? ¿Nejecoma nadsa toponi cocorodsa tedsadsa

tia qquide jaijedsimajarotte? Ssamomo inani” quinahitohui. ⁴⁰ Nadsapi ohua tamine ojadsapi pohuadenidsa ohuatti ajima onanitohui: “Pajis-sara tiadenidsa huati onajaro. Aja madija occa tojajari ojaría tohuati nahana tajari acco ticamanadsapa pina ohua acco ticamamanajarossa najaro” onanitohui, obiji nahatonihuaji domo huajaridenidsa –nade Jeso.

⁴¹ —Naraha obiji ssamohuaji domo huajari-denidsapi ohuatti ajima onanitohui: “¡Aji ohuadsapi huajiji tinaji! Diopa tiadenidsa najid-sohue inanajaro. ¡Jororoni jiquejeranihuaji jai tijaji! Najaropi pocca huadi Satanadsa, Satanacca dodosse tabaqquidenidsa najorapojaro. ⁴² Tiadenipi opemidsa ohua titapamanajerade. Obacco dsaridsa ohuadsa passo da ticanamana-gerade. ⁴³ Tiadenihuaji bacco onajonadsa ohuadsa tinoccodeni jidsaqquri nadsa: ‘Iadsa timadiccaji’ tiquinejerade. Etero ocappiradsa naqui ohuadsa da tiquinejerade. Coma onadsa naqui ohua qquide jajahi tijajona nejerade. Toponi cocorodsá ohuedsadsa naqui ohua qquide jajahi tijedsima nejerade” onanitohui pohuadenidsa.

⁴⁴ —Nadsapa aja madija tabaccoraqquri najaridenipa ohuadsa huati toquinahitohui: “Ia Medsede ¿nejecoma nadsa tipemidsa tiadsa dsamatapa da inajarajaritta? ¿Nejecoma nadsa tibacco dsaridsa passo tiadsa da icanajerajarotte? ¿Nejecoma nadsa tiadsa inocco jidsa tadsa ‘Iadsa timadiccaji’ inejerajarotte? ¿Nejecoma nadsa etero ticappiradsa tiadsa da inejerajarotte? ¿Nejecoma nadsa

coma tinadsa tia qquide jaijedsima-jerajarotte? ¿Nejecoma nadsa toponi cocorodsa tedsadsa tia qquide jaijedsima-jerajarotte? Ssamomo inani” quinahitohui. ⁴⁵ Nadsapi ohua tamine ojadspapi pohuadenidsa ohuatti ajima onanitohui: “Pajissara tiadenidsa huati onajaro. Aja madija occa tojajari ojaría tohuati nahana tajari acco ticamamana-jaradsapa pina ohua acco ticamamana-jerajarossa najaro” onanitohui pohuadenidsa –nade Jeso.

⁴⁶ —Jehe, tabaccoraqquri najaridenipa najidsohue jiquejeraniccadsa madimanasanapohuitohui. Naraha madija bicaqquri najari Dio Pohua jipa tahicca inanamanajardenina camittehe jiquejeranihuaji madimanasanapohuitohui –nade Jeso.

26

Jeso todsepe tojahijine imahaha canajari

Maraco 14.1-2; Roca 22.1-2; Huano 11.45-53

¹ Jesopa madija mari icanabaqquia jicadsapa ia pohua huatimadedenidsa huati tajari:

² —Nahatoqquri tiquinani huada pama nadsapi ejete Pascoa tojanitohui. Ohuapi Madija Bedi ojajaroa nidsa najaro ejete tojadsapi todsepe ojanitohui. Ahua porimacossanidsa ohua inanadsoqqque-mananijine –nade.

³ Nadsapa Jesodsa jiperaqquri najarideni aja dada toqquimade tamedeni, jodiodeni ime jocohuideni tedseje poccadeni tamine deni tojajari onipa Caipa pocca odsa imenidsa queriqquimanajari. ⁴ Nahidsa imahaha canajari:

—¿Nejeco maidsehedsa Jeso todsepe tojadsa dsoqquehijine? —quinahi nade. ⁵ Naraha pohuadeni atti onihipi: —Ejete tojadsapi ima nohueraccanijine. Jesodsa madija jipaqquiri najarideni pohua dama inahi qqui toquinadsapa mohua mohua canarana —quinahi nade.

*Jeso tatidsa majoyo sso inarijarocca ima
Maraco 14.3-9; Huano 12.1-8*

⁶ Jesopa odsa capamema najaro onini Beta-niahuaji madidsa Ssino pohuadsa huapi jadsidsi quiquinanajaricca odsadsa toqquedsimajari. ⁷ Nahi Ssinocca odsadsa jipade jassi inaridsa amoneje Jesodsa tohuajiressijaro, poni dsapanidsa siba onini alabastro nahatoni jojo bicahi dsojo inajonajari. Najari jojodsa majoyo bicani huatini ccara tanicca dsojo icad-simajaro. Jesodsa bacco tadsapi tatidsa nemanehes sso inarijaro. ⁸ Naraha Jesocca dodosse tabaqqui ia qqui inadsapi edijaro. Etipi: —¿Nejecotohui majoyo ponima inajicajaro? —inade. ⁹ —Najaro majoyo nemanehes manaconidsa da icanadsa iadsa da inadsapi madija cappiramanajaridenidsa da iquimanitohuiraha —inade. ¹⁰ Etti nema inadsa Jeso mittadsapa pohua attipa: —Epeje tiquinaji. ¿Nejecotohui ponidsa tedimanajaro? Ponijine ohuadsa nema nadsapi bica tani. ¹¹ Cappiramanajaridenina tiadenidsa madimana-dsanapohitohui. Naraha ohuapi tiadenidsa omadidsanapo-jeranitohui. ¹² Aji majoyo ohuassiredsa sso inarijaropi pina odsoqquedsa ohua ppa idsamananijinessa najaro najorapojaro —nade. (Jodiodenipa pocca-

deni madija dsoqquedsapa nama quiquinana-jari.) ¹³ —Pajissara tiadenidsa huati onajaro: Dsama onihi, dsama onihidsa otahimari madija tocassiejerahijinecca ecomeramanadsapi aji otatidsa majojo sso inarijarocca ima naqui madija mittaridsamanahitohui. Nema nadsapi ponicca ima huatideni ajamamana-jarahitohui —nade Jeso.

Jodapa Jeso eccorahijine najorajari

Maraco 14.10-11; Roca 22.3-6

¹⁴ Jesocca dodosse tabaqqui 12 quinajari ojaria oni Joda Iscariotepa dada toqqumade taminedenidsa huatide toccajari. ¹⁵ Pohua attipa: —Jari, Jeso tidsepedenidsa onanahijinepa ¿neje-coma nehe ohuadsa da tiquinanijine? —najari. Nadsapa taminedeni dsiniro ccarara plata 30 nehe huatini ccara tanicca Jodadsa da quinajaro. ¹⁶ Nadsapa toccanidsa pohua bodi najorajari. Jeso pohuadenidsa eccorahijine inoccodsaridsajari.

Ia Medsedecca jipaqqie

Maraco 14.12-25; Roca 22.7-23; Huano 13.21-30; 1 Corintodenidsa 11.23-26

¹⁷ Isaraeri potemahi jodiodenicca ejete imeni bacco tajaro, oninipi Pan ssaja tajarahicca. Najaro ejetepi huada 7 nehe jicanijine. Tahidecca huadadsa jipaqqie onini Pascoa ihinanamana najaro. (Pascoa ettidsapi: Dio tossoqquimajari, inajaro.) Nadsapi najaro huadadsa Jesodsa ia pohua huatimadedeni huati inajaro: —¿Nejecohuaji Pascoacca jipaqqie tiadsa inajoranijine? —inade. ¹⁸ Iadsa huati tajari:

—Odsa pananihuaji otessecca odsadsa huatide jai tijapoji. Pohuadsa ajima tiquinana: “Ia Maride attipa: ‘Ohuadsa ima tojabote nani’ najari. ‘Nadsapa occa dodosse tabaqqui tedseje ticca odsadsa Pascoacca jipaqquedsa edede bedi ijipaqquinijine’ napaja” tiquinana –nade Jeso. ¹⁹ Nadsapi Jesocca dodosse tabaqqui iapi Jeso pohua attissa inanajaro. Pascoacca jipaqquide dsome ijipaqquinijine inajorajarode.

²⁰ Nadsapi najaro dsomedsa ia Jesocca dodosse tabaqqui 12 inajaro pohua tedseje huahua-naridsa ijipaqquinijine jassi inahuajanijarode.

²¹ Jipade iquejenanaja Jeso iadsa huati tajari: —Pajissara tiadenidsa huati onana: Aji tiadeni ojariaha ohua ccaccoradsapa todsepe ojanitohui –nade Jeso. ²² Pohua atti nama nadsapa ibodi qquedsadsa: —¿Ohua Medsede, aji ohuadsaqui? –inaridsajaro. ²³ Nadsapa Jeso attia: —Madija ojariapa icca paratodsa pohua naco pocca pandsa depo apa, depo apa nahi. Najarina ohua ccaccorahitohui. ²⁴ Jehe, ohuapi Madija Bedi ojararoa nidsa odsoqquenitohui. Pina maittaccadsama otedsejemacca ima Dio Atti cameraqquri najarideni dsodo quinapojarossa onanitohui. Naraha ohua ccaccoradedsa oppina tehe tojanitohui. Jaho, najari maqquideje tossona-jaradsapa bica taraha, oppina tanicca dsori tahitohuiraha –nade Jeso. ²⁵ Nadsapa Joda Iscariote, Jeso ccaccoradepa Jesodsa huati tajari: —Ohua Maride ¿ohuadsa tajarorane? –naraha Jesoa: —Jehe, tia tetti nema tajaropajia –nade.

²⁶ Nadsapa jipade iquejenadsa Jeso pan idi nadsa Diodsa huati tajari: —Jehe, Abi Dio ticca

daniji iadsa bica tahi -nade. Nadsapa pan icanarobedsa dside jai da, dside jai da inaridsade. Ia pocca dodosse tabaqquidsa huati tajari: —Aja, apa tiquinajo. Ajijaropi ohuemecca ima -nade Jeso.

²⁷ Dsotodepa dse inahijine dsedse equidi nadsa Diodsa huati tajari: —Jehe, Abi Dio ticca daniji iadsa bica tahi -nade. Nadsapa iadsa da icanadsa iadsa huati tajari: —Aja, dse tarid-samanajo, tiadeni huapima. ²⁸ Ajajari dsed-sepa ohuemenecca ima. Dio madija tedseje jehe canirehijinecca ima tojanijine. Nidsa ohua odsoqquedsa ohuemene toccadsapi najaro jehe canireniji pajissa tojanitohui. Aji ohuemene toccajaropi madija huapimadsa ima bicani tojanijine. Najaropi madija huapimacca imasiri manaconi ohuadsa tojadsapi Diopa poccadeni imasiri epeje inananijine. ²⁹ Ajijaropi tiadenidsa huati onajaro: Uva ppejene dse inajaripa dse onapoma-jaracchitohui. Nidsa occa Abicca cacahuehe tojanissa tadsa tiadeni tedseje uva ppejene ohuaha dsatira dse inahitohui -nade Jeso.

Pedro pohua namaisahijine Jeso huati tapo-jari

Maraco 14.26-31; Roca 22.31-34; Huano 13.36-38

³⁰ Pascoacca jipaqquie jicadsapi Diodsa jiri inade. Jiri inehe jicadsapi ssono Oribohuaji jaijemoranide. ³¹ Nahidsa bacco imoradsana Jeso iadsa huati tajari: —Ajijaro dsomepi tiadeni huapima ohua tinebomananitohui. Pina Dio Atti dsodo napojarossa nanitohui: “Nidsa edede

cacahuade dsoqquedsapa pocca edede tojarib-aqquihitohui.” ³² Naraha ohuapi Diojine onahatoninitohui. Onahatonidsapi titedsejemadeni dsama arobeni Carireahuajina occaninitohui –nade Jeso.

³³ Naraha Pedro attia: —Huapima tia inebo-manaraha ohuapi tia onebo-jeranitohui –nade.

³⁴ Nadsapa Jeso Pedrodsa: —Pajissara tiadsa huati onana: Tiapi ajijaro dsome tacara huahua najaraccadsa ohuadsa: “Onocco jidsa tani” tanitohui. Dsotode naqui: “Onocco jidsa tani” tapo-manitohui. Dsotode naqui nema tapo-manitohui –nade Jeso.

³⁵ Naraha Pedroa: —A, ohuapi nema onejeranitohui –nade. —Ima oppina tadsa naqui tiadsa: “Onocco jidsa tani” onejeranitohui. Tiadsama odsoqquenijine bica tani –nade Pedro. Ia pohua huatimade huapima naqui etti nema inade.

*Jesopa Jesemanihuaji Diodsa huati huati tajari
Maraco 14.32-42; Roca 22.39-46*

³⁶ Nadsapa Jeso pohua inadsa ahua ppa naridsahi oni Jesemanihuaji jaijajaro. Nanihuaji bacco inadsapi ia pocca dodosse tabaqqui iquejenajaro, iadsa Jeso attipa: —Tiadenipi ajidsa jassi tinaccaji. Ohuapi ajiccadsa Abi Diodsa huati onaccana –nade. ³⁷ Nadsapa pohua huatimade 3 quinaha jina inabaqquijari. Pohuadenipa Pedro, Sebedeo bedideni Huano, Satiaco quinarideni pohuadsa denima jai tojajari. Nahidsana Jeso bodi qquedsadsapa ojibote najari. ³⁸ Nadsapa pohuadenidsa: —Obodi ocassera tajarojine ohuatiabote-te canani. Tiadenipi ajidsa

tibomanaccaji. Ohuadsama tinoccodeni bissaccana –nahi nade Jeso.

³⁹ Nadsapa Jeso tocca-cca nadsa pohua baccohuaji namidsa pona nadsa Imehidsa huati tajari: —Abi, aji ¿madija tocassiejerahijinecca ima onihi nohueraqui? Nohueradsapi epeje. Madija huapimacca imasiri manaconi najidsohue ohuadsa tojadsapi ocasserani ohuanitohui. Pina dsedse bidabote dse onanijinessa najaro. Najaro onahananijine jipera onaraha ohua jipa onanicca tohui onejerajaro. Tia jipa tinaniccana paji. Najarodsana ibora onajaro –nahi nade.

⁴⁰ Nadsapa pohua huatimadedenihuaji ccanjari. Bacco nanidsapa cahadijahira qqui tajari. Nadsapa Pedrodsa Jeso huahua najari: —¿Ticahadijajaroqui? ¿Dsome nocconi ocaja-jeraraha tinoccodeni bissade tipajiramana-jerajaroqui? ⁴¹ Ticahadija-jeradsa Diodsa huati tiquinaji, ima oppina tehe tojadsapi tijapari-manadsa ima tinanamana-jeranijine. Tibodidenipi ibora taraha tessiredenina mijira tajaro –nahi nade Jeso.

⁴² Nadsapa toccanipomadsa Imehidsa huati tapomadsa naco: —Abi, nahato tinani. Madija huapimacca imasiri manaconi ocasserani ohuanijine jipera onaraha tia jipa tinaniccadsana ibora onajaro –nahi nade Jeso.

⁴³ Nadsapa pohua huatimadedenihuaji ccanipomaraha cahadijahira qqui inabaqquijari, huada comani ahuamanaja nadsa. ⁴⁴ Nadsapa inebobaqquipomadsa Diodsa huati tapomajari. Pina pohua huati tapohuissa najari huati tapomajari. ⁴⁵ Nadsapa pohua huatimadedenihuaji

ccanipomadsa Jeso attipa: —¿Tiadenipi tica-hadija dsanaponijinequi? Ohuapi Madija Bedi ojajaroa jidapapi ohua ccaccoradejine imasiri cajimanajarideni dsepedenidsa ojanitohui -nahi nade. ⁴⁶ Nadsapa: —Jina, titehemamanaji. Ajana, jidapapa ohua ccaccorade ccajonahi -nahi nade Jeso.

Jeso dama quinajari

Maraco 14.43-50; Roca 22.47-53; Huano 18.1-11

⁴⁷ Jeso huati huati naccaraha Joda bacco najonajari. Jodapa Jesocca dodosse tabaqqui 12 quinajarideni ojaria. Puhuana madija huapi taha eccajonabaqquijari. Jadsirecca massito eccajonamana, huahuacca eccajonamana najaro. Puhuadenipa dada toqquimade taminedenicca dosseniji, ime jocohuidenicca dosseniji jahijonajari. ⁴⁸ Jodapa Jeso todsepe inahijine eccajonabaqqui-jaraccadsama taminedenidsa huati tapojari: —Nidsa pano mose onahitohui. Najarina dama tiquinahijine -napojari nade. ⁴⁹ Nadsapa huapima jahijonadsa bacco najonamanajari. Nanaja Joda Jesodsa tohuajiressi, pina pajissa pohuadsa bica tajarissa nadsa: —¿Nija ohua Maride? -nanaja pano mose inajaride. ⁵⁰ Naraha Jesopa Jodadsa: —Otesse, ohuadsa ima tinananijine ticcajonajaro. Nadsapi nema taji -nade. Nadsapa Jesodsa tohuajiressimanadsa dama quinajari. ⁵¹ Naraha Jesocca madija ojariana massito dsoppa jeo, dada toqquimadedenicca tamine deni tojajaricca medse huaribo ca taneje tajo canajaro.

⁵² Naraha Jeso najaridsa: —¡Paji! Ticca mas-sito dso ticadsaniji. Jadsirecca massitodsa madija ijine ahuajaripa nidsa dsotode pohua naco jadsirecca massitodsa inanadsoqqe-manahitohui —nade. ⁵³ —Jaho ¿tibodi ssamo tajaroqui? Ohua jipa onadsa Abi Diodsa huati onadsapi pocca dodosse tabaqqui memehujicca ohua acco icamamananijine pina soldadodenissa najari 72 mil quinaha dosse inaronabaqquihitohui. ⁵⁴ Naraha nema onadsapi pina Dio Atti dsodo napojarossa onana-jeranitohui. Aji, ohuadsa ima oppina tanicca tojanijinepi maittaccadsama Diojine dsodo quinapojaro. ¡Epeje! Dio Atti nemanehi onapajiranissa tanijine. Ohua accodetohui huahua onejerana, onajaro —nade Jeso atti.

⁵⁵ Nadsapa Jeso pohuatohui jahijonajaridenidsa huati tajari: —¿Nejecotohui tiadenipi ohua dama tiquinanijine jadsirecca massitoma, huahuaccama jai tijajonajaro? Nema tiquinadsapi pina bobotidetohui jai tijajonajarossa najaro. Nadsa tiadenidsama huajijiradsa Diodsa dada toqquimahuaji mari mari ohonanaraha ohua dama tiquinehe nejerade. ⁵⁶ Naraha epeje, ohuadsa ima tinamananijinepi pina aji Dio Atti cacomeraqquri najarideni dsodo quinapojarossa najaro tojanijine —nade Jeso.

Naraha ia pocca dodosse tabaqqui huapimapi Jeso inebodsa idomo toccade. Nadsapa Jeso pohua motta ojari naha iaccanimanahi nade.

Dada toqquimadedenicca tamine deni tojaridsa Jeso iaccamanajari

Maraco 14.53-65; Roca 22.54-55, 63-71; Huano 18.12-14, 19-24

⁵⁷ Jeso dama quinadsapa tamine Caipacca odsahuaji iaccamanajari. Pohuapa dada toqquimadedenicca tamine deni tojajari. Nahidsa jodiodenicca marinaja maridedeni, jodiodeni ime jocohuideni huapima queriqquimanahi nade. ⁵⁸ Naraha Pedropa huajima tohuanamissadsa dada toqquimadedenicca tamine deni tojaricca boronidsa bacco todsimajari. Caipacca dodosse tabaqquidenidsama huittajari. Pohua bodipa: —¿Jeso nejecoma inanamanahijine? —najari.

⁵⁹ Nadsapa dada toqquimade taminedeni, jodi-odenicca ima cacattemededeni deni toquejena-jarideni tedseje Jesodsa ima inassonarimanani-jine tohuini quinadsa madija maidsehe huati toquinahijine tohui qqui naridsamanajari. Aja madija attidenipa: —Jesopa icca marinajadsa oppina tanicca inanapaja —quinadsa tamine-deni: —Jehe, najaro imadsa Jeso dsoqquehijine pajirahi —quinahijine. ⁶⁰ Madijapa maidsehe onihi onihi huati toquinaraha najaro imadsa Jeso dsoqquehijine pajira-jerani. Poccadeni maidsehe najarossa naridsa-jerani. Oppina tanicca jerani. Dsotodecca madija pamahana poccadeni maidsehe najarossa najaro huati toquinajari. ⁶¹ Ojaria attipa: —Titaharibobo canaji. Jeso atti ajama nahi omittade: “Aji Diodsa dada toqquimacca odsa madija icanahatomanaraha ocatabodsapi huada 3 nadsa ocanahatoninitohui” nade pohua

atti -nahi nade. Pohua tesse naco najarossa najaro huati tajari. Attideni nama quinaraha maidsamanajari.

⁶² Nadsapa dada toqquimadedenicca tamine deni tojajari totehema, hua nadsa Jesodsa huati tajari: —¿Tiapi tia tecomajaroqui? Tiadsa ima inassonarimanajaropi ¿nejecoma naneje? -nahi nade tamine atti. ⁶³ Naraha Jesopa pohua cacoma najari. Nadsapa tamine huati tapomajari: —Dio camitta tajari onima huati tinaji onadsama iadsa tia tecomeraji: ¿Tiapi Dio Bedi Cristo-Mesia tijaqui? -nahi nade tamine. ⁶⁴ Nadsapa Jeso: —Jehe, tiadeni ohuadsa nema tiquinajaropaji. Naraha tiadenidsa huati onajaro: Ohuapi Madija Bedi ojajaroa nidsa dsotode Dio Dacorabote ohua deni tonanadsapa Pohua inori nahatonihuaji ohuittarini qqui tiquinanitohui. Nidsa meme essenima occaronapomani qqui tiquinanitohui -nahi nade Jeso.

⁶⁵ Nanaja dada toqquimadedenicca tamine deni tojajaripa Jeso atti mittadsa huati jami nadsa pocca etero joca taneje sseo najaro. Nadsapa huapimadsa huati tajari: —¡Dio itamassojari! ¡Epeje! Jidapapi pocca ima nahatoto inani. Madija ohuahacca imatohui huati inejerana. Pohua attipa pina: “Ohuapi Dio ojani” najarissa naha. Pohua atti tabaccora tani timittamanani. ⁶⁶ Jari, tettideni ¿nejecoma tiquinani? -nahi nade Caipa. Naraha huapima: —¡Jehe, pohua atti nama nadsapa dsoqquena inajaro! -quinahi nade.

⁶⁷ Nadsapa Jeso panodsa ppito-to ppito-to canajari, idaqquimanajari, pohuadeni dsepedsa naco

pano ppa inanimanajari nade. ⁶⁸ —Jari, Cristo-Mesia tijadsapi ¿nejecojari tia idajari? ¡Tecomerajo! –quinahi nade.

*Pedropa Jesodsa: —Onocco jidsa tani –najari
Maraco 14.66-72; Roca 22.56-62; Huano 18.15-18, 25-27*

⁶⁹ Jesopa odsa bodihuaji nanajidso tojaraha Pedropa amossinihuaji boronidsa huittajari. Nadsapi najaro odsacca medse dsohuato ccajonadsapi pohuadsa huati tajaro: —Tiapi Jeso Carireahuajicca huatimade tijadija –nani nade. ⁷⁰ Naraha huapima mittamanadsa Pedro pohua namajidsajari: —A, ohuapi onocco jidsa tani. Qqui onajarade. Najaro ima ssamo onani ohuapi –nani nade. ⁷¹ Nadsapa Pedro najaro boronidca qqueqquedsimahuaji toccadsa najaro odsacca medse onihi pohua qqui tadsa huapimadsa huati tajaro: —Ajajariipa Jeso Nasaretihuajiccadsa ccaridsadija –nani nade. ⁷² Naraha Pedro pohua namajidsapomajari: —Dio nahato tahi pohuadsa onocco jidsa tani –napomahi nade.

⁷³ Naraha dsotodepa nahidsa toqueriqquijari attidenipa: —¡Pajissade! Tiapi Jesocca tijade. Carireahuajicca tohuatti ticajini –quinahi nade Pedrods. ⁷⁴ Nadsapa Pedro huadijari. —Pajissa huati huati onejeradsapi Dio ohua tinajidsoji, onana. Pajissa tiadenidsa huati onajaroa: Najari madijadsa onocco jidsa tani –nani nade. Nanaja tacara huahua naja najari. ⁷⁵ Nadsapa Jeso atti Pedro bodi huatomanijari: —Tacara huahua najaraccadsapa tetti tinamajidsani 3 nanitohui

-napojari. Aja Jeso atti Pedro bodi huatomanid-sapa toqquenasda ojjari nade.

27

Tamine Piratodsda Jeso iaccamanajari

Maraco 15.1; Roca 23.1-2; Huano 18.28-32

¹ Ssijadsapi dada toqquimade taminedeni, ime jochuideni tedseje queriequimanadsa pohuadenira imahaha canajari. Jehe canired-sapa Jeso dsoqquehijine ima najoramanajari. ² Nadsapa Jeso biji jore quinadsa tamine Piratohuaji iaccamanajari, —Jeso dsoqquena -quinahijine. Tamine Piratopa romanodeni. Puhuapa jodiodenicca dsama cacahuade tojjari.

Joda pohua nanadsoqquejari

³ Jeso ccaccorade Jodapa —Jeso dsoqquehijine iaccamanajari -quinahi ima mittadsapa pohua bodi jabojo najari: —Jaho ¿nejecotohui Jeso ohuaccorajaritta? -najari. Nadsapa dada toqquimade taminedeni, ime jochuideni, najarideni huapima dsiniro ccarara 30 nehe Joda pohuadsa da quinapojaro pohuadenidsa da inaninijine pohuadenihuaji toqquedsimanijari. ⁴ Puhuadenidsa huati tajari: —Jaho, tabaccorehe onanajaro. Jesopa imasiri cappiraraha ojine tidsepedenidsa tojjadsapa dsoqquehitohui -nahi nade Joda. Naraha pohuadenipa: —Epejea, ijine jerani. Ticca imasiripi ticca -quinahi nade. ⁵ Nadsapa poccadeni daniji ccarara 30 nehe Diodsa dada toqquima bodihuaji quissa inanijaro. Quissa inanie jicadsapi toccanijari. Dsotodepa pohuajine pohua mattodsda ssoque

dsanadsa joppa taronadsa pohua nanadsoqqe-jari.

⁶ Nadsapa dada toqquimade taminedenipa najaro dsiniro ccarara inaccanimanadsa attidenipa: —Ajjaro dsiniro madija dsoqquehijine paca quinajariccapi Diodsa dada toqquimahua-jicca dsinirodsa quejemanijine oppina tani. Najaro dsiniropi madija emene tocchijine manaconi -quinahi nade. ⁷ Nadsapa imahaha canaha jicadsapa najaro dsinirodsa dsama onini: Dsipa nanahatodecca quiquinanahihuaji mitta quinajaro, —Najaro dsamapi manahideni noccobirideni tojanijine -quinadsa. ⁸ Naraha najaro dsamapi Jodadsa da quinapojarocca dsinirodsa mitta quinadsa najaro dsama onini cacanid-satipi: —Tohuemene manaconidsa mitta nanicca dsama -quiquinanajari. Aji ohua omadidsa ajjaro dsodode ojadsa naco madijapa nama quiquinanahipaja naccahi. ⁹ Najaro dsama jodiodenicca taminedeni mitta quinajaropi pina maittaccadsama Dio Atti cacomerabote Jeremia dsodo inapojarossa najaro. Najaro imapi ajima najaro:

—Isaraeri potemahideni mota attidenipa: “Jehe, dsoqquehijine eccorahi manaco dsiniro ccarara plata 30 nani pajirani” quinahitohui.

¹⁰ Najaro dsiniro inaccanimanadsapi dsama onini: Dsipa nanahatodecca quiquinanahihuaji mitta quinahitohui, pina Dio ohuadsa huati tajarissa najaro -napohui nade Dio Atti Jeremiajine dsodo nanidsa.

Tamine Piratocca ima huahuatihuaji Jeso huajari

¹¹ Tamine Piratohuaji Jeso iaccamanadsa nahi Pirato baccohuaji inahuamanajari. Nadsapa Pirato Jesocca ima mittahijine pohuadsa huati tajari: —¿Tiapi jodiodenicca tamine tijaqui? —najari. —Jehe, tetti nema tajaropaji —najari Jeso. ¹² Naraha dada toqquimade tamedeni, ime jocohuideni tedseje Piratodsa poccadeni maidsehe huati toquinajari. Naraha Jesopa joma najari. ¹³ Nadsapa Pirato Jesodsa huati tajari: —Ticca ima bica tejerani quinajari ima huapi tani huati huati toquinaraha ¿timitta-jerajaroqui? —najari. ¹⁴ Naraha Jesopa huati tajarajari. —Occa ima ohuacomerana —najarajari. Pohuadsa ima inassonarimanajarodsa naqui: —Pajissa jerani —najarajari. Nohuerahi. Nama nadsapa tamine Piratopa jabojo najari. Pohua bodipa: —¿Nejecotohui pohua cacomajari? —najari.

*—Baraba qquenana, Jesopa dsoqquena
—quinajaricca ima*

*Maraco 15.6-20; Roca 23.13-25; Huano
18.38-19.16*

¹⁵ Huajano huajijiradsa jodiodenicca ejete Pascoa tojadsa tamine Piratopa toponi cocorodsa madija huedsamanajari ojaría pohuajine qqe-qqenamana najari. Madija huapima tohui quinajarina pohuajine qqenahijine najorajari. ¹⁶ Nadsapa toponi cocorodsa huedsajari ojaría onipa Baraba. Pocca ima tabaccora tadsa madija huapima pohuadsa nahatoqquiri najari. ¹⁷ Nadsapa Pirato pohuahuari madija

queriqquijonadsa pohuadenidsa huati tajari: —
¿Nejecojarina qquenahijine tohui tiquinajaro?
¿Baraba qquenahijineco? ¿Jesodsa “Cristo-
Mesia” quiquinanajari tappa onahijinerana?
-nade.

¹⁸ Piratopa pohua bodidsa Jesopa ima cappi-
rahi nahato tapojari. Pohua bodipa: —Dada
toqquimade taminedenipa Jesocca deni tojehe
acconi huadimanadsa ohuadsa eccajonamana-
jari -najari. ¹⁹ Piratopa ima cacattemahuajicca
huihuittaridsa huittariccadsa pocca amoneje po-
huadsa ima dosse inajonajaro. Poni attinipi: —
Najari maqquidejepa bica tajari. Pohuadsa ima
tinana-gerana. Dsomedsa Jesocca imajine occa
huada oppina tapa -najaro.

²⁰ Naraha dada toqquimade taminedeni,
ime jochuideni tedsejepa Jesodsa ima
inanamananijine najoramanajari. Madija
huapimadsa huati naridsamanajari: —
“Barabana qquenana” tiquinaji. “Jesopa
dsoqquena” tiquinaji -naridsamanahi quinade.

²¹ Nadsapa tamine Pirato aja huapima
domo huajaridenidsa huati tapomajari: —¿Aja
pamaha todsepe toquejenajaripa nejecojarina
ojine qquenahijine tohui tiquinajaro?
-napomade. Nadsapa huapima johuahua
johuahua canajari: —¡Barabana tijine qquenajo,
qquenajo! -quinade.

²² Naraha Piratopa domo huajaridenidsa huati
tapomajari: —Jehe, naraha Jesodsa “Cristo-
Mesia” quiquinanajaripa ¿nejecoma onanahi-
jine jipaqquri tiquinani? -nade Pirato atti.

Naraha huapima johuahua johuahua canapomajari: —¡Najari Jesona ahua porimacossanidsa dsoqquena, dsoqquena! -quinade. ²³ — ¿Naraha nejecotohui dsoqquehijine? ¿Nejeco imara inanajaro? -nade Pirato atti. Naraha domo huajarideni huapima paja johua toquinarihi nadsa: —¡Ahua porimacossanidsa dsoqquena, dsoqquena! -quinade.

²⁴ Naraha Pirato pohua bodi huatojari: — Ohuatti pajira-gerani. Pohuadenijine mohuaniji oppina tehe tojabote nani -nade. Nadsapa Pirato pohua dsepe ssahua nahijine passotohui huahua najari. (Pohua dsepe ssahua najaricca imapi: —Ohuapi ima ocappirani -najarissa najaro.) Nadsapa passo dsojo icanajonamanadsa huapima qqui toquinadsa Pirato pohua dsepe ssahuade tojadsapa huati tajari: —Ajajari madija dsoqquehijinepi occa ima jerani. Pohua emene toccahijine jehe onejerajaro. Najaropi ticcadeni ima -nade Pirato. ²⁵ Nadsapa madija huapima attidenipa: —¡Jehe, epeje! Ettijine dsoqquedsa pohua emene toccajaro manaconipi iadsa, icca ejedenidsa tojani bica tani -quinade.

²⁶ Nadsa tamine Piratopa Baraba qqenahijine huati tajari. Nadsapa pocca soldadodeni Jeso cossi inaqquimanahijine icadossebaqqujari. Cossi inaqquimanaha jicadsapa icadossebaqqipomajari: —Ahua porimacossanidsa coba tidsanamanahijine tiaccamanajo -nade Pirato.

²⁷ Nadsapa tamine Piratocca soldadodenipa odsa imeni bodihuaajicca boronidsa Jeso iaqquedsimamanajari. Nahidsa romanodenicca soldado huapima toqueriqquijari. ²⁸ Pohuadenipa:

—Jeso pina taminessa inanana -quinaraha maidsamanajari. Nadsapa Jesocca etero ssiti quinadsa etero macconi motaranicca pina taminedenicassa najarodsa Jeso inehedsamanajari. ²⁹ —Jeso taticca pina tamine tatidenicassa nana -quinaraha cotihi atinema jore nahuajanihira ettarimanajari. Pohua dsepe nahatonihuajicadsa naco pina taminecca dsodsopissa naraha ahua ppahua tajarora da quinajaro. Nadsapa jaja icanaacquimanahijine pohua baccohuaji pohuadeni pitodsa jassi tadsapa: —¡Deni tijani jodiodenicca tamine! -quinaraha maidsamanajari. ³⁰ Nadsapa ppito inacquimanajari. Pohua dsepecca ahua idinimanadsa najarodsa pohua tatidsa huacca huacca quinajari. ³¹ Nadsapa maidseheda pohuadsa jidsa jidsa quinaha jicadsapa etero macconi motaraniccapi ssiti quinadsa pohua pocca eterora inehedsanimanajari. Nadsapa ahua porimacossanidsa Jeso coba idsanamanahijine iaccamanajari.

Jeso ahua porimacossanidsa coba idsanamanajari

Maraco 15.21-32; Roca 23.26-43; Huano 19.17-27

³² Soldadodenipa Jeso iaccamananaja dsama Sirenecca madija Ssino bacco ijidsamanajari. Jesopa ahua porimacossani dsojo inaraha ja tojadsa soldadodenipa Ssino icadossemanajari: — Manaco tia ajararicca ahua porimacossani dsojo tinaji -quinadsapa manaco Ssinona dsojo inajaro. ³³ Nadsapa ssono Cocottahuaji jai tojemora, bacco tomoramanajari. (Ssono onini Cocotta

ettidsapi: Totati Tonanissa nani, quiquinanajari.)
³⁴ Nahidsa uva ppejene bidabotedsa quejemahi
 Jesodsa da icanamanajari, —Pohua comene ojid-
 sama nanijine —quinadsa. Naraha badsira taha
 ecatama, pohua nade.

³⁵ Nadsapa ahua porimacossanidsa coba id-
 sanamanajaride. Coba idsanamanaha jicadsapa
 acca icanamacossa-manajari. Nadsapa Jesocca
 eterotohui soldadodeni siba bedenidsa coro coro
 quinajaride, —¿Pocca etero nejecojaridsana to-
 janijine? —quinadsa. Najaro sibadsa it-
 tomemanadsapa pocca etero pohuadenidsa ojari
 ojari naridsajarode. ³⁶ Ittomemanaha jicadsapa
 nahidsa cacahuade jassi tajaride. ³⁷ Jeso tati
 tetepihuaji naqui dsodo nani coba idsanamana-
 jaro. Najaro dsodo nanipi: —Ajaripa Jeso, Jo-
 diodenicca Tamine —najaro. ³⁸ Bobotide pamaha
 naco Jesodsama topamajonahijine ahua porima-
 cossanidsa cobaba idsanamanade. Ohuahapa
 Jeso inori nahatonihuaji que, ohuahapa Jeso
 inori ssamohuaji que tade.

³⁹ Madija nahi jai tojeqqumajarideni Jesodsa
 jiperaqquri nadsa tatamasso quinajari. Tati-
 deni huide huide quinadsa attidenipa: ⁴⁰ —
 Ajina, tetti: “Diodsa dada toqquma ocata-
 bodsapi huada 3 nadsa ocanahatoninitohui”
 teteje nade —quinade. —Jari, pajissa Dio
 Bedi tijadsapi tia tinassiajaji. Ahua porima-
 cossanidsa tia tidinidsa ticcaronaji —quinade.
⁴¹ Nadsapa dada toqqumade taminedeni, jodi-
 odenicca marinaja maridedeni, ime jocohuideni
 tedseje Jeso itamassomanajari. ⁴² Attidenipa: —
 Ajana, madija ohuaha inassiajabaqquiraha po-

hua tonassiajadepa ssamo tahi. Pohuapa Isaraeri potemahidenicca tamine tojadsapa ahua porimacossanidsa ccaronana. Nadsana pohuadsa pajissa inanijine -quinade. ⁴³ —Ajana pohuapa Diodsa jehe nahissa tajari. Diopa pajissa pohuadsa huati huana tadsapa jidapanana pohua inassiajana, inajaro. Ajana, pohua attipa: “Ohuapi Dio Bedi ojani” nanaja nade -quinade, jidsa jidsa quinadsa. ⁴⁴ Bobotidedeni naco pohua inoridsa ahua porimacossanidsa cobaba dsanaraha najaro tohuattissa najarodsa Jesodsa atti atti quinade.

Jeso huatiajari

Maraco 15.33-41; Roca 23.44-49; Huano 19.28-38

⁴⁵ Maji itetepi tojadsa dsama nemaneha tod-sidsini najaro. Dsidsi dsanapojaropi maji 3 bacco tajaro. ⁴⁶ Najari maji 3'dsa Jesopa pohua attidsa jadsirema huahua najari: —Eri, Eri ¿rema sabatani? -nahi nade. (Najaropi: —Abi Dio, Abi Dio ¿nejecotohui ohua tinebojaro? -najari nade.) ⁴⁷ Naraha nahidsa domodeni huajari mittamanadsapa: —A, maittaccad-samacca Dio Atti cacomerabote Eriadsa huahua nahi -quinahi nade. ⁴⁸ Nadsapa nahidsa domo huajari ojaría huassinaja joppa tajari, huassa tajari idi, uva ppejene ssicata bidada najaridsa edsippa, ppaja tojadsa bobadsa oro, da icanamacossajari. ⁴⁹ Naraha madija attidenia: —¡Maqui, nidsa padseje! Pohua inassiajahijine Eria ccajonahitidija. Qqui inaccana -quinahi nade.

⁵⁰ Naraha Jeso jadsirema johua napomadsapa huatiajari. ⁵¹ Naneje Diodsa dada toqquima bodihuaajicca huahuacossa etero sibabote naqui Diojine sseo naronajaro. Carobe najaro. Nami naqui dsadsa najaro. Siba imeni huihwitteri naridsajaro naqui caroberidsajaro. ⁵² Tonoccobiri mota naqui tohuabaridsajaro. Diodsa pajissa quinapojari jicapojarideni huapi taha Diojine nahatonimanahi nade. ⁵³ Nahatonimanadsapa pohuadeni noccobiridsa jahinineridsajari. Naraha dsotode Jeso nahatonidsana najaridenipa odsa panani Jerosarehuaji jai tojedsimanijari. Nahidsa madija huapima pohuadeni qqui inabaqquimanajari.

⁵⁴ Nadsapa ssonohuaji soldado tamine, pocca soldadodeni tedseje Jeso cacahuade domo huajaridenipa nami dsadsa nani qqui, oppina tanicca huapima qqui toquinadsapa jabojo quinadsa attideni: —¡Jaho! Pajissa ajaripa Dio Bediraha—quinahi nade.

⁵⁵ Amonejedeni naqui huaji tanidsa cattade domoni huajaro. Ponidenipi Jeso dsama arobeni Carireadsa ccaridsapodsa pohua accode pohuadsa jahiridsajaro. ⁵⁶ Ponidenipi huapi taraha mota oninidenina Maria Madarenahuajicca, Jose Satiacodenicca ami Maria, Sebedeo bedidenicca ami quinajaro.

Jeso ppa idsamanajari

Maraco 15.42-47; Roca 23.50-56; Huano 19.38-42

⁵⁷ Dsomebote nadsa dsepe ssebote oni Dsod-sepa tamine Piratodsa huatide toccajari. Pohnuapa odsa panani Arimateahuajicca madija. Pohnuapa tahide Jesocca tojapojari. ⁵⁸ Nadsapa tamine Piratodsa bacco tadsa Jeso assire ppa idsahijine huati tajari nade. Nadsapa Pirato pocca soldadodenidsa huati tajari: —Ajajari madijadsa Jeso assire da tiquinana, ppa idsahijine —nahi nade. ⁵⁹ Nadsapa nahi Jeso coba dsanaha que tahihuaji bacco toquinadsa Dsodsedsa Jeso assire da quinadsapa etero dsojorani onini lino bica tajarodsa jore inaqquidsapa dsojo inajari. ⁶⁰ Nadsapa tonoccobirihuaji dsojo inajari. Najaro tonoccobiripi Dsodse dsama mitta inapodsa pohua noccobiri tojanijine tahide sibadsa hui quinapojaro. Najarodsa Jeso assire ibedsajari. Dsodse qqenadsapa siba imeni pata inanijaro, Jeso noccobiridsa huacossanijine. Nadsapa Dsodse toccanijari. ⁶¹ Naraha Maria Madarenahuajicca, Maria onihi tadsajanipi ibomanadsa Jeso noccobiricca siba huacossanihuaji tocattanimanadsa pahimaccajaro.

Jeso noccobiri dsepedeni panajari

⁶² Nadsapi huada ssiaja, jassinajacca huadadsa dada toqqumade tamedeni, marinaja pariseodsa jehe quinajarideni tedseje tamine Piratodsa huatide jai tojapomajari. ⁶³ Bacco toquinadsapa attidenia: —Ia dossede, ibodi huatomajaro, aja maitta maidsajide rabotepa dsoqqe-jaraccadsama pohua attipa: “Nidsa odsoqqedsapi huada 3 nadsa onahatoninitohui” nanaja

nade. ⁶⁴ Nama nadsapa pohua noccobiri ecahuamananijine ticca soldadodeni dosse tinabaqqiijo, dsepedeni panahissa tadsa huada 3 nehe ecahuamananijine. Nama quinadsapa pocca dodosse tabaqqi dsome Jeso assire idinemana-jarahijine. Idinemanadsapa madija huapimadsa maidsamanadsa: “Jeso nahatonihì” quinarana. Jeso pohua madidsa naco maidsa maidsa napojari. Pocca dodosse tabaqqi madija huapimadsa: “Jeso nahatonihì” quinadsapa maidsanijirideni denima tabaccora tarana -quinahi nade. ⁶⁵ Nadsapa Pirato pohuadenidsa: —Jehe, Jeso noccobiri cacahuade soldado jai tojahijine dossede jipa onani. Tiaccabaqqiimanajo, pohua noccobiri mohua quina-jarahijine soldadodeni dsepedeni panahijine -nahi nade. ⁶⁶ Nadsapa taminedeni soldadodeni tedseje jai tojadsapa siba imenibote huittacossanicca jore nani dsepedeni panahissa tadsapa: —Epejena. Dicca nanijine ssamo tani -quinahi nade. Nadsama jore nani idenidsa modsa nepi quinadsa najaro nepi nadsa tojano niqwi todsanajaro. (Najaropi dicca nadsa bararini ahuato tanijine.) Nadsapa taminedeni soldadodeni inebobaqqiimanadsapa jai tojanijari.

28

Jeso nahatonijari

Maraco 16.1-8; Roca 24.1-12; Huano 20.1-10

¹ Nadsapi jassinajacca huada jicani nattini se-mana tojapomanicca huada tahidecca domingo

ssiajajonadsa Maria Madarenahuajicca, Maria onihi tadsajani Jeso noccobirihuaji qquide tohuedajaro. ² Tohuedaneje... nami jadsirema dsadsa najaro. Aji nami jadsirema dsadsa najaropi ia Medsede Diocca dodosse memehujicca ccaronajari. Ccaronadsapa Jeso noccobiricca siba pata inajaro. Nadsapa najaro sibadsa huittari canahi quinade. ³ Puhuapa ssiaja tajari pina ssiiede ssiajanissa najari. Pocca etero nopo tajaro pina huepessa naraha denima nopo tajaro. ⁴ Soldadodeni najari qqui toquinadsapa pohua noppine cappinamanadsa tacca-cca-cca quinajari. Nadsapa pina cacotajarissa quinajari. ⁵ Naraha Diocca dodossepa amoneje huedajonajarodenidsa huati tajari: —¡Tia denipi ticappinamana tejeraji! Jeso qquide ticadajonajaro nahato onani. Puhuapa ahua porimacossanidsa inanadsoqque-manajari. ⁶ Naraha ajadsa podsa-jarahi. Puhuapa nahatonipa. Pina pohua dsoqque-jaraccadsama “onahatoninitohui” nanaja napojarissa najari. Jari, pohua podsahihuaji qquide ticadedsimaji. ⁷ Nadsapi huassinaja ticadanidsa pocca dodosse tabaqquidsa huati tinanimanaji: “Jesopa nahatonihui” tiquinana. Puhuapa titedsejemadeni dsama arobeni Carireahuaji toccanipohuitohui. Nanihuaji jai tijanidsana pohua qqui tiquinahijine. Epejeni najaro ima tiadenidsa huati onaponi -nahi quinade. ⁸ Nadsapi Jeso noccobirihuaji nebomanadsa huassinaja Jesocca dodosse tabaqquidsa huatide dsaja tanijaro. Cappinama-naraha huatidsemaneri tanijaro.

⁹ Dsaja taniraha nahi jahuidsa Jeso

ponidenidsa ahuatomsada: —Nija -najari. Nad-sapi pohuadsa tohuedessidsa huatidsemanadsa ponideni pitonidsa pahimadsa pohua issodsa cahuaajocossamana nadsa: —¡Ia Medsede, deni tijani! —quinani nade. ¹⁰ Nanaja Jesopa: —¡Ticappinamana tejeraji! Ticadanidsapi ohuemecotedenidsa huati tinanimanana: “Dsama arobeni Carireahuaji jai tojanina. Nanidsana ohua qqui toquinahijine, napaja” tiquinana -nahi nade Jeso ponidenidsa.

Soldadodenicca maidsehe

¹¹ Mariadeni tohuedanije naraha Jeso noccobiri cacahuade soldadodeni mota naco dada toqquimade taminedenidsa huati tanimanahijine odsa pananihuaji domo toccanijari. Aji nami dsadsa najarocca ima, Diocca dodosse memehujicca siba pata inajarocca ima naqui, najaro ima huapima soldadodeni qqui toquinajaricca huati tanimanajari. ¹² Naraha dada toqquimade taminedeni najaro ima mittamanadsapa ime jocohuideni tedseje queriqquimanadsa imahaha canajari. Jehe caniredsapa dsiniro huemani soldadodenidsa da inabaqquiridsajaro, pajissa pohuadeni qqui toquinajaripa ecomamananijine. ¹³ —Aji tiadenidsa dsiniro da inabaqquijaropi maidsehera huati tiquinanijine. Ajima tiquinaji: “Dsome icahadijadsa Jesocca dodosse tabaqquipa Jeso assire idinimanajari” tiquinaji. ¹⁴ Nadsapi najaro ima ticcadeni tamine Pirato mittadsapa tiadenidsa huadihitohuiraha ia pohuadsa huati inanissa tadsapi tiadenidsa tojonehitohui -quinahi nade. ¹⁵ Nadsapa soldadodeni dsiniro cajimanajaridenipa taminedeni at-

tidenissa inanamanajaro. Najaro poccadeni maidsehepi icca madija jodiideni motadenidsa tojaridsanissa tajaro. Aji ohua omadidsa aji-jaro dsodode ojadsa naco najaro maidsehe motadenipa huati huati quinahi paja naccahi.

Jesopa pocca dodosse tabaqqui dosse in-abaqquiridsajari

Maraco 16.14-18; Roca 24.36-49; Huano 20.19-23

¹⁶ Nadsapi ia Jesocca dodosse tabaqqui 11 inajaro Carireahuaji jaijanijaro. Pina tahide amonejedenidsa Jeso huati tapojarissa inanajaro. Jeso attipa: —Najaro ssonohuaji jai tjemorana —nadsa najaro ssonohuaji jaijemorajaro.

¹⁷ Bacco imoradsapi Jeso qqui inajari. Qqui inadsapa pohuadsa etidsedsa: —¡Tiapi deni tijani, tiapi nahatonie jinede tijani! Aja tiassa najari ohuaha nohuerahi —inade. Naraha mota bodidenipa: —¿Pajissa Jeso nahatonijarico? —quinajaride. ¹⁸ Nadsapa Jeso dsaboradsa iadsa huati tade: —Abi Diopa pocca nahatohue huapima memehujicca, namihujicca naco ohuacahuaridsahijine pocca dacorehe ohuadsa inanajaro.

¹⁹ Nema nadsapi dsama huapimadsa otahimari maride jai tijaridsaji. Madija ohuadsa toquejenahijine maride disseraqquri tiquinaji. “Jehe, Jesodsas iquejenana” quinadsapa Abi Dio onima, ohua Dio Bedi ohua onima, Dio Corime onima passodsas topa topa titidsanabaqquimana nana, onajaro. ²⁰ Aji occa marinaja tiadeni onahatabaqquijaro nemanehedsa iboraqquri nahijine naco mari mari titicanabaqqui-ridsamana nana, onajaro. Ohuapi huada huajijiradsa tiadenidsa

ohomadiridsa nanitohui. Nema odsanapojaroa
dsama jicani bacco tanitohui -nade Jeso.
Epejeni.

**El Nuevo Testamento en el idioma Culina
(mádija) del Perú**

**Kulina: El Nuevo Testamento en el idioma Culina
(mádija) del Perú New Testament**

copyright © 2014 Wycliffe Bible Translators, Inc.

Language: Culina (Kulina)

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 21 Feb 2024 from source
files dated 29 Jan 2022

4c7c82dd-1f0f-5341-b6e6-26970c27fee2